


NKONKO NE MANDAMUNA

 . . .bùngi bungikale ne cyà kwangata, kàdi ndi ne . . .ndi mutwàle cikèbelu cyànyì kaaba aka. Ndi mufwànyine kucipèèsha Leo mwab'ewu, anyì muntu kampànda udi musòmbèle pabwìpì udi mufwànyine kungambulwisha bu nwènù mwà kuswà, bu twètù mwà kufikaku.

² Mpindyewu, bu inàbànzà udi kuntu kwàka ewu, kwòkò kwikàle . . .bu yèyè mwà . . .Nkwèpì kùdì . . .Bayendè nganyì? Èyo. Èè, pawikalà muswè bwà mukàjèèbè alwe kusòmba neebè, ùdì—ùdì mwà kulwa, kakwena cintu nànsha cìmwè cyàmbiibwa munkaci mwà bânà bèètù bàà balùme cìdì kaciyi cìfwànyine kwambiibwa kùdì mwanèètù wa bakàji, pèndè to. Tudi ànu . . . nudi bamanye's. Abi—abi bìdì bîmpè anyì? Mpindyewu, udi mutàmbe kwanyishiibwa bwà kwikala nendè. Ùdì—ùdì ne luuya kuntwaku aku anyì, Doc? Èè, abi mbîmpè, kàdi's ùdì bu pà nkaayendè ndambù's.

³ Ne kakwèna cintu nànsha cìmwè—cintu nànsha cìmwè mwab'ewu . . .misangu mikwàbò cìdì cyenze ne ntèlè “muntu mulùme,” mbwalu kutu misangu mikwàbò muntu mulùme ùdì mwà kwela lukonko munkaci mwà bantu balùme lùdì kalùyì lufwànyine kwandamunyiibwa mwaba ùdì bantu bakàji to. Kàdi kamwèna cintu nànsha cìmwè cìdì kaciyi mwà kwandamunyiibwa mu disangisha dyètù dyà pa kaaba dyà ciibidilu edi to, bwalu cìdì nangananga ne mushinga wàbùngì bwà bambi, ne bikwàbò, ne cìdì wàbò—wàbò mudimu mubatuma nawò ne cìdìbo ne cyà kwenza.

⁴ Mpindyewu, ndi ngeela meeji ne eci cìdì cìkwàciibwa pa mukàbà wà mèyì. Pìikalàbi . . .Ncyèna mutwishìibwe to. Mwanèètù Goad, nukàadi penyì piine apu, aci cìdì munkaci mwà kukwaciibwa pa mukàbà wà mèyì mpindyewu anyì? Èyo. Cìdì citufikisha ku dyenza eci mbwà kujandula, bânà bèètù, cìdì cyà mushinga, cìdì ci—cìtùpà kùdì . . .cìdì mu meeji à muntu, cìdì—cìdì bintu byètù.

⁵ Twètù—twètù bônso tudi ne cyà kwamba cintu cìmwècìmwè aci. Mpindyewu, cileejilu, muntu kampànda ubwela, wàmba ne, pàmwàpa uya ku èkèleeziyà wa mwanèètù wa balùme ewu, (dìna dyèbè dyà munda nganyì, mwanèètù? Willard. Mwanèètù . . .Mpindyewu, kùdì ba Willards bàbìdì mwaba ewu, nebikèngelè bwà mèmè kunùpa cintu kampànda cìkwàbò. Bu mèmè . . .Dìna dyèbè dyà ndekeelu nganyì, mpindyewu? Crase) Èkèleeziyà wa Mwanèètù Crase, ne Mwanèètù Crase ùvwa mufwànyine kwamba cintu kampànda. Dìbà adi bàdì bàfùmina ku Sellersburg batàngila kwà Mwanèètù Ruddell, kwà Mwanèètù Ruddell nkufwànyine kushiilangana ne cyòci

aci. Bàdi bàya kwà Mwanèètù Junie, mbishiilàngàne, ànu byà menemene. Bàpweka ku tabernacle, bìkalè ànu bishiilàngàne. Nwamònu anyi? Bidi bìbweja bantu mu cibwejàkàjì.

⁶ Mpindyewu, bu mudi muntu kampànda wamba ne: “Kaa, ncyèna ngiitabuujà ne wèwè udi mufwànyine. . . mu bulelèlè bikèngela upete Nyumà Mwîmpè to. Ncyèna ngeela meeji ne bìdi ne mushinga to.” Twǎnjìbi kwamba, cileejilu, Mwanèètù Crase ngudi mufwànyine kwamba nàнку. Ne pashìishe ulwa kùdi—kùdi Mwanèètù Ruddell, ne yèyè mufwànyine kwamba ne: “Èyo, mbyà mushinga munène.” Nènku pashìishe upweka kwà Junie, wamba ne: “Èè, kabyèna ne cìdìbì bishintulula to.” Nwamònu anyi? Bu twètù mwà kudisanga nànsha pámwè mene. . . Mvwa mwà kujinga bwà twètù kwikala ne bambi bwònsò bàà mu Jeffersonville (mu cisumbù eci) tuvwa mwà kudisanga pámwè bwà twamòna mwà kwamba cintu cimwècimwè.

⁷ Nènku ki bwà cinyi, misangu yàbúngì, bìdi bìkèngela bwà balami ne balubuludi, bàjandule cìdì mudimu wàbò. Nènku ndi mmòna ne tudi ne mulami wa cibucilu cyà èkèleeziyà ne mulami wa ku ntempelu mwab’ewu dilòlò edi, pa nàнку netùmanya cìdì mudimu wàbò. Kàdi mu byònsò ebi cìdì citàmbe kwikala cyà mushinga (mwab’ewu) cìdì ànu nkonko yìdì mifwànyine kwediibwa mwaba kana wònsò ewu ne mifwànyine kwandamunyiibwa mwaba kanà wònsò. Yìdi ànu nkonko yètù mipeepèlè eyi, yà yitàngila bu mùdì midimu yà balubuludi, midimu yà. . . Mpindyewu, pìikalayi ànu midimu yètù myena diinà eyi, ndi ngeela meeji ne mmilamika ku mbòdì mwab’ewu mpindyewu, bwà midimu yà balubuludi ne cìdìbo ne cyà kwenza. Kàdi mvwa ndyàmbidila pámwäpà. . .

⁸ Nènku lùmwèpèlè lùvwa lulwè mwaba awu, ne ndi ngeela meeji ne ndwîmpè, Nèndwandàmùnè paanyimà pàà katanci, bu Mukalenge mwà kwanyisha bwà twètù kufika ku lwòlò, lùdi ne:

Mu lukòta kampànda, ncyìnì cìvwà mulami ne cyà kwenza? Cìdiye. . . Mudimu wèndè mmudimu kaayi díbà didi lukòta kampànda lujuuka? Mmunyi mùdiye ne cyà kwenza maalu? Nwamònu anyi? Anyi ncyìnì cìdì mulubuludi ne cyà kwenza, ncyìnì cìdì mpaasàtà ne cyà kwenza, cintu kampànda cyà bwena aci, pàdì lukòta lùkùtuka? Tudi bamanye bitù byènzeka pa ciibidilu, kàdi ambàyi bì tǔng bu cintu kampànda mwà kwenzeka citù kaciyì cyà ciibidilu, nwamònu’s, díbà adi ncyìnì cìdìbo ne cyà kwenza?

⁹ Nènku tudi ànu bamanye cyanàànà kwà kudishindila, mbyenze ànu bu kutwisha bàsàlaayi milèlu, nènku twètù bwònsò tudi bamanye muntu ne muntu kaaba kèndè. Mpindyewu, twètù bu kasumbù bu aka nùнку, tudi bafwànyine kushààla apa citùpà cijimà cyà dilòlò edi, tudi bamanye aci, kàdi cìdi. . . Ncyèna ngeela meeji ne cìdì ne mushinga to. Netùlwandàmùnè. Mpindyewu ndi muswè bwà muntu ne muntu. . .

¹⁰ Mpindyewu, kakwèna mènà to, yìmwè yà ku yòyì eyi yìdi ne mènà mafùndapù, kàdi mèmè—mèmè ncyèna mufwànyine kuteela mènà a bantu to. Bwalu ànu—ànu cyònsò ciikala lukonko alu aci, nèmبالè ànu lukonko alu. Kùdi ànu mitwe bu ku yibidì yà ku yòyì yìdi ne mènà pa yòyì. Nènku, indilaayi, ndi mufwànyine kwikala mupete lukwàbò. Ndi mumanyè, Ngangàbukà Ingleman mukulumpe awu, nkàvwà mwambe kumubiikila ku—luseke lwà ku sud, ku 4—426 luseke lwà ku sud. Ndìbà divwà ngàngàbukà mukulumpe udi kwìnshi eku nùku kutùvwà tusanganyibwa leelù ewu, kwìnshi ku Georgetown, mwòndòpiibwe, anyi mupetùlùle lungenyi paanyimà pàà yéyè mumane kushàala ntàntà mule kàyì umanya muntu nànsha, ne—ne bikwàbò. Mpindyewu, ndi ngeela meeji ne edi didi naayi, mpindyewu netùbwele mu nkonko yètù yà kumpàla yìndì mulonge dyàmbedi.

Mpindyewu twànji kujuukilaayi ànu kuulu bwà katanci kakesè cyanààna, bu nwènu mwà kuswa.

¹¹ Taatù wetù wa mu Dyulu, tudi badisangishe kaaba aka bu kasumbù kàa bantu, bantu beena Kilistò bàdi baKunangè, bàdi baKwitabuujè, ne bàdi balambule nsòmbelu yètù ne midimu yètù ku mudimu Wèbè. Kùdi bambi mwab'ewu, bansongàälùme, bantu balùme bashindàme, bàdi ne maèkèleeziyà, bàdi bambùle bujitu kumpàla kwà Nzambì. Kùdi balami mwaba ewu bàdi bambùle majitu mu midimu yàbò mu èkèleeziyà mishìilèshìilàngàne eyi. Kùdi balubuludi, ne majitu àdìbo bambùle. Bampaasàtà, batangadiki, anyi nì ncinyi cyònsò, Mukalenge, twètù tudi bambùle bujitu Bwèbè Wèwè. Nènku's ki bwà cinyi tudi tudisanga pàmwè, bwaà twètù bònso kwakula cintu cimwè mùvwàbo batwambile ne tudi ne cyà kwenza mu Mifundu. Tudi ne cyà kwakula bwònsò mwomùmwe.

¹² Nènku Taatù, tudi twela meeji ne, mu musumbà wà mùshindù ewu, tudi bafwànyine kusangana ne pàmwàpa bàmwè bàà ku bàna bèètù anyi bamwè bàà kutùdi mbafwànyine kwikala ne tuntu tukesè twà mmwenenu mishìilàngàne, ne bàmwè bàvwà ànu bàkonka bwà kujandula menemene cidi Bulelèlà pa bwine bwalu ebu. Ne tudi bamanye ne katwèna bakumbane to, muntu ne muntu wa kutùdi. Bu mèmè mwà kulòmbakù yònsò wa ku bàna bèètù bakwàbò aba bwà kulwaye kwandamuna ku nkonko eyi mwab'ewu, pàngàpa bàvwà bafwànyine ànu kwikala bakumbàne ànu mündi mèmè ànyì kumpita mèmè bwà kuyàndamuna. Kàdi bwònsò pàmwè tudi beyèmène dibuulula Dyèbè, bwà Wamòna mwà kutùbuulwila ku Díyì ne ku... ku Nyumà Wèbè, bwà yéyè...bwà twamònakù mwà kupeta dyandamuna bwà lukonko ne lukonko lwònsò. Bwà myoyi yètù... twamònakù mwà kuujiibwa tètè ne mandamuna nènku tudi mwà kupàtuka tudyùmva ne tuvwa bapàyiibwe bìmpè menemene bwà mudimu Wèbè ne kwenza wètù mudimu kutàmba—kutàmba mutùdi mpindyewu emu. Ki kiipàcilà kèètù

mu kwikala kaaba aka, Taatù. Enzaku nàнку mpindyewu.

¹³ Ne andàmùnaku ku nkonko yètù, Taatù, patùdi baKwindile apa. Kulekediku mitù yètù yipandika to, kàdi tushàaleku ne lukonko alu too pàndamunyiibwàlu lwònsò ne twètù kusankishiibwa kùdi Nyumà, lupungu lùmwè tupetangana bwà Bwikadi Bwèndè. Tudi tulòmba nùнку mu Dìna dyà Yesù. Amen.

¹⁴ Ndi muswè ànu kutèèla Mufùndu, bwà kubanga. Bu mwàkambà Yeshàayi, mupròfetà wàmba ne:

*Éyì lwáyi. . . tupunge díyì pàmwè, mùdi MUKALENGÉ
wàmba: . . .*

¹⁵ Nènku ndi ngeela meeji ne ki bwà cinyì tudi kaaba aka dilòlò edi, mbwà kuteeta kupunga díyì, kupeta bintu bipungila díyì. Nènku mpindyewu ndi mufwànyine kubanga. . . ne kwangata bimwè byà ku bintu bifunda mwab'ewu bilondèshile nomba ne bikwàbò, bwà ne mvwa ne eci, Mwanèètù Wood ùvwa muyìtwàle; ndi ne cibombi eci ciikalemu ne mandamuna. Nènku mpindyewu ndi muswè ne yònsò wa kunùdi, bânà bèètù bananga, bwà kumanya ne—ne mandamuna aa àdi—àdi mafidìibwe ne dyànyì pàànyì dimanya dyònsò, dìdì ditàmbe bwìmpè dìndì mwà kwikala pàànyì ngùumvwa.

¹⁶ Ne wòwò mandamuna aa àdi mwà kupangila, nwamònu's, bwalu Mifùndu kayìtu mwà kupangila yòyi to, ne bwà ku dyànyì pàànyì dimanya àdi àpetangana ne Mifùndu. Ndi ntèkemena ne cìdi cyènda cicitòòkesha. Ne mukàbà wà mèyi ùdi ne cyà kulamiibwa mpindyewu ne muntu kanà yònsò udi naawu dijingà awu, èè, ùdi mwà kuwùpeta. Kàdi mpindyewu, ndi mumanyè ne Mifùndu kayìtu yipangila to kàdi àànyì mandamuna àdi mwà kupangila. Pa nàнку ndi mutwishìibwe ne bantu bònsò mbuumvwe aci. Kàdi cyòci kacìyi—cyòci cipangile, díbà adi nudi pàmwàpa ne bukenji bwà kunkonka ní ndìbà kaayi dyònsò.

¹⁷ Pìikalaku lukonko lwà muntu mukwàbò, kabyena bikèngela bwà lwikalè lukonko lwèbè to, kàdi pìikalalù lukonko lwà mukwàbò muntu, pàmwàpa kacya kutuku mwanji kwelaku meeji ku bwalu abu to, kàdi's ncintu kampànda citùdi balwile mwab'ewu bwà kutwala dikwacisha. Tudi kaaba aka bwà—bwà kudìsanga pàmwè bwalu tudi mu matùkù àà ndekeelu, ne matùkù mmabì, nènku—nènku tudi baswè kwikala balongèshiibwe, babwejiibwe mu kàlaasà.

¹⁸ Mwanèètù Stricker, mmùsàlaayi; Mwanèètù Goad paanyimà pààpa, mmùsàlaayi; ne pàmwàpa Mwanèètù Ruddell udi apa ewu, ùvwa mùsàlaayi; Mwanèètù Beeler; ne bashìlèshìilàngàne bàvwà—bàvwà mu nsòmbelu wa bùsàlaayi; nudi nusòmba pàmwè, nu—nupungishangana, nu—numanya mvità kumpàla kwà nwènù kuyakù, numanya mayelè wònsò anùdi mwà kumanya à mwena lukuna awu, bwà nwamòna mwà kutwilangana nèdè mu cyalù cyèndè.

¹⁹ Pâmwà ne ciibidilu cyà kulwangana mvità yà bisûsù, bàvwa ne cyà kujandula mulwishi wànyì, civwaye ne cyà kwikala, ne mùshindù wà byèndè bisûsù, ni ùvwa ne mbata yà bipèngà, anyì yà luboko yà mu cyàdì, anyì yà dyàbalùme yà ùmutuucila mu lubadi, ní mmwena dyà balùme anyi mwena lubòko, ne makàndà àvwaye naawu, ne neùvwa ujeekeja makàsà èndè, ne mutùye wendesha mèsù èndè, ne ditumba didiye uumukila, ne mayelè wònsò mashiilèshiiàngàne atùvwa mwà kujandula. Nènku bàvwa mwà kujandula civwà...ba—balongeshanganyi bàvwa bamòne mwabilaayi awu ùlwangana kumpàla. Ne pashiishe bàvwa bantèekela muntu mwaba awu bwà kundongesha menemene ànu bilondeshila mùvwa muntu awu ùlwangana, bwà—bwà kumanya civwàye ne cyà kwenza.

²⁰ Nènku ki citùdi balwile kaaba aka dilòlò edi. Tudi bamanye dituuta dyà mwena lukuna. Tudi bamanye cidi mayelè èndè. Nènku tudi mwaba ewu dilòlò edi ne Mufundu bwà kumubwikila mu mùshindù wà kàyì mwà kunyunga to, bwalu mwena lukuna ùdi ku nseke yònsò.

²¹ Mwanèètù Roberson, mvwa ngeela meeji paanyimà pààpa, pangààmumònù, ncyà bushùwà ne yèyè ùdi ne cyà kwikala mumanye cidi disàlaayi. Ncyà bushùwà ne yèyè ùvwa mwenzàmu cikondo! Mbanganyi bàdi mäsàlaayi mwab'ewu, tumònaayibi tũng, bàvwàku mäsàlaayi mu cilwilu? Tàngilàayi ànu kuneeku, nwamònu's, kasumbù kàà nwènù mäsàlaayi. Èyo, mpindyewu, nudi bamanye ne ncinyi ciine aci. Nènku ki cinùtù nulonga aci, kí mmwòmò anyì, Mwanèètù Roy, Mwanèètù Beeler, ne nwènù bankolomo ne bakwàbò? Ncyà, kulonga mwena lukuna ne: "Ciikalaye mwà kwenza ncinyi? Disempela dyèndè didi ncinyi?" ne pashiishe kumanya mwà kutwilangana nendè.

²² Nènku cyòci aci ki citùdi balwile kaaba aka, kulonga disempela dyà mwena lukunà ne—ne kumanya mwà kutwilangana nendè, cintu cyàmucimunà.

²³ Nènku vùlukàayi ne, lekelaayi ngàmbe eci, bânà bèètù, èkèleeziyà mukesè ewu mmubange mwab'ewu kupeta mapà, nwamònu's, mapà àdi enda abwela mu èkèleeziyà. Kadi nànsha kwòkò kwikàle mapà anyì kaàyiku to, kwòkò kakùyì dipà nànsha, nènnwambilè ne, dipà kadyàkucimunà mwena lukunà misangu yònsò to, kàdi Dìyì nedìcimune. Dìyì nedìtwilangane nendè kaaba kanà kwònsò.

²⁴ Nènku Yesù, pàvwàYe pa buloba, wàkacijaadika. Èndè... Yèyè ùvwa Nzambì mumwènèshiiibwe mu mubidi. Kàdi Yèyè kàakakwataku mudimu ne àmwè à ku mapà Èndè malenga awu bwà kutuuta mwena lukunà to. Tudi tusangana mu Maatàayi ne... Ngeela meeji ne nshapità mwi2 anyi mwi3 wa Maatàayi, Yèyè mmwambe... To, nshapità mwi2 wa Maatàayi,

pààkatuutakeenàYe ne mwena lukunà, Yèyè wàkatuutakeena nendè mu cipaapu cyà Dìyi ne: “Bààkafùnda ne.”

Ki mwena lukunà kwalukila ne: “Bààkafùnda ne.”

²⁵ Ki Yèyè kwamba ne: “Bààkafùnda kàbìdì ne,” mùshindù awu, too ne pààkatuutaYe mwena lukunà. Nènku ki citùdì balwile kaaba aka aci, mbwà kutuutakeena ne mwena lukunà ne cyamù cyà mudimu cidi Nzambi mutupe bwà—bwà kutuutakeena nendè naaci.

²⁶ Mpindyewu ndi ne nkonko mitwè ku yinaayi mwab’ewu yidi pa. . . yidi pa kàmwè—yidi pa kàmwè kapesè kàà dibeji, nènku ndi muyipeeshe nombà: ùmwè, yìbìdì, yìsàtù, yìnaayi, yìtaanu, yìsambòmbò. . . mwandamukùlù, dikumi, ne twenda tupweka mùshindù awu. Nènku pàndì ànu njikija eyi, dîbà adi nèntùpikè mbwele mu mikwàbò ayi. Ùdi wàmba ne:

107. Mwanèètù Branham, pùikalà nkonko eyi kayiyi mu njila to dîbà adi kuyitangidi to, ne ncýàdyàkuumvwaku bibì bwà bwalu abu to bwalu nemmanyè ne kacìvwa cyanza cyà Mukalenge to. Lukonko nombà wa kumpàla: Mwanèètù Branham, mvwa mukuumvwe. . . ne cìvwa ne cyà kwikala—cìvwa ne cyà kwalukila mu. . . Mvwa—mvwa—mvwa mukuumvwe wamba ne bìvwa bikèngela bwà mèmè kwalukila ku mudimu wà bwambi, nènku mèmè mwine nkaavwa mwelèpu meeji, kàdi mvwa mwindile cishìmbì dîyì kampànda cyà cyumukila kùdìYe bwà bwine bwalu ebu. Too ne mpindyewu kî ncilwe to. Mpindyewu, bu mùndì mumanye ne nshiikidilu ukaadi pabwìpì menemene, bìvwa bikèngela ànu mèmè kwindila bwà Mukalenge Yesù kwa—kwakula naanyi anyi? Anyi, Yèyè neàsankèku bwà kukwambila wèwè cyà wèwè kungambila, bu mùndì mumanye ne wèwè udi mukana Mwèndè mu ditùkù edi?

²⁷ Èè, mpindyewu, mwanèètù, ndi mufwànyine. . . Ndi mufùnde mwab’ewu dyànyì dyandamuna ku bwalu ebu. Nzambi mwikale ubiikila mwanèètù ewu, ndibiikila mu nsombelu, mpindyewu, kùdì cintu cìmwèpelè cinène citùdì mwà kwangata aci bu cyena-bwalu ne kuyiishapu bufùku bujima, nwamònu’s, pa cintu cìmwèpelè aci ne: “dibiikila.” “Shìndikà dibiikila dyèbè ne disungudiibwa bushùwà,” nwamònu’s. Katwèna baswè kwikala ànu twelakana ní tudi babiikidiibwe anyi to. Udi ne cyà kwikala mubiikidiibwe cyanàànà newikale mucìmùnyiiibwe, tudi munkaci mwà kulwangana mvità. Nwamònu anyi? Nènku pawikala mutwishiiibwe menemene, mwanèètù, ne dibiikila dyèbè ndyà kùdì Nzambi, ne wèwè uvwa mubiikidiibwe kùdì Nzambi bwà kwenza mudimu. . .

²⁸ Mpindyewu, kùdì diyelè dinène mwaba awu didì mwena lukunà mwà kukwenzela. Ùdi mwà kukufikisha ku dyela meeji ne kwèna mubiikidiibwe pèèbè mubiikidiibwe, pashiishe wàlukila kàbìdì ùkwelesha meeji ne kwèna mubiikidiibwe to;

anyi ùkwelesha meeji ne udi—udi mubiikidiibwe pèèbè kùyi mubiikidiibwe to; eci anyi cikwàbò, mu mishindù yònsò. Kàdi bìdi bikèngela bwà wèwè kucitabaleela.

²⁹ Mpindyewu, mùshindù wà kucyènza ngwòwò ewu. Kwanji kujandula dyàmbedi. . . Èè, mpindyewu, eci mmubelu, cintu cìmwèpelè cìndi mwà kufila pa bwalu ebu mmubelu ewu. Nwamònu anyi? Kàdi ikàlà mutwìshìibwe ne dibìikila dyèbè dìdi difùma kùdi Nzambì, ne pashìishe ùkenketè tulumbilà ne twipàcìlà twèbè. Wamònu anyi? Mpindyewu, s'nudi bamanye cìndi muswè kwamba pa bwalu abu. Ncinyi cidi cikusàka bwà wèwè kuyiisha? Cìvwa ànu. . . Udi wela meeji ne cìvwa mmudimu mutàmbe kupeepela kupita uwütù naawu anyi? Dìbà adi's mbipiciibwe ne wèwè mucipwe mwoyi's, kacivwa dibìikila nànsha.

³⁰ Dibìikila dyà Nzambì dìdi ditàmba kwosha mu mwoyi wèbè mu mùshindù wà kùyi mwà kupeta diikisha to munyà ne butùku bwà bwalu bwàdi. Kwèna mwà kushiyangana naadi to, dìdi ànu kacya dyà kucincimika.

³¹ Nènku—nènku byòbì bikèngela bwà wèwè kuyiisha. . . Udi wamba ne, èè, mpindyewu, kiipàcìla kakwàbò nkàà ne: “Ndi ngeela meeji ne, ku mudimu wà dycenza ùndi naawu, bu ngiikalapu mutangadiki wa ùlubuluka anyi mpaasàtà, kwikala ne difutu dìmpè dindongolwela, kwikala ne nzùbu ùndi mwà kubwelamu ne bikwàbò, ne kwikala ne mwoyi, dìbà adi ndi—ndi ngeela meeji ne aci ncifwànyìne kwikala cintu cìmpè, citàmbe kupeepela kupita cìndi munkaci mwà kwenza mpindyewu eci. Ne bushùwà ndi ngeela meeji ne ncifwànyìne kwikala nànkù. . .” Mpindyewu, nwamònu's, cyà kumpàla kiipàcìla kèèbè nkàà mafi. Nwamònu's, kì nkìmpè to. Nwamònu anyi? Wèwè—wèwè udi mu ntùpàkànyì pa cyòci aci.

³² Dìbà adi udi mufwànyìne kwamba ne: “Èè, pàmwàpa mbwalu ndi. . . ngeela meeji ne pàmwàpa ndi mufwànyìne kwikala mutàmbe kumanyika munkaci mwà bantu.” Nwamònu's, neùjandule ne udi pabwìpi menemene ne cibùlà cinène. Ncyà bushùwà, nwamònu's!

³³ Kàdi, mpindyewu, piikalabi ne kiipàcìlà kèèbè nkàà ne: “Nànsha byòbì bikèngela bwà mèmè kudyà bisùkwita byà mukèlè ne kunwà màyi à ku mulonda, s'nènyiiishè Èvànjeeliyò nànsha byà munyì.” Cintu kampànda cyà cikukunya munda mwèbè amu ne: “Nènyiiishe Èvànjeeliyò anyi nèmfwè!” Nwamònu anyi? Dìbà adi neùye—neùye mwaba kampànda, bwalu n'Nzambì udi ukwàta neebè mudimu. Nzambì ngudi uDimanyisha kùdi, bwalu cidi n'Nzambì kàyi ùkulekela wikisha to. Nènku, pa ciibidilu, muntu mubiikila kùdi Nzambì kàtu muswè kucyènza to. Nukaadiku beele meeji pa bwalu abu anyi? Muntu kanà yònsò. . .

34 Ànu àbìdì àdì panshì àà bàvwa bankonke kùdì bânà bèètù bàà mushinga mukolè bàà dikema aba, bàvwa bambe ne: “Mpindyewu utùdì tubwela mu Njila ewu, Mwanèètù Branham, mpindyewu utùdì bapete Mukalenge ne bapete Nyuma Mwîmpè ewu, bikèngela tukebe mapà bwà mudimu wètù wà bwambi utùdì ne cyà kwenza.”

35 Mémè ne: “Kanùcyènjìku nànsha to.” Nwamònu anyi? Kanùbediku bantu bwà kwenzabo cintu bu nànkù to, bwalu pa ciibidilu muntu utu muswè kucyènza awu’s mmuntu udi—udi kàyi mwà kucyènza to.

36 Mulùmýànà utu uteeta kucìnyeema awu’s ki udi Nzambì ùkwàta nendè mudimu. Nwamònu anyi? Pìikalaye ùteeta bwà kucìnyeema ne: “Kaa, mwanèètù, ndi nkwabwila’s, ndi... dibìikila dìdì munda mwànyì kàdì ndi... Yoyöyò! Mwabilaayi, ndi mufwànyìne kukina bwà kuteeta ciine aci.” Èè, s’ki bwalu mbwòbù abu, nudi numòna’s. Aci—aci’s ki kuteeta kunyeema aku.

37 Pìikalàye—pìikalàye muswè ànu kucyènza mu mìshindù yònsò, katancì aka nudi bamanye anyi’s ùdì ùdisangana “muntu mudyàmbi.” Byenze bu mùdì wamba ne: “Nzambì, wèwè mumpèèshè bukolè bwà kutentemuna mikùnà, ndi nKwabwila ne, nènKwenzèle cintu kampànda bu Wèwè mwà kundekela ntentemuna mikùnà.” To, ki mmufwànyìne kucyènza to, kèna nànsha mwà kudìtentemuna yèyè mwine ku lwidì lujaalàme to, nwamònu’s, pa nànkù kààdyàkutentemunakù mikùnà bwà Nzambì nànsha.

38 Angata ànu, cileejilu, bu Pòlò. Nudi nwela meeji ne Pòlò ùvwa mufwànyìne kunyeema dibìikila dyèndè anyi? Kaa, mwanèètù! Kàvwa mwà kucyènza to. Dìvwa ànu kacya dyàmucincimika munyà ne butùku too ne mwà kashiyàye èkèlezìyà wèndè, wàkashiya bintu byònsò ne—ne kupwekaye mu... Ngeela meeji ne mùvwa mmu Asie, kì mmwòmò anyi? Nènku kushààlamù bidimu bìsatu, munkacì mwà kulonga Mifundu, bwà kujandula ní Cìvwa cyà bushùwà anyì to, nwamònu’s, bwà kujandula Nzambì ní nguvwa mumubiikile bulelèlè.

39 Pa nànkù pìikala Nzambì ukubiikila, mwanèètù wa balùme, ne citungunuka ne kuumbula munda mwà mwoyi wèbè, díbà adi ndi mufwànyìne kwamba ne “Teeka ku luseke bujitu bwònsò, ne mpèkaatù udi ukujìngila bipeepèle nànkù awu.” Nudi numòna anyi? Byòbì ne... Kàdì byòbì kabìyi bikumbula to, nènku díbà adi mémè—mémè mufwànyìneku kwela meeji makwàbò mapitepìte búngì pa bwalu abu to. Cìlekèlè ànu pa kaaba kààcì apu.

Mpindyewu, yèyè ne, mwanèètù wa balùme ewu wàmbì kaaba aka ne:

Mwanèètù Branham, bìvwa bikèngela...Udi wela meeji ne Nzambi mmufwànyine kwakula...(bwà mémè kumwambila.)

⁴⁰ Ndi ngiitabuuja ne Nzambi mmufwànyine kwakula ànu buludi nendè. Bwalu, nudi bamanye's, Nzambi... Twètù katwèna batàmbe bunène byà Yèyè kàyi mwà kwakula neetù to. Nènku Yèyè—Yèyè—Yèyè neakule neetù, èyo. Nwamònu's, Yèyè ùdi ànu... Yèyè neakule neetù.

⁴¹ Nènku ndi nwanambila ne, bu Yèyè mwà kungambila, dîbà adi mwanèètù wa balùme awu mmufwànyine kwamba ne: “Èè, Yèyè's ngudi mwambile Mwanèètù Branham nànkù, Nzambi àtumbè's wè!”

⁴² Kàdi, nudi numòna's, kî mwanèètù Branham udi ukubiikila to, m'Mukalenge Yesù udi ukubiikila awu. Nwamònu anyi? Nènku piikalabi ne m'Mukalenge Yesù ngudi ukubiikila awu, Yèyè's ngwákula. Nwamònu anyi? Ndi mufwanyine kwakula neebè ku maci èbè, kàdi pàdì Kìlistò ùkubiikila ku mudimu wà bwambi mmu mwoyi wèbè amu. Nwamònu anyi? Ki mwaba ngwòwò awu ùdi cintu aci ne cyà kwelela lwongò ne kwena mwà kutuukaku to.

Mpindyewu, ndi ngeela meeji ku lukonko lwibîdì... .

⁴³ Mpindyewu piikalàku lukonko kampànda pa bwalu abu, lukonko kanà lwònsò pa bwalu abu, nwamònu's, lwà ne dibiiikila dyà muntu dîdì ne cyà kwikala mu mwoyi wèndè, difùmina kùdì Nzambi. Nènku—nènku mwanèètù mukwàbò... Kaa, ndi mumanye udi mufunde elu elu ewu. Nwamònu's, ndi mumanye udi mulufunde, mwanèètù wa balùme wa mushinga mukolè, wa ngàsà, ùndì ngiitabuuja bulelèlè ne ùdi ne dibiiikila dyà Nzambi. Kàdi ndi ànu... Ncyèna muswè bwà yèyè kuwenza pa kwànyì kwamba to (ki bwà cinyi ndi mulwàndàmùnè mùshindù wùngandàmùnu awu), nwamònu's, pa kwamba kwànyì ne; “Èè, èyo, bìvwa bikèngela bwà Mwanèètù *Kampànda* kubwela mu mudimu wa bwambi.” Nwamònu anyi?

⁴⁴ Mpindyewu wèwè udi wamba ne: “Mwanèètù Branham mmungambile ne bìdì bikèngela bwà ngenze aci.” Nwamònu's, ne pàngàpa ambà tũng bu cintu kampànda mwà kwenzekela Mwanèètù Branham, mémè kushipiibwa, anyi kufwà, anyi—anyì kuumuka? Dîbà adi, nwamònu's, dibiiikila dyèbè ndimane kujika dîbà adi. Kàdi piikalàbì ne Yesù ùdi ùkubiikila, mwanèètù wa balùme, bwà pàcidiku ànu Cyendèlèlèlè neciikalè ànu cikobola ne mutooyi mukolè. Nwamònu anyi? Ne dîbà adi udi umanya mwaba wùdì mwimànyine.

Mpindyewu ku lwibîdì... .

⁴⁵ Anyì cintu bu nùnkù ewu: “Bu mùndì mumanye ne nditùkù dyà ndekeelu.” Ncyà bushùwà ne ndi ngànyisha aci mu mwanèètù awu. Ncyà bushùwà ne ndi ngànyisha aci mu mwanèètù awu bwà kujingulula ne tudi mu ditùkù dyà ndekeelu,

ne meeji matòòke à mu mwoyi wèndè, ujinga kwenzela Kilistò cintu kampànda.

Lùdi lùlonda lùdi ne:

108. Mpindyewu, bu Mukalenge wètù wa musinga mukolè mwà kundekela ngenza kaacintu kakesè Bwèndè, nebikèngele bwà mèmè kwalukila mu bisùmbù mùmvwa mukwàte mudimu wà bwambi citùpà mu...mu ntupàkanyi (yìndì nyingaleela eyi)... mmwelè cyòci aci mu tubòko...ne nteeta kubàmbila Bulelèlà anyi? Bàvwa batàmbe kwikala—bàvwa batàmbe kwikala pa mwoyi wànyì.

⁴⁶ To, mwanèètù, ncyèna mufwànyine kwela meeji ne bìvwa bikèngediibwa bwà wèwè kwalukila mu cisùmbù cimwècimwè aci to. Kàbìdì ndi ngeela meeji, mwanèètù munanga ne, pàdì Mukalenge ùkubiikila Ùdi mwà kubenga kukulekela uya mùvwà uyàyaaya pawùcìvwa mu cisùmbù amu, ne pàmwàpa udi mulongeshe bintu anyi mupete bintu bìvwa kabiyi...byùdì mu bushùwà bwà bwalu umòna bishìilàngàne mpindyewu, nwamònu's, byùdì mufwànyine kumòna bishìilàngàne ne mùvwà ubimòna kale. Mpindyewu, nènku Mukalenge, pàakakubiikilaye, Yèyè ùdi mwà...piikalabi ne Yèyè ùdi ukuvwijilaci cilelèlà, Yèyè mmufwànyine kukutùma nì mpenyi nì mpenyi. Nwamònu anyi? Kabìvwa bikèngela bwà wèwè kuya ku cisùmbù kampànda anyi cintu kampànda nànsha.

⁴⁷ Paùvwàmù apu uvwa ne meeji matòòke. Mèmè ndi mumanye mwanèètù, mungàmbi amu, udi mufunde nkonko eyi. Ne bondòke bwà meeji matòòke, ne mwena Kilistò mulelèlà ne mushùwashùwàlè, wèwè udi mwenze cilenga cyùvwà mwà kwikala mwenze ne dyèbè pàdì dimanya dyùvwà naadi, nènku aci's ke cyònsò cìdì Nzambì ùlomba. Nwamònu anyi? Mpindyewu, bu ne bìvwa bikèngela bwà Nzambi kukubiikilaye bwà wèwè kwalukila ku cisùmbù aci, mèmè's mvwa mwà kwalukila cyàkàbìdì. Kàdì piikalabi ne kàvwa mwenze nànkù to, ndi—ndi ngeela meeji ne ndi mufwànyine kuya ànu kwònsò kùdìYe muntùme aku. Kùdikù lukonko anyi?

Nomba mwisàtù:

109. Mmunyi mùdì muntu ùmanya kaaba kèndè kajaalàme mu Mubidi wà Kilistò?

⁴⁸ Alu's ndwà lwîmpè, lwîmpè be : “Mmunyi mùdì...” Alu ndufwànyine kwikala lukonko lwa mùshindù ùdì munkaci mwà bààbùngì bèètù mwab'ewu dilòlò edi, “Mmunyi mùdì umanya bijaalàme menemene?” Mpindyewu, ndi ncinkila ne mwanèètù ewu mmuswè kumanya ne “Mmwaba kaayi, mwaba mu Kilistò, ncitùpà kaayi cyà Kilistò cìndì nkwàcila mudimu?”

⁴⁹ Mpindyewu, cileejilu, ndi mufwànyine kwamba nùnkù ewu, mwanèètù wa balùme, bwà kukupa dyandamuna ditàmbe bwîmpè dîndiku pàanyi mumanyè. Kaaba kèèbè kàdì...mu

Kilistò nkakubuulwila kùdi Nyumà Mwimpè. Ne pashiishe pawikalà muswè kumanya ne n’Nyumà Mwimpè anyi kí n’Yèyè to, jandulaku ne Yèyè ùdi ùbènesha cyùdi wenza aci, anyi kèna ùcibènesha to. Nènku piikalàbi ne Yèyè ùdi ùcibènesha, dîbà adi’s n’Yèyè. PiikalaYe kàyì ùbènesha . . .

⁵⁰ Byenze muvwa muntu kampànda mungambile matùkù mashààle aa, wàmba ne: “Mukalenge mmumbiikile bwà kuyiisha.”

Mémè ne: “Èè, nànkù yiishà’s.” Nwamònu anyi? Ki pa nànkù yèyè—yèyè . . .

⁵¹ Ncyà bushùwà ne ndi ngeela meeji ne bidi nànkù . . . Sàtaanà, yèyè ànu mwà fufukisha muntu ku—ku dyenza mùshindù awu ne pashiishe kumuseeswisha, aci’s ki citùye muswe kwenza’s. Dîbà adi buloba bujimà bùdi bùfunkuna munu wàbò ànu mwaba awu. Muntu kampànda ùdi wèla meeji ne ùdi ne dipà dyà dyakula dyà mu myakulu ne dyandamuna; umwe ùdi ne dipà dyà dyondopa dyà kùdi Nzambì; munga ùdi ne bintu ebi bu mùdi . . . Mîngà misangu bàdi mu ntupàkányi pa bintu abi, nwàmònu’s. Ne mîngà misangu bàdi beela meeji ne kabèena naabi to pààbò biikàle naabi. Nànkù mbikolè menemene’s.

⁵² Pa nànkù misangu yònsò enzaayi cyòci eci, bânà bèètù, dîbà dyònsò dyùdi udyùmvwa ne udi ne cyà kwenza cintu kampànda adi, dyàmbedi jandula ne cyòci aci ncilondàngane ne Mifundu bwà wèwè kucyènza anyi (piikalaci mu Mifundu). Kacyi ànu cifundibwe mu mwaba ùmwèpelè cyanààna to, kàdi ndi njinga kwamba ne mu Mifundu yònsò mu Bible mujima bwà wèwè kucyènza, pa kaaba kèèbè, ambàbi túng bu ne udi mwà kwikala mutangadiki, mpaasàtà, mulongeshi, mupròfeta, cyònsò cidi Nzambì mufwànyine kwikala mukubiikidile bwà wèwè kwikala aci. Nwamònu anyi? Anyi wèwè ne dipà dyà dyà myakulu, dipà dyà dyandamuna, dipà dyà mùshindù kanà—kanà wònsò wà mapà citèemà à Nyumà mu èkèleeziyà, ne midimu yinaayi yà èkèleeziyà, kaaba kanà kwònsò, dyàmbedi anji tàngila Nzambì ní mmukubiikile.

⁵³ Pashiishe, pa ciibidilu, mùshindù wúndi ncitangila bwànyì mémè mwine, ànu . . . eci mmémè, Ntu ntàngila ngiikadilù wa muntu ne mmòna ne ndipà dyà mùshindù kaayi didiye ùjikula. Nwamònu’s, Nzambì neàkwate mudimu ne cifukiibwa Cyèndè mùshindù ùdiYe mucyenze awu. Nwamònu anyi? Yèyè neenze cifukiibwa . . .

⁵⁴ Nwènù bamumòne wenza maalu ne mapeepeleja ne kàyì utwa nyimà pàmwè to, nwènù, . . . kàdi wàmba ne: “Mukalenge mmumbiikile bwà *cikampànda*, bwà kwikala mpaasàtà.” Mpindyewu, mpaasàtà kèna mwà kwikala muntu wa mapeepeledi to. Mpaasàtà yèyè’s ùtu mùshindàme, wa mutwe makàsà panshi. Nwamònu anyi?

55 “Nzambì mmumbiikile bwà mèmè kwikala mulongeshi.” Kàdi mutangilaayi numòne mùdiye umvwija Dìyi. Nwamònu anyi? Yèyè ùDibwejakaja dyònsò ne bikwàbò byònsò, díbà adi nudi mwà kwamba cidìku’s. Nwamònu anyi?

56 Kàdi, díbà adi, cintu cyà dyenza, kaaba kèèbè katu misangu yònsò ànu kàmanyikile ku ne udi mwà kucyènza anyi kwèna mwà kucyènza.

57 Mpindyewu, pàakambiikila Nzambì bwà mèmè kwikala mutangadiki, mvwa njinga kwikala mpaasàtà. Nènku mèmè kwela meeji ne kushààla kumbèlu eku nkufwànyine kwikala kulenga’s. Kàdi Mukalenge kumbiikilaye. Ki ndekeelu wa byònsò bantu bònsò kudisangabo. . . Kakwèna nànsha umwe wa kùdibo ucidi mushààle mwab’ewu dilòlòlò edi to, mu mùshindù wà ne bààkadila myadi ne kuyabo kuntwaku mu nombà 1717 wa Mùsèèsù wà Spring. Nènku inábànzà awu, Mandamu Hawkins ewu, kulwaye kutwilangana naanyi wàmba ne (udila mwadi, mu cikondo cyà lukòta amu, pàvwà muntu ku mutumba mwà kulàmba lwesu lwà nkùnde ne twètù bwònsò tulwa tuyìdya) ki yèyè ne: “Mèmè nèngàbanyine bàmà bàanyi byàkudya ku mèèsà bu wèwè ànu mwà kwibaka tabernacle kampànda.” Nwamònu anyi?

58 Nènku dibiikila dyànyì divwa mutangadiki. Dìndà adi. . . Ntèeka mwab’ewu mene mu dibwe dyà mu ditumba edi, bu twètù mwà kubuululamù dilòlòlò edi, nenùmòne dibèji dyà mbangilu dyà mu Bible wanyì mùvwàYe mungambile ne ndi mutangadiki. Nwamònu anyi? Ne mèmè mwine ncìvwa mpaasàtà wa mutàmbe kutuuta dyàkalenga to, ncìvwa mufwànyine kwikala nànkù to, bwalu ncyèna ne lutùlùlù ne bìdì bikèngela bwà kwikala mpaasàtà to. Nwamònu anyi? Nènku ki bwà cinyì bu mèmè mwà kuteeta kwikala mpaasàtà, ndi mufwànyine kwikala kule ne kaaba kàànyì ànu mùdì mpaasàtà mwà kwikale kule pàdiye uteeta kwikala mutangadiki.

59 Nudi bumvwe cìndì muswè kwamba aci anyi? Udi mwà kumòna mùshindù ùdì Mukalenge ukubiikila, cìdì kaaba kèèbè mu Mubidi. Kùdikù lukonko anyi?

110. Bantu bònsò bàdì bùle tètè ne Nyumà Mwimpè bàdì bààkula mu myakulu nànsha ku tootootò nànsha ku ndandanda anyi?

60 Ki lukonko lwà kumpàla ndwòlò alu ne: “Bònsò bàdì ne Nyumà Mwimpè. . .” Díbà adi, byònsò bìdì mu lukonko lùmwè, ndi naalù mwab’ewu lukòsolola bu lukonko lwà nombà mwinâyì. Kàdi nèn—nèngàmbè eci nùnkù dyàmbedi, nudi numòna’s:

Bantu bònsò bàdì ne Nyumà Mwimpè bàtuku bààkula mu myakulu nànsha ku tootootò nànsha ku ndandanda anyi? Ndi musangane mwaba wùvwà Pòlò mwambe ne yèyè “wàkaakula mu myakulu kubàtàmba bònsò bwàbò.”

Èyo, lukonko nomba mwinâyî: **Bónsò bàdi bàákula mu myakulu pàdìbo bapeta...** Anyi, to, ndwambe ne: **Bónsò bàdi bàákula mu myakulu...** To: **Bantu bónsò bàdi búle tètè ne Nyumà Mwímpè aba bàtu bàákula mu myakulu nànsha ku tootootò nànsha ku ndandanda anyi?**

⁶¹ Mpindyewu, mwanèètù, ndi... Elu ndukonko lwà ndòndò. Mpindyewu, mwaba awu, nudi pàmwápa... Pàmwápa nêmpete àmwè mandamuna pa bwalu ebu.

⁶² Nyumà Mwímpè, citùpà cyà Nyumà Mwímpè ndibingishiibwa. Apu's mpaùdi dyàmbedi... bìkèngela Nzambi àkubìkilè cyanààna kwàdyàkubìkidiibwa to. Nwamònu's, kakwèna cintu nànsha cimwè cyùdi mwà kwenza mu wèwè nkààyebè to. "Muntu nànsha umwe kèna mwà kulwa kùNdi pàdi Taatù Wanyì kàyì mumukòke dyàmbedi to." Ncyà bushùwà anyi? Nànku awu dibingishiibwa's ncitùpà cyà Nyumà Mwímpè.

⁶³ Nukaadiku bangumvwe ngumvwijila nkòlomò wa Ba-Luthériens awu cikondo aci bwà budimi bwà matalà anyi? Nwamònu's: "Ditalà, muntu wàkapatuka e kukùnayè túbidi... kukùnayè budimi bwèndè bwà matalà. Dindà dyàkalondà kupàtùkayè kàdi 'kakùyì cintu nànsha cimwè,' Paanyimà pàà katanci kupetayè tubeji tukesè túbidi tupàtùke kuulu, kwambayè ne: 'Nzambi àtumbè bwà budimi bwànyì bwà matalà's wè!'" Ki mèmè ne: "Úvwa ne budimi bwà matalà anyi?"

Ne nkòlomò wa ba-Luthériens awu kwambayè ne: "Mu mùshindù mushààdile."

⁶⁴ Mèmè kwamba ne: "Aci's ncyà bushùwà, mu mùshindù mushààdile úvwa naawù's." Kàdi mèmè kwamba ne: "Ku..." Mèmè ne: "Abu's bàvwa nwnwènu ba-Luthériens."

⁶⁵ "Dyà kàaleelù edi mabeji kukolawù e kudyenza too nzeba. Awu's úvwa m'Méthodiste. Citùpà ciibìdi cyà ditalà, nzeba's." (Ngeela meeji ne aci ncyà bushùwà, nwènu bàna bèètù bàà ku ferme.) "Ne pashiishe nzeba kupwekesha mèsù kùdi dibèji kwamba ne: 'Huh! Mèmè ndi nzeba, wèwè udi ànu dibèji nàka's! Nwamònu's, ncyèna kàbìdi neebè dijinga to.' Ne pashiishe nzeba... Bungungu bwà bilòngò bùdi butuutuka ku nzeba, bwàlukila cyàkàbìdi mu dibèji; bìkèngela bupete dibèji."

⁶⁶ "Ne pashiishe kuumukila ku aci cìdi cìpatula mwepu. Aci cívwa m'Mpenta, dyalujulula dyà mapà bu àkabwela mu mwaba wa kumpàla, àlukila ku cyà bangabanga. Pashiishe pààkapàtuka mwepu, kwambawu ne: 'Ncyèna neebè dijinga to, wèwè nzeba. Anyi mèmè ncyèna menemene neebè dijinga to, wèwè dibèji.'"

⁶⁷ Kàdi, twamb'eku twamb'eku, mwoyi ùmwèùmwe úvwa mu—kabeji kàà ditalà aku awu ki wàkenzà nzeba. Kàdi cívwa mu kabeji ne nzeba aci's ki kwenza lutete. Pa nànku Nyumà Mwímpè údi wàkula mu myakulu awu ncyini? Ndingishiibwa

dibàndidile. Nwamònu anyi? Èkèleeziyà wa beena Mpenta ncinyi? Mba-Luthériens mu cipidi cibàndidile. Nwamònu anyi?

⁶⁸ Kàdi mpindyewu pàkaadi dibàndidila edi dilwa, lukonko ndufwànyine kwikala lwà ne: “Dìbà adi ne bikèngele ànu bwà mèmè kushààla anyi?” To! To, ditalà ndibobe. Nwamònu anyi? Wèwè udi ubanga ne lutete. Banga ne—ne Dìyì, lutete, Neditwale dibingishiibwa. Ne ushaale mu dibingishiibwa too ne pààtwàlaDi dijidiibwa. Shààla mu dijidiibwa too ne paùdi upeta Nyumà Mwímpè.

⁶⁹ Mpindyewu paùdi upeta Nyumà Mwímpè, Yèyè awu neenzè ncinyi? Ncinyi. . . Uçidi ànu ne lukonko, kî mmwòmò anyi? Èyo:

111. “Dyakula dyà mu myakulu” ncinyi’s

⁷⁰ Dyakula dyà mu myakulu kî cingà cintu to ànu dibatiiza dyà Nyumà Mwímpè didi dikubingisha ne dikujiidila adi. Mmutàmbe kuwujiiibwa! Mpindyewu, ndi muswè. . . Mvwa njinga lukonko elu. Nzambì mmumanye ne kacya ncivwa mumanye ne muntu awu ùvwa ne cyà kwela lukonko, dyandamuna. . . anyi kulùkonka to.

⁷¹ Mpindyewu, bìdiku kàbìdì. . . kwòkò kwikàle luuya lupite bùngi munda emu, kangulaayiku ciibi cyàcya nwènù babange kubungila ne tulù anyi cikampànda. Ndi njinga ne eci nùcyumvwe bìmpè menemene. Bwalu kùdi—kùdi luuya ndambù, cidi mwà kunùbungishisha tulù.

⁷² Mpindyewu mònaayi, mònaayi eci: dibingishiibwa, dijidiibwa, dibatiiza dyà Nyumà Mwímpè.

⁷³ Mpindyewu tàngilàayi kuneeku, ki cyòci eci’s. Lekelaayi ncileejè. Mpindyewu, ndi kwinshì eku, ndi ngènzàmpèkaatù, ndi ngenda nya *ewu* mùshindù. Musangu kampànda, paanyimà pàà katanci, Cintu kampànda cidi cyàkula naanyi. Nènku cintu nànsha cìmwè kacỳèna mwà kunkudimuna to ànu Nzambì. Ncyà bushùwà anyi? Mèmè ndi mukudimukile mu *elu* luseke. Mpindyewu, pàndi nkùdimuka, ki dibingishiibwa dyanyi ndyòdi adi. Ncyà bushùwà anyi? Mpindyewu, cimfwànyì eci kî kayidila kàànyì, nwamònu’s, cimfwànyì cyà Kilistò.

⁷⁴ Mpindyewu ndi muswè kufika kaaba kàndi mwà kudyùm vwa bìmpè mu nyungulukilu Wendè. Nwamònu’s, ndi mubingishiibwe. Mpindyewu ndi mfika mu *eci* citùpà mündi mwà kwakula Nendè, bwalu. . . Nçidi ànu ndyùm vwa mèmè mwine bundù. Nçidi ànu nwa mfwanka, nçidi ànu nshima, ngenza tuntu tukesè twà budimu tùm vwa nçiyi ne cyà kwenza nànsha, dìbà dyònsò ndi ànu *ngadishinda* ne *ngajuuka*, *ngadishinda*, ne *ngajuuka*, kàdi ndi muswè bwà Yèyè kunkezula ku bintu byònsò abi bwà ngaamòna bulelèlè mwà kuya kùdiYe ne kwakula Nendè. Nwamònu anyi? Èyo, ncyòci eci, ndijidi-. . . citùpà cyà dijidiibwa. Mpindyewu, ncyenzè cinyi’s? Ncingolòlòle. Nwamònu anyi?

⁷⁵ Mpindyewu nêntungunukè ne kuya too ne ku Nyumà Mwîmpè. Nwamònu anyi? Nènku pândi mbwelà *mwab'ewu* ndi mu Nyumà Mwîmpè ku dibatiiza. Ncyà bushùwà anyi? Nyumà Mwîmpè ùdi wënza cinyi? Ùdi ùmpèèsha bukolè. Bukolè bwà kwikala muyiishi, bukolè bwà kwikala kangimbà, bukolè bwà kwakula mu myakulu, bukolè bwà kwandamuna myakulu. Mmùle tètè ne bukolè, bwalu Nyumà Mwîmpè mbukolè bwà Nzambi. Nènku cìvwa mbukolè bwà Nzambi bwàkankùdimwisha abu. Cìvwa mbukolè bwà Nzambi bwàkanjidila. Mpindyewu mbukolè bwà Nzambi bùdì bungúje mêmè.

⁷⁶ Mpindyewu, mu mpungà mukwàbò, ndi mwimane *mwab'ewu* nènku ndi nteeta kwamba cintu kampànda kàdi Bukolè bwà Nzambi bulwa pambidi pàanyi mu mùshindù mukolè wà nciyikù mwà kwakula kàbidì to. Nwamònu anyi? Ki mêmè kubanga kukukumina. Byenze bu mvwa nswa kwamba ne: “Bànà bèètù,” bu mwimane mùshindù ewu.

⁷⁷ S'ki cyôci eci, nêncifwànyikijè mu mùshindù ewu. Ndi muswè kwakulaku neenù bânà bèètù bwà nwikalèku batwishùbwe ne nudi bacyumvwe. “Mmunyi—mmunyi—mmunyi mùdi wenza, mwanèètù?” Nwamònu's, mêmè's ncidi ànu mupile. “Uh, ndi—ndi ne disànkà bulelèlèlè dya ne ndi—ne ndi ànu umwe wenù. Ndi—ndi—ndi ne disànkà dyàbùngì, nudi numòna's.” Èyo. Mpindyewu, paanyimà pàà katanci, ncinyi's? Ndi mumanye ne nudi ànu kacya nwantàngila mêmè ne bamanye ne ncidi ànu ngenza bintu, mucikàle ànu ngenza bintu byà bukooya bwà pa buloba pa bwalu abu.

⁷⁸ Paanyimà pàà katanci mêmè kusukudiibwa. Mpindyewu cintu kampànda ncyenzèke, ndi mujidiibwe. Ndi mwà kunùtàngila buludi mu mpàla, ndi umwe wa ku nwènù. Nwamònu anyi? “Èyo, mwanèètù. Nzambi àtumbè! Ndi ne disànkà dya kwikala mu kasumbù kàà beena Nyumà Mwîmpè aka. Ndi ne disànkà dya kwikala munkaci mwènù nwènù bânà bèètù bàà cijila.” Bwà cinyi? Kwena mwà kumfunkunà mêmè munu to, ndi musukula. Kàdi mpindyewu Nzambi neantèèkè ku mudimu. Mpindyewu, èyowà's, mukalenge!

⁷⁹ “Mwanèètù Branham, uvwa mubingishùbwe anyi?”

⁸⁰ “Èyo! Ndi mvùluka pâmvwà ne lutatu lwà nciyi mwà kukutàngila nànsha kakesè to. Mwanèètù, ndi mwà kukutàngila mu mpàla mpindyewu.”

⁸¹ Nwamònu's, s'ki bwalu abu's. Mpindyewu, cikwàbò eci ncinyi? Mpindyewu nêngiikalè mwà...*Ewu* mmusukula ne mutèeka ku luseke *bwà* mudimu, ne *ewu* ùbwela *mu* mudimu. Mpindyewu twètù bônso tudi bamanye ne mwàkù *kujidila* mmwàkù wà cyena Ngelika, mwàkù mulamakaja wà cyena Ngelika ùdi umvwija ne “musukula, ne mutèeka ku luseke bwà mudimu.” Mabùngù àvwa makezùdiibwe ànu kùdì cyoshelu, ne

majidila kùdì cyoshelu ne matèèka ku luseke *bwà* mudimu. Kàdi kwikala *ku* mudimu nkwikala muujìlbwe ne mutèèkiìbwe ku mudimu.

⁸² Mpindyewu, ndi ntwá kuntu eku ne mpindyewu ndi ndwa mbwela *mu* mudimu. Mpindyewu, ùwá n’Nzambì wákankùdimuna, wàmba ne: “Ntèèleje Mémè. Ntèèleje Mémè! Ntèèleje Mémè!” Ki Yèyè kwamba. . .

⁸³ Nudi bumvwe cìndì muswè kwamba aci anyi? Nwamònu anyi? Nènku apa, [Mwanèètù Branham ùdi ùfwànyikija muntu kampànda udi wakula mu myakulu—Muf.] . . .? . . .Nwamònu’s, mwab’ewu, udi ànu mùle tètè menemene mu mùshindù wa wèwè. . . Ki cyòci aci. S’ki bwalu mbwòbù abu, s’ki dyakula dyà mu myakulu ndyàdi.

⁸⁴ Nènku ndi ngiitabuujá nùnku mpindyewu: Ncyèna ngiitabuujá ne dyakula dyà mu myakulu ncileeeji kampànda cyà Nyumà Mwímpè to. Kì mmwòmò to! Bwalu nkaadiku mumòne baloji bakàji, baloji balùme, bakwàci bàà nyoka ku byanza, badémóns, ne bikwàbò byònsò byàkula mu myakulu, nènku kí ncyenzedi cìdì kaciyì mwà kupangila cyà Nzambì (paùdì wakula mu myakulu) ne udi ne Nyumà Mwímpè to. Kàdi, vùlukààyì ne, Nyumà Mwímpè ùtu bushùwà wàkula mu myakulu ne dyabùlù ùdi mwà kucitentula.

⁸⁵ Ci—cileeeji cyà ne wèwè udi ne Nyumà Mwímpè nsòmbelu wùdì usòmba, nwamònu’s: “Ku mamuma àbò nkunwàbàmányina.” Ne mamuma à Nyumà kaèna (kwakusanga mwaba nànsha ùmwè mu Mifundu) dyakula dyà mu myakulu to. Mamuma à Nyumà adi dinanga, disànkà, diitabuujá, mwoyi mule, bwímpè, bupoleè, kalolo, lutùlù. Nwamònu’s, mpindyewu, ki mamuma ngwòwu awu. Ki cyùdì usangana ku mucì bwà kwamba ne ewu mucì ngwà mùshindù kaayi. Nwamònu anyi?

⁸⁶ Ke cìdì bantu batàngile kunùdì nwènù bayiishi, ne kunùdì nwènù balami, ne nwènù balubuludi, ne nwènù batangadiki. Udi mufwànyine kwakula mu myakulu pambelu apa mu mùsèèsù emu ditùkù dijimà bulubulu, kí mbafwànyineku kukwitabuujá nànsha. Kàdi enda lwendu lwà byùdì wakula abi, uleeja bupolè, ne miji yònsò yà bululu mipàtuke munda mwèbè, dìbà adi muntu neáfike ku dymvwa ne kùdì cintu kampànda.

⁸⁷ “Dyakula dyà mu myakulu.” Mpindyewu, mémè ntu ngiitabuujá eci bulelèlè, bwà ne musangu mukwàbò, ne muntu mùle tètè ne Nyumà udi musòmbe mwinshì mwà cyoshelu cyà Nzambì neàkule mu myakulu. Kàdi nkaadiku mumòne bààbùngì bààkula mu myakulu bàtu kacya kabàyìku bamanye kantu nànsha kàmwè pa bwalu bwà Nzambì to. Nwamònu anyi? Kabàvwaku bamanye kantu nànsha kàmwè bwà bwalu Bwèndè to nànsha kakesè, kàdi baciikale ànu bààkula mu myakulu.

Dyônsò dyà ku mapà awu òdi mwà kutentudiibwa. Nwamònu anyi?

⁸⁸ Kàdi mamuma à Nyumà adi àjaadika cidi Nyumà udi munda amu, udi ufila bujaadiki bwà Mwoyi wà Yesù Kilistò. Bwalu kwòkò kwikale màyi à mucì wà pêches mu mucì wa pommes, s'newùkwame ma-pêches ànu mudibi bulelèlè ne buloba bùdikù emu. Ncyà bushùwà. Nwamònu's, bwalu's ki mwoyi ùdi munda mwawù amu.

⁸⁹ Mpindyewu, ke cintu cìmwècìmwè cidi mwab'ewu eci. Kàdi mpindyewu, bwà mèmè kunufikishilaku nwènù bônsò cintu eci, bwà twamòna bônsò mwà kumanya cintu cìmwècìmwè eci. Ndi ngiitabuuja ne muntu mùle tètè ne Nyumà ùdi. . . Mpindyewu ùdi ùbwela mu Kilistò ku dibàtiiza, ne ànu. . . aci kacýena. . . Dyakula dyà mu myakulu kí ncileeeji cyà dibàtiiza to. Nwamònu anyi?

⁹⁰ Dibàtiiza, ùdi mufwànyine kubatiijiibwa mu bukolè bwà dyabùlù, ne kwakula mu myakulu ne dibàtiiza dyà nyumà mùseeswishi wa dyabùlù. Mmisangu búngì kaayi yitùkaadiku bacimòne cyenzèke? Mmisangu búngì kaayi yínkaadiku mèmè ewu mucimòne cyenzèke?

⁹¹ Ntu mene mumanye ne bôbò bàtù bànwina mashi mu kabalubalu kàà mutù wà muntu ne bàakula mu myakulu.

⁹² Mwva mumòne bajì bàà maja à nyoka mu cipèèlè pàvwàbo badijìngile nyoka munène ewu mu cimònù benda bàakula. Mpàkààmàngà ùvwa ùpàtuka mùshindù awu, ne bôbò bàvwa mwà wakula mu myakulu ne bayàndamuna.

⁹³ Mwva nsanganyiiibwa mu bituudilu byàbò byà beena manga muvwabo batèeka crayon panshì mùshindù ewu, ne batèeka mukàndà kampànda panshì mùshindù ewu, ke crayon kubànda kupweka pa lubungu lwà mbàbùlà, wimba ne: “*Dikungula ne dikosa dyà nsuki, bicyelè bibidi,*” ne ùfùnda mu myakulu myenyi, nènku muloji mulùme ùvwa ùcyùmvwija ne wàmba menemene cìvwa cyenzèke. Ndi—ndi mumanye aci mèmè mwine. Nwamònu anyi? Pa nàнку ndi. . . Nwamònu's, kanwèna mwà. . .

⁹⁴ Pòlò wàkamba ne: “Mwaba ùdi myakulu, neyijikè. Mwaba udi bipròfetà, nebipangile. Mwaba ùdi mapà wònsò aa, neàjikè àbìdi àdi panshì aa.” (Tudi ne lukonko alu kumpàla eku.) “Kàdi pàlwà cipwàngàne aci, cyà citùpà necijimine.” Nwamònu anyi? Pa nàнку tudi baswè cintu cipwàngàne, bàna bèètù. Nwamònu anyi? Tudi bamòne bintu bipitepite búngì byà mafi ne biikale bifila dyumvwija dyàci dibì.

⁹⁵ Nènku kukungamanganyiku ne muntu ne—ne kwitabuuja ne ùdi ne Nyumà Mwimpè bwalu ùdi wàkula mu myakulu to. Nwamònu anyi? Kàdi udi witabuuja ne ùdi ne Nyumà Mwimpè bwà mamuma àdiye ùkwama, bwalu Yesù wàkamba ne: “Ku mamuma abo ki kunwabamanyina.” Nwamònu anyi? Ncyà bushùwà ne: “Ku mamuma àbò.”

⁹⁶ Mpindyewu, kàdi mpindyewu, ncìikadi nguumuka ku cyôci eci mpindyewu to, bwalu ncyêna muswè kupwekesha dipà dinène didi Nzambì mufile edi milongo to. Nwamònu anyi? Ne mémè ndi ngiitabuuja ne muntu mulùme anyi mukàjì udi mùle tètè ne Nyumà, anyi mwànà, udi musòmbèle mwinshi mwà cyoshelu cyà Nzambì, kàakushààlamu ntàntà mule kàyì mwakule mu myakulu to. Nwamònu anyi? Mémè ndi ngiitabuuja ne yèyè mulùme awu neàcyènzè, anyi mukàjì awu's.

⁹⁷ Mpindyewu, udi mwà kupeta Nyumà Mwîmpè kàdi pàmwãpa kùyì mwakule mu myakulu paùdi muMupete to. Nwamònu anyi? Kàdi wèwè mushàale cikondo cyònsò kumpàla kwà Nzambì dîbà dyònsò, ne dibàtiiza ku dibàtiiza dyènda dikutuuta, cintu kampànda necìikale mwà kwenzeka. Nwamònu anyi? Neùjiibwe dîngà ditùkù mu mùshindù wà kùyì mwà kwakula cîngà cintu to; nwamònu's, udi—udi—udi uteeta kwamba cintu kampànda, kuciyi ànu mwà kucyàmba kàbidì to, ne kuyì ànu mwà kucyàmba to. Nènku misangu yàbùngì bu bantu mwà kufika ku dyumvwa ne cívwa n'Nyumà Mwîmpè nùku mbatùngùnùke ànu ne kukangula mwoyi wàbò awu bwà kulekela Nzambì wakula naabò.

⁹⁸ Bible mmwambe ne: “Ne mishikù yìdì yìkukuminà ne myakulu mikwàbò ki mmungààkwilà ne cisàmbà eci.” Yeshàayi 28, nwamònu's, 28.18. Mpindyewu ne: “Ne mishiku yìdì yìkukuminà ne myakulu mikwàbò ki mmungààkwilà.”

⁹⁹ “Dikukumina” ncinyi's? Muntu udi kàyì mwà kwakula mu mùshindù wà mujikùke, utungunuka ànu ne: “Huh, uh, huh, uh, huh, uh, huh.” Udi ànu . . . udi ukukumina, uteeta ànu ne: “Huh, uh, huh.” Nwamònu's, ànu mùle tètè menemene ne Nyumà's! Ùdi munkaci mwà kuteeta kwamba . . . Byenze bu mùmvwa mwà kwamba ne: “Mwanèètù Ja-Jack- . . . Ja- . . . Mwanèètù Jack- . . . Mwanèètù Ja-Ja-Jack-Jack-Jackson.” Nwamònu's, mmùshindù awu, udi uteeta kwamba, kùyì mwà kucyàmba to. Nwamònu's, mbwena kwamba ne, mùle tètè menemene ne Nyumà! Cidi . . .

¹⁰⁰ Ndi muswè kunùkonka nwènù bânà bèètù, kacya ukaadiku muumvwè Nyumà Mwîmpè ukunyukulula bibì be mu mùshindù wà kùyiku mufwànyine kwamba kantu nànsha kàmwe to, mufwànyine ànu kushààla musòmbè mupuwe mûngà musangu, kacya ànu wasòmba mwab'awu ne udila ànu mwadi? Nukaatuku benze nànkù anyi? Èè, aci's n'Nyumà Mwîmpè. Bu nwènù mwà . . . Cidi cyènza ne bantu kabèèna bààkula mu myakulu misangu yàbùngì, ki mbamanyè mùshindù wà kudìlekelela bwòbò biine kùdi Nyumà to kàdi bàdi bakeba cintu kampànda kùngà pààci pambidi pààbò mene's. Nwamònu anyi? Ki bwà cinyi kabèèna . . .

¹⁰¹ Nènku dîbà adi bângà bantu bàdi bàditwa mu disaluka ne bàmba mèyì àbùngì àdi kaàyì ne cidìwu umvwija to, kàdi kabàyi ànu ne Nyumà Mwîmpè to, kàdi bàteeta kwamba mùdìbo

nèndè bwalu mbaakùle mu myakulu. “Ku mamuma àbo ki kunwàbàmanyina,” nwamònu’s.

¹⁰² Mpindyewu, kùdi lukonko anyi? [Mwanèètù Junior Jackson ùdi wamba ne: “Mwanèètù Branham?”—Muf.] Èyowà’s, mwanèètù. [“Ndi ne disànka mùvwa lukonko alu lwediibwe, bwalu kakùyì mpatà to bângà bàvwa mwà kudikonka cìndi pàmwàpa mwiitabùùjè ne mulongèshe kukaadi ntàntà mule. Kàdi mèmè ndi nciitabuujà ànu bu mùtù mucilongeshè.”] Twasàkidila, Mwanèètù Jackson. [“Nànsha mèmè mwakule mu myakulu misangu bùngì kaayi, anyi ni ncinyi cyònsò, piikala nsòmbelu wanyì kàyì ufila bujaadiki bwà cidi Bible wamba to díbà adi ncyèna mwìmpè kupita mbwa wa cyanààna udi utàmbakana mu mùsèèsù ewu to.”] Ncyà bushùwà. [“Ne kacya ncìvwakù mwanji kwakula mu mwakulu mwenyi to ànu munda mwà ngondo yisambòmbò paanyimà pàà mèmè mumane kupeta dibatiiza dyànyì.”] Ki mùshindù mene wùmvwà mucyènzè ngwòwò awu, mèmè pàànyì, Mwanèètù Jackson.

¹⁰³ Mèmè kupeta dibatiiza dyà Nyumà Mwìmpè mu kaacitanda kàànyì amu, nwamònu’s. Nènku bu paanyimà pàà cidimu cijima nàнку awu, anyi cintu bu nàнку awu, mèmè—mèmè. . . kwakula mu myakulu.

¹⁰⁴ Nènku bu cidimu cijimà anyi bìbidì nàнку awu paanyimà pàà cyòci aci, mvwa nyiisha cyàkàbìdi mu èkèleeziyà kampànda, nènku mvwa—mvwa mwimàne pa cibumbà cyà ku cyambilu mùshindù ewu, ki mèmè. . . Pàncìvwà mwànà mutekète ne nciyi mukàyàpàle ne mukùlàkaje bu mùndì mpindyewu emu to, Mvwa mwà kutàmbàkana bìmpè ndambu ne mvwa ne disaluka dyàbùngì mu kuyiisha. Mvwa mwimane mwaba awu nyiisha ki mèmè kutùpikila ànu pa cibàsa. Cìvwa mmu èkèleeziyà kampànda wa ba-Baptistes, mu èkèleeziyà wa ba-Baptistes wa mu Milltown, ki mèmè kupweka buludi mu kajila amu, ngenda nyiisha ne mwanyì mwònsò mùmvwà mwà kuyiisha mùshindù awu. Nènku ndi mwenze ànu ngiimanyika kuyiisha, Cintu kampànda cìvwà cintuntùmune cimfikishe ku dyamba mèyi ndambu, mèyi anaayi anyi ataanu, anyi àsambòmbò, mu myakulu myenyi. Nènku kumpàla kwà mèmè kumanya cìmvwà munkaci mwà kwenza, Mèmè kudyumvwa mèmè mwine ngeela lubila ne “Lubwebwe mu buloba bùme, Ciikishilu mu cikondo cyà mvula wa cipupu.” Nwamònu anyi?

¹⁰⁵ Ki pashiishe ditùkù kampànda ngenda mpweka ne njila wa njanja, mvwa ngènda ndonda njila wa njanja, dyàmuneemu dyà Scottsburg, ngènda mpweka ne njila wà njanja, ngènda nkòntonona. Mpeepèlè yìtuuta bikolè, kaa, ekèlekèle, ne mabwe à mashika mabwikile mu njila mujimà amu, ki mèmè kusambuka bwà ngaamòna mwà kupweka ne binunu byànyì makumi asatu ne bisatu abi’s; makumi àsambòmbò ne bisambòmbò bìvwa bibànde lukwàbò luseke, byenzè bu bilondàngàne ne njila awu’s. Nènku mvwa ngenda mpweka ne njila, nènku

dyàkàmwè. . . Mvwa ngenda nya kuntwaku, mvwa ngimba misambu. Mvwa misangu yònsò ànu ngimba misambu. Mvwa ne myaba mishilleshilàngàne yimvwa nya kasambila. Nènku mvwa ngenda nya kuntwaku, ngenda ngimba, nènku dyàkàmwè mèmè kulwa kujandula ne mvwa ngàakula mu myakulu, nwamònu's, ncíyi mumanye címvwà ngènta to.

¹⁰⁶ Kwakula mu myakulu kùtu kulwa ne ditùtula mu mùshindù wà muntu kàyì mwà kumanya cidíye munkaci mwà kwenza nànsha, anyì, kí mbamanye cidìbo munkaci mwà kwamba aci to. Ne dyandamuna ncintu ànu cimwècimwè aci. Ki mbamanye ciikalàbo mwà kwamba to. Kabèenaku kàbìdì ne cingenyingenyi cyà ne nebàmbè cyòcì aci to, bwalu ncitàmbe mfukilu. Nwamònu's, panùdì ànu nubwejamu cyà mu bufùki pa díbà adi kanwèna. . . nudi—nudi—nudi ne cyà mu bufùki, nudi numòna's. Kàdì cintu kampànda cyòcì ànu cikubàkule ne cishààle cikukwàte, nènku udi ucyènta. Nwamònu anyì?

¹⁰⁷ [Mwanèètù Neville ùdì wàmba ne: “Mwanèètù Branham, ndiku mwà kwambaku cintu kampànda mwab'ewu mene anyì?”—Muf.] Bushùwà, udi mwà kucyènta, Mwanèètù Neville. [“Mpindyewu, paùdì ucyàmba mùshindù awu, kwèna ne meeji à kwamba ne, nànsha nànkù, ne—ne myakulu yivwa ne cyà kwikala mu bulongame mu disangisha bu ne muntu kàvwa mwà kuyìkòntonona anyì? Bwalu yèyè ùdì mwà kuyìkòntonona. . . Muntu udi ne dipà ùdì ne cyà kwikala ne bukòntononyi bwàdì.”] Yèyè ùdì mwà kudìkòntonona yèyè mwine. Eyowà. Ànu bu. . . [“Udi ne cyà kwikala mutwishìibwe menemene bwà kumanya ne ùkaadi pa kwakula mu myakulu”] èyowà's, ncyà bushùwà [“anyì kèna mu bulongame to ànu kwine kwònsò aku.”] Ncyà bushùwà, yèyè ùdì ucyùmva. Nwamònu anyì? Mpindyewu, bu mùdì Bible mwambe ne: “Kwòkò—kwòkò kwikale muntu wàkula mu myakulu cibi kakùyi mwandamunyi to, nànkù àpuwè byàndì.” Mpindyewu, mu bushùwà bwà bwalu.

¹⁰⁸ Twànjìbì kwamba, cileejilu, nyewu ndi mwimane mwab'ewu, muntu kanà yònsò ewu, paùdì mudilongolole bwà kwela mbila, ncintu cimwècimwè aci. Nukààdiku bumvwe bukolè bwà Nzambì bulwe pambidi pèènu panùdì nubanga kwela mbila anyì? Mbanganyì bàkaadiku benze aci? Èè, twètù bònsò tukàadi bacyènze. Nwamònu anyì? Udi wèwè musòmbe ànu mwaba awu, umvwa mùdici cìlwa. Mpindyewu, kùdì misangu yinùdì mwà kukanda cyòcì aci, nwamònu's. Udi mwà kucikwàta, wamònu's, kí ncyakàne to.

¹⁰⁹ Kàdì amba tǔng bu ne wèwè uvwa mwimane, uyiikila ne Mfùmù wa—wa ditùnga dyà États-Unis, anyì ne uvwa mwimane pambelu apa mwikale uyiikila ne mulombodi wa cimenga, nènku biikale nuyiikila bwà cintu kampànda cikwàbò, ànu lwà mu mùsèèsù emu, nuyiikila ne musùmbà wà bantu, ne dyàkàmwè wèwè kudyùmva ànu bu ne udi mufwànyine kutupika kuya muulu ne kudilekelela panshi, kwela mbila

mikolè ne kwela mikunda ne “Butùmbi! Àlèluuyàh!” kàdi kudituuta ku bintu byònsò ne kubànda kupweka ne mùsèèsù mùshindù awu. Mbafwànyine kwamba ne udi mupàle. Nwamònu anyi? Mbafwànyine kwamba ne: “Muntu wàwa mmupàle.” Nwamònu anyi?

¹¹⁰ Èè, nwamònu’s, s’udi mumanye bîmpè ne kí ncyùdì ne cyà kwenza to dîbà adi. Udi ucilama, nànsha mùdici ànu munkaci mwà kukusunsuma munda ne bikukolela bwà kucilama. Wèwè udi wamba ne: “Èyowà’s, mukalenge. Èyowà’s, mukalenge. Uh-huh. Uh-huh. Èyo. Èyowà’s, mukalenge. Uh-huh.” Mwabilaayi, pààci ànu munkaci mwà kwènda kukusunsuma kàdi udi mumanye mwà kutùukija bwà dîbà adi. Nwamònu anyi?

¹¹¹ Byenze bu mu nzùbu wa tubàdì kaaba aka ànu matùkù mashààle aa, bàvwa ne beena Mpenta kampànda balwe bwà—bwà kwenza cintu kampànda, bèla mbila mikolè menemene anyi cintu kampànda, bàvwa ànu—bàvwa ànu ne bukenji bwà kucyènza, nudi numòna’s, mmwòmò. Kàdi musangu wònsò wùvwà nzuji awu mufwànyine kutwàdija kwakula anyi bwà kubàmbila cintu kampànda, bóbò’s bàvwa mwà kwakula mu myakulu. Nwamònu anyi? Nzuji kwambaye ne: “Umushaayi bantu bapàle aba mwaba ewu.” Nwamònu anyi?

¹¹² Mpindyewu, bu ne kùvwakù dyandamuna kampànda dyà yòyi myakulu ayi dyàmbara nzuji awu ne “EMU MMÛDÌ MUKALENGE WÀMBA,” *cintu kampànda* cìvwa cìfwànyine kwikala cìlèlèlè cyà ne: “EMU MMÛDÌ MUKALENGE WÀMBA! Nzuji, cyùdì mwimànyine apa nùku ncinyi wundumbulwisha pàuvwa dilòdòlò dishààle mukalàle ne ndumbà? Dìna dyèndè ùvwa Sally Jones, mmusòmbèle ku nombà 44 wa Mwaba *kampànda-kansanga-kankenga*, mùshindù awu. Udi undumbulwisha bwà cinyi? Aci ng’EMU MMÛDÌ MUKALENGE WÀMBA! Mpindyewu vilabi aci kàdi kùyi mukùlùke panshi mufwe nkeme.” Mpindyewu, kaa, mwanèètù! Kùdi cintu kampànda cishiilàngàne apu.

¹¹³ Kàdi pàudi ànu ujuuka cyanàànà wakula, ne yèyè wamba ne: “Udi musenji bwàbò bóbò.” Nudi numòna anyi? Mpindyewu, nudi bamanye dîbà dyà nwènù kushààla bapùwe ne dîbà dyà nwènù kubenga kushààla bapùwe. Nwamònu anyi? Mpindyewu, aci’s cìdi. . . Nwamònu’s. Ndi. . . Nudi numpeta buludi mpindyewu’s, nudi bamanye cìndì muswè kwamba aci. Nwamònu anyi? Mmwòmò. Cyà bushùwà. . .

¹¹⁴ Tudi ne lukonko alu lwà kwinshi eku mene. Kabingila kàdi kènza ne ngiikalè mulùlamè mùshindù ewu, mbwalu tudi ne cintu cìmwècìmwè aci ne: “Mbenzèjìbwe bwà kupùwa anyi?” Nudi numòna anyi? Ki bwà cinyi ncyèna mutambe kulwandàmuna kupita cinùvwà nwènù nwamba aci. Kàdi’s ki cikondo ncyòci aci, cyà kulwandàmuna mpindyewu, nwamònu’s, mpindyewu mene. Nènku netùcipetè kàbìdì mu lukonko lùdì

kwinshì eku nùnkù, ne nentapèku ànu dísù. Bantu bônso mbuumvwè lukonko alu bîmpè anyi?

[Mwanèètù Fred ùdi ùkonka ne: **“Mwanèètù Branham?”**—Muf.] Èyowà’s, Mwanèètù Fred. [**“Muntu udi—udi wàkula mu—mu Nyumà, ùdiku upatula dīyi ne (twāmbebi ne mmwena Angleterre ne mmufwānyine kwakula Anglais) ne Nyumà udi mwà kumufikisha ku dyakula anyi?”**]

¹¹⁵ Cyà bushùwà’s. Èyowà’s, mukalenge. Nwamònu’s, bwalu Nyumà Mwîmpè udi wakula mu mwakulu ne mwakulu wónsò. Nwamònu anyi? Mu Ditùkù dyà Mpenta mwakulu wónsò ùvwa mwinshi mwà Dyulu awu ùvwa mudisangishe, nwamònu’s. Kwakula mu Anglais. . . Mpindiyewu, ntu misangu yónsò ànu mumanyè cyòci eci, Mwanèètù Freddie, mèmè mwine, ndi. . . piikalàbi ne nkààdikù muyiishe diyiisha kampànda diikale ne dilaabiibwa kampànda, n’Nyumà ngutu ufila cyà kwamba, nudi numòna’s. Cidi. . . Nwamònu anyi? Pa nànkù aci ncifwānyine kwikala mwakulu mwenyi kùdi muntu uvwa kàyì muumvwè Anglais to. Kàdi nànsha nànkù. . .

¹¹⁶ Nènku ànu mùdì mwakulu mwenyi kawùyi ànu mwakulu “mwenyi” amu, cidi. . . kudi muntu kampànda muntwamu. . . Byenze bu mu Ditùkù dyà Mpenta, bàakamba ne, bangènzàmpèkààtù bônso aba, kwambabo ne: “Mmunyi mutùdi tuumvwa muntu ne muntu mu mwakulu wètù twètù? Mmunyi mutùdi *tuumvwa* beena Ngalèla aba bàakula mu mwakulu wètù twètù?” Kakùvwa “cyenyi” bwà bwalu abu to nànsha kakesè. Cintu pààci ne myakulu “myenyi” ku Mpenta kacitukù to. Mpindiyewu, nwamònu’s, aci kī ncyà mu Mifùndu to nànsha kakesè. Nwamònu anyi? Kakùvwa myenyi to. . . kacivwa mwakulu mwenyi to, cìvwa mmwakulu. “Mmunyi mutùdi tuumvwa muntu ne muntu mu mwakulu wètù sungansunga wà ku dibèèle?” Kakwèna cintu cidi cyenyi pa bwalu abu to nànsha kakesè. Nwamònu anyi? Aci. . . kùdiku lukonko kanà lwónsò pa bwalu abu mpindiyewu, ànu mpindiyewu mene kumpàla kwà twètù kulùshiyà anyi? “Mmunyi mutùdi tuumvwa muntu ne muntu mu mwakulu wètù twètù?” Nwamònu anyi?

¹¹⁷ [Mwanèètù wa balùme kampànda ùdi wàmba ne: “Ki—ki mwaba ùdi cilema cikesè bwà butekètè bwà buntu, ne piikalà bantu mwà—mwà kupangila bwà kwitaba cintu kanà cyónsò, bamba ànu ne: ‘Ncyàkucitabuujakù mu mungà mùshindù to, ànu bilondèshile Byenzedi 2.4.’”—Muf.] Èè, piikalabi ne bàvwa naaci bilondèshile Byenzedi 2.4 ncyà bushùwà ne kabàvwakù mwà kwakula mu mwakulu mwenyi to. [**“To, mu mwakulu.”**] Uh-huh. Bivwa bikengela bwà bóbò kwakula mu—mu mwakulu uvwa bantu bàbàteeleja awu, nwamònu’s, bwalu “muntu yónsò ùvwa ùmvwa mu mwakulu wèndè yéyè mwine.”

¹¹⁸ Mpindiyewu, mèmè mupete Nyumà Mwîmpè mpindiyewu

mene, bilondèshile...ndi ngàmba...Ngeela meeji ne kùdi mwanèètù wa balùmè kampànda mwaba ewu ùdi ùkeba Nyumà Mwîmpè, mwine awu's ki—ki—ki Mwanèètù Wood. Mmwômò anyì, Mwanèètù Wood? Ncyèna ne meeji a kukwela patòòke to, kàdi bônso...tudi ànu bânà bàà muntu mwab'ewu ne tudi baswè kwamba nànkù's. Ne yêyè ùdi munkaci mwà kukèba dibàtiiza dyà Nyumà Mwîmpè. Mpindyewu, bu Mwanèètù Banks mwà kupeta Nyumà Mwîmpè mwaba awu, mùshindù mujaalàme, bu yêyè mwà kuMupeta bilondèshile Bible, ùvwa mwà kujuuka mwaba awu, kucyàmba, ùvwa mufwànyine kucyàmba mu Anglais, wàmba ne: "Yesù Kilistò Mwànà wa Nzambi mmubiike ku lufù," ùvwa ùcyàmba ne cipròfetà cyà kapyà cidi cicyamba. "Ndi mumanye ne ke cidiYè, bwalu Yèyè mubwele ànu mu mwoyi wànyì. Yèyè ùdi Mwànà wa Nzambi! Mpèkaatù yànyì yìkaadi miyè, kùdi cintu kampànda cidi cingenzèkèle." Nwamònu anyi? S'ki bwalu mbwòbù abu. Aci's ki kwakula mu... .

"Mmunyi mutùdi tuumvwa muntu ne muntu mu mwakulu wètù twètù?"

¹¹⁹ Ambàayibi tǔng, bu ne twètù beena Indiana aba tuvwa twakula mwakulu mushiilàngàne ne wà beena Kentucky, ne Mwanèètù Banks ewu mwikale mmwena Kentucky? Nènku bààkula mwakulu mushiilàngàne dībà adi, nènku mwab'ewu twètù bamanyè ne kàvwakù mwà kwakula mu mwakulu wa mu Indiana to. Ki pashiishe kujuukaye mwaba awu wàkula mu—mu mwakulu wa mu Indiana, ne twètù bamanye ne kì mmuwumanyè to. Nwamònu anyi? Nènku twètù tumuumvwa mu mwakulu wa mu Indiana, yêyè wela meeji ne ùdi wàkula mu mwakulu wa cyena Kentucky. Udi ànu ùfila bujaadiki cyanààna ne: "Nzambi àtumbè! Yesù mmubiike ku bafwe. Àlèluuyàh!" kàdi tudi tumuumvwa mu mwakulu wa mu Indiana.

¹²⁰ Ke mùshindù awu ùvwàbi mu Ditùkù dyà Mpenta. Nwamònu anyi? "Mmunyi mutùdi tuumvwa muntu ne muntu," nwamònu's, "mònaayi, bônso bàdi bààkula aba kì mbeena Ngalela anyi," nwamònu's, ki mbeena Kentucky anyi? "Kàdi mmunyi mùdibi ne twètù beena Indiana, beena Ohio, ne beena Illinois, ne beena Maine, ne beena Massachusetts, ne beena Californie, tudi tumutèeleja mu mwakulu wà ku dibèele?" Nudi bumvwe mmwenenu awu anyi? Nwamònu's, ndisonsodiibwa. Nwamònu's, ndisonsodiibwa bwa bóbò kuumvwa, ndisonsodiibwa kùdibò.

¹²¹ Nwamònu's, mukenji...bwalu bùdi ne, mbujaadiki bwà dibiiikà dyà Yesù Kilistò ku lufù. Nwamònu's, ncyà bushùwà. Mpindyewu, piikala Nzambi kàyì ne Nsòmbelu awu munda mwèbè to, nànsha wèwè uMufidila bujaadiki bishi, kwena ànu mwanji kuMupeta to. Nwamònu anyi? Ncyà bushùwà. Nànsha mùdi... .

¹²² Kùdikù lukonko lukwàbò mpindyewu anyi? [Mwanèètù Roy

Roberson ùdi wàmba ne: “Èè, Mwanèètù Branham, ngeela meeji ne tuvwa bamòne aci cyènzeka mu mulongo wà babèèdi, mwànà wa bakàji wa cyena Espagnol awu.”—Muf.] Èyowà. Bîmpè be, Mwanèètù Roy. Kuvwa ku—ànu ku mwaba mene kûnyaayà mpindyewu ewu eku, ku Beaumont—Beaumont. Cìvwa m’Beaumont anyi? Èyowà’s, mukalenge.

¹²³ Mpindyewu, mulongo wà babèèdi wakiimanyikiibwa. Kuvwa kânà kàà bakàji katekète kàà cyena Espagnol kààkabànda pa cibumba cyà ku cyambilu apu. Èè, bwà kwamba menemene, ngeela meeji ne nkaavwa mpatuka’s, kî mmwômò anyi? Howard ùvwa munkaci mwà kupatuka naanyi, nènku—nènku ewu. . . Mêmè—mêmè—mêmè kuumvwa muntu kampànda udila mwadi, ùvwa mmwànà wa bakàji mutekète wa cyena Espagnol mwaba awu, kaa, wa bidimu bitwè ku dikumi ne bitaanu, dikumi ne bisambòmbò, anu. . . mucikàle ànu mwànà’s. Nènku—nènku ki mêmè kutàngila, ne ùvwa ne cyà kwikala ne kartà kàà disambila kàvwa kalonda bu mêmè mwà kwikala mutùngùnuke. Mvwa ne musùmbà wa bantu kuulu kwaka, ùvwa mwà kwikala ne karta kàà disambila kàvwa kàlonda aku. Mêmè ne: “Lwâyì nendè.” Ki kulwabò nendè. Mvwa ne cyà kuya ku disangisha dikwabò, ki mêmè kwamba ne: “Lwâyì nendè.”

¹²⁴ Pa nàнку, mêmè kufika ku dijandula ne, mvwa mumwambile cintu bu nùнку ewu ne: “Mpindyewu, udi muswè kwitabuuja anyi? Bu Yesù mwà kunkwacisha bwà mêmè kukwambila cidi cikutacisha aci, newitabuuje ne—ne Yèyè neàkwondope anyi?” Ki kushààlaye ànu kacya winyika mutù wèndè panshi. Mêmè kudyàmbidila ne ùdi ne cyà kwikala mpudimaci ne kamàmà. Nwamònu anyi?

¹²⁵ Nènku ndi mwenze ànu ntàngila cyàkàbìdi anyi, mêmè ne: “To, kèna ànu mwà kwakula Anglais to.” Ki kulwabò ne mwandamunyi kampànda mwaba awu, ki mêmè kwamba ne: “Newitabuuje anyi?” Ki yèyè kunyukushaye mutù bwà. . . Dìbà adi ùvwa mwà kuumvwila kùdi mwandamunyi, mu bushùwà bwà bwalu. Nwamònu anyi?

¹²⁶ Èè, ki mêmè kwamba. . . Ki mêmè kutàngila e kumòna cìkèèná-kumòna. Mêmè kwamba ne: “Ndi nkumòna wèwè musòmbèle lwà ku mafùwà à cyena kale ne lwesu lunène lulebelejapù, lùle tèntè ne milungu yà matàlà à kalaabi. Wèwè mu-. . .” Udi muvùlùke aci anyi, Mwanèètù Roy? Mêmè ne: “Wèwè kudya matalà awu kupicisha. Nènku pawàkadyà nàнку awu apu, wèwè kumbà kukuluka mu disaamà dikolè ne mamwèbè kakulàadika mu bulàalu wèwè kumba kubanga kupaluka ciseki.” Ki mêmè ne: “Wàkabanga kusaamà ciseki ànu piine apu.”

¹²⁷ Ki pashìishe kukùdimukaye kùdi mwandamunyi awu ne kumwambilaye mu mwakulu wèndè yèyè mwine, “Mvwa ngeela

meeji ne kàvwa mwà kwakula Anglais . . . anyi kwakula ci-Espagnol to!”

128 Ki yèyè kukudimuka kùndi kwamba ne: “Kuvwa wakula mu cyena Espagnol to, kí mmwômò anyi?”

129 Mémè ne: “To.” Ki twètù kutàngila cisanji cìdì cìkwàta mikabà yà mèyi, e kwimanyika bisanji byà dikwàta naabi mikabà yà mèyi, kakùyi mpatà to cìvwa ng’Anglais ànu pa yòyi.

130 Kàdi pashìshe mwandamunyi kwambaye ne: “Wèwè ngambilaaku tũng cìvwaye mwambe díbà adi aci.” Nwamònu’s, bìvwa bikèngela bwà kupetaye dyumvwija. Yèyè ne: “Ngambilaaku tũng cyàmbye’s.” Kàdi mukàji awu kumwambilayè myàkù ànu yìmwèyìmwè ayi, ne kuyìmpatwilayè kàbìdì.

131 Mpindyewu, yèyè mukàji awu ùvwa munguumvwile mu mwakulu wèndè yèyè mwine wà ku dibèèle, pàanyi mémè ngàakula Anglais. Yèyè kucyũmvwaye mu cyena Espagnol. “Mmunyi mutùdì tuumvwa muntu ne muntu mu mwakulu wètù twètù biine wà ku dibèèle?” Nènku mwànà awu wàkondopiibwa. Nwamònu’s, ki cyòci aci, mbyenzedi bìdì bikèmeshà byà Nzambì.

[Mwanèètù wa balùme kampànda ùdi wèla lukonko ne: **“Dìbà adi dibungu didi ne Nyumà Mwimpè munda mwàdi adi kadyàkwikala . . . nedìikale ànu dibungù, ne Ewu udi udyùja udi mwà kudyùja ne cìdìYe . . . ?”**—Muf.]

132 Cyònsò cìdìYe ùjinga aci, ncyà bushùwà. Cyà bushùwà menemene. Nènku díbà adi tàngilàayi nùmonè cìdìdì dyujìibwe nàaci, apu nudi numanya ne nudi ne Nyumà Mwimpè anyi to, díbà adi. Nwamònu anyi? Tàngilàayi ànu cìdìdì dyujìibwe naaci. Pìikalà di—pìikalà dibungù dyujìibwe tètè ne makooyà, nànkù kí ndibungù dyà Nzambì to. Kàdi dyòdì dyujìibwe tètè ne bukezùke, díbà adi ndibungù dyà Nzambì. Nudi buumvwe cìndì muswè kwamba aci anyi? [Mwanèètù wa balùme awu ùdi wamba ne: “Nènku dibungù, kùdi misangu yìkalà dibungù adi mwà kwangaciibwa ku mudimu kàdi kadiyi dimanye to, kadiyi dimanyike ku cikondo cìvwa, cìvwaadi dyangaciibwe ku mudimu aci anyi?”—Muf.] Kaa, bushùwà’s. [Mwanèètù awu ùdi ufila bujaadiki.] Uh-huh. Uh-huh. Ncyà bushùwà menemene, cyà bushùwà. Kaa, twètù bònsò, tudi tumòna aci. Nkaadi mucimòne misangu yàbũngì. Èyowà’s, mukalenge. Èyowà’s, mukalenge. Twètù bònsò . . . Tudi bamanye ne tutu biibìdilàngàne ne bintu abi.

Ngeela meeji ne aci cìvwa nomba mwinàyi: **Bantu bwònsò—bantu bwònsò bàdì bùle tètè ne Nyumà Mwimpè nebàakule mu myakulu nànsha ku tootooto nànsha ku ndandanda anyi? Ndi musangane mwaba wùvwà Pòlò mwambe ne: “Mémè ntu ngàakula mu myakulu yàbũngì kutamba—kubàtamba bònsò.”**

Mpindyewu, cîndi ngeela meeji mpindyewu, bwà kujikija lukonko lwà mwanèètù wa balùme ewu:

Pòlò, wàkula mu myakulu kutàmba bònsò.

¹³³ Pòlò ùvwa muntu wa meeji matwè, ùvwa mumanye myakulu yàbúngì, yèyè mwine. Nwamònu's, ùvwa mwà kwakula ne. . . yèyè. . . Vùlukaàyi pàvwaye mwà kupicila ku cilumbulwidi aci, ùvwa mwà kwakula mwakulu wà mùshindù ewu anyi mwakulu wà mùshindù wàwa, anyi ní mwakulu kaayi wònsò nàka. Nènku ayi's mmyakulu myenyi bwà bantu, kàdi ayi kayivwa myakulu misonsòdùbwe nànsha. Ayi's yivwa myakulu yivwabo bàakula, nudi bamòne's. Kàdi. . . ne. . .

¹³⁴ Kàdi mèmè ndi bulelèlè ngiitabuuja ne muntu mùle tètè ne Nyumà udi musòmbèle mwinshi mwà cyoshelu cyà Nzambi, kakùyi mpatà to, nànsha ku tootoo nànsha ku ndandanda, neàpete dilabula dyà dyakula dyà mu myakulu, bwalu aci's ke cintu cidi citàmbe kwikala cyà milongo mipwekèle ne citàmbe bukesè cidiku bilondèshile dyumvwija dyà Pòlò. Bu nwènù mwà kubitèèka mu bulongame, ki cintu cyà ndekeelu cidi mu mulongo wà mapà, nwamònu's, ndyakula dyà mu myakulu.

¹³⁵ Kàdi mpindyewu, dyàmbedi, nudi babàtùjijibwe. . . Apa, nwènù bònsò nudi mapà. Mèmè ndi nsanganyiibwa lwà pambelu. Mpindyewu: “Ku Ciibi cimwè, Nyumà umwe,” ku ciibi cimwè nkutùdi tubwelela mu cibambalu *emu*. Ncyà bushùwà anyi? Mpindyewu, ncyèna mwà kubwelela mu *awu* njila to, ncyèna mwa kubwelela mu *ewu* njila anyi mu *wàwa* njila paanyima pàpa to. Nwamònu anyi? Ndi mbwela *mwab'ewu* munyi? Kùdi Mwanèètù Roberson anyi? To, mukalenge. Kùdi, èè, twàmba ne, Mwanèètù Leo anyi? Bwà ne yèyè mmufwànyine kwikala dipà dyà dyakula dyà mu myakulu, nwamònu's, ndi mbwelela ku Leo anyi? To, mukalenge. Huh-uh. Èè, mèmè ndi mbwela bishi? “Ku Ciibi cimwè, ku Nyumà umwe.” Nyumà kèna yònsò ànu myakulu to. To. Nwamònu anyi? Nwamònu's: “Ku Nyumà umwe nkùndi mubàtùjijibwe mu Mubidi ewu.”

¹³⁶ Mpindyewu, *eci* ki Nyumà, *nwènù* bònsò nudi mapà. Wèwè udi wamba ne: “Èè, Nzambi àbèneshiibwè's wè!” Nènyemù, ngamba ne, ki—ki Mwanèètù Wood wàwa, yèyè's mbishimà. Nwamònu anyi? “Kaa, mèmè's mvwa mwenze cishimà. Ndi mumanye ne ndi ne Nyumà Mwimpè bwalu mvwa mwenze cishimà.” Kí nku “cishimà” cimwè kutùdi twètù bònsò babàtùjijibwe mu Mubidi to.

¹³⁷ Pashìshe nya kùdi Mwanèètù Junie, yèyè's ndimanya ne: “Èè, èè, mèmè ndi ne dimanya dyà Bible! Balumyana wa yààya, s'ndi nnwambila's, ndi mumanye ne ndi ne Nyumà Mwimpè bwà bwalu abu.” To, aci kacýèna ànu mùshindù wà kubwela to.

¹³⁸ Èyo. Kí nku Mwanèètù Leo to, kí nku Mwanèètù Wood to, kí—kí nku Mwanèètù Junie to. Nwamònu anyi? To. Kàdi nku cinyi cimwè? [Disangisha didi dyàmba ne: “Nyumà!”—Muf.] Èyo.

Ndi mubàiiijìbwe mu Mubidi ewu, mpindyewu ndi mwômò amu, mpindyewu Taatù neàkwacile naanyi mudimu penyi? Nwamònu anyi? Kwenzekabi ne bìikale Leo uvwa musòmbèle pabwìpì ne ciibi; kakùyì mpatà to eci ncifwànyine kwikala cimwè cyà ku bintu byà kumpàla bìvwà mwà kwenzeka. Kàdi mbifwànyine kubènga kwikala nànkù's. Ndi mwà kwikala mubanjiike bikolè mu Nyumà, mu mùshindù wa ne ndi mufwànyine kuya too ne kùdi Mwanèètù Wood, kucinguluka bikwàbò byònsò abi. Kwèna mwà kungambila mpindyewu ne ncyèna mupete Nyumà Mwîmpè to, bwalu ndi mu Mubidi ewu ku dibàtiiza. Kàdi kacya Nzambì katuku mulwe naanyi mwômò emu bwà kwamba ne: “Èè, Nzambì àbèneshiibwe, ngeela meeji ne mpindyewu nènsòmbelè panshì, kulèngulukakù, nyaya mu Dyulu.” Huh! Nudi bùmvwè cìndì muswè kwamba aci anyi?

¹³⁹ Kàdi mvwa mwà kwalukila buludi kuumukila ku cyòci eci, kuya too ne kwine aku. Nudi bumvwè cìndì muswè kwamba aci anyi? Ndi mufwànyine kuumukila ku edi ditengu kuya ku dikwàbò, anyi ndi mufwànyine kuya munkaci, anyi ní mpenyi pwònsò. Kàdi cintu kampànda necyènzekè, bikèngela cintu kampànda cyènzekè. Nènku ncinyi ciine aci? Ku dibàtiiza dyà Nyumà ke kùdi kundeeja ne mèmè ndi mu Mubidi ne: “Ku Nyumà umwe.” Ūm̀yù aci anyi, mwanèètù wa balùme, udi apa ewu? Èyo! Kwàjiki? Èyo.

112. Mmu bulongame kaayi mùdibo ne cyà kukwàta mudimu ne myakulu ne bipròfetà munkaci mwà disangisha (Kabyèna ne cyà kukwàta mudimu nànsha kakesè munkaci mwà disangisha to! Nwamònu anyi?) **bwà kutùmbisha Nzambì** (Nànsha kakesè!), **ne kwibaka èkèleeziyà? Ndi mumanye ne bantu bàtu bàmba ne nyumà wa mupròfetà — ndi mumanye ne — ndi — ndi mumanye . . .** (p- . . . ndi ngeela meeji ne . . . To, mfwilaayiku luse, cìvwa “m’Bible,” B-i-b-l-e. Mvwa mutwàdije p-e-p-l-e anyi cintu kampànda cyà mùshindù awu. To.) **bì — Bible ùdi wàmba ne: “Nyumà wa bapròfetà ùdi ùkòòkela mupròfetà.”** (Menemene.)

¹⁴⁰ Dyakula dyà mu myakula dyà Nyumà ne dyamba dyà cipròfetà bidi ne cyà kwibaka èkèleeziyà, kàdi bìdi ne dyàbì disangisha dyà sungasunga. Nwamònu anyi? Kí mbwà kutàcisha mu ntàntà yònsò udi mupròfetà wa èkèleeziyà mwikale. . . disangisha diikale mu bulongame to. Nwamònu anyi? Kabyenaku bwà kwimanyika disangisha to.

¹⁴¹ Mpindyewu, nwamònu's, “nyumà yà bapròfetà.” Tudi—tudi ne lukonko lukwàbò mpindyewu, twànji kulekelaayi alu lùtùngunuka bwà katancì kakesè cyanààna. Nwamònu's, mùshindù mujaalàme wa òwò aa. . . kukwata mudimu ne mapà aa. . . Eci nkwandamuna kwà nkonko bwà mapà àbùngì, nudi numòna's. Patwàfika ku òwò awu netwàmbè ne tuvwa bayandamwine mu lwà kumpàla elu, ewu muntu udi mwelè elu ewu. Nwamònu anyi? Awu nnomba mwtànu:

Myakulu ne bipròfetà bàdi ne cyà kukwàta naabi mudimu munkaci mwà disangisha bwà kutùmbisha Nzambi ànyì?

¹⁴² Nudi numòna's, mpindyewu, mwambi...mwambi yèyè moolaabiibwe kùdi Nzambi, ne èkèleeziyà mutèèkiibwe mu bulongame, mpindyewu, mùshindù mujaalàme... Bàbùngi bàà kunùdi mbamanye mûntù—mûntu munwambile bwà bwalu ebu “bikèngela bwà biikale bitèèkiibwe mu bulongame.” Mapà aa àdi ne cyà...Mpindyewu, s'ki citwènta mu tabernacle emu aci, bu Mukalenge mwà kwanyisha. Mpindyewu, ndi munkaci mwà kutàngila, ndi mmòna cintu kampànda, nshiya Mwanèètù Neville ne bàna bèètù bakwàbò aba mu bulongame. Mpindyewu nudi... Ne pàcìdi bààbùngi bàà ku bàna bèètù bònso aba biikale bàna bèètù bà balume batekète.

¹⁴³ Mpindyewu, mèmè ndi—ndi nkòlomù wa kale bwà—bwà ku nwèntù bònso mu Njila ewu. Nkaadi ne bidimu makumi asatu ne cìmwè mu njila Ewu. Kukaavwa bidimu bitwè ku makumi asatu pangàakateèka mèmè dibwe adi mwaba awu. Byàkakèngela bwà mèmè kukùngamangana ne cintu cyònsò cìvwa cikèngela kukùgamangana naaci aci, nènku bìdi bikèngela wikale, pèèbè, mumanye bìmpè ne ncinyi cyùdi munkaci mwà kwakula's, dîbà dyùdi utwàku makàsà. Kwèna ànu ne cyà kumanya aci nkàayaci to, mbitàmbe bwìmpè bwà Nzambi yikaleku bwà kucitwa nyama ku mikòlo pawùdi upeta—pawùdi upicilamù.

¹⁴⁴ Mpindyewu, mùshindù mutàmbe kwikala wà dyàkalenga menemene wà—wà kwenza cyòcì eci mpindyewu, nudi bafwànyine kwenza disangisha dyà pabwàdi. Ndi ngiitabuujà ne ki cyàkenzabo mu Kolinto wa Kumpàla 14 amu ne: “Cintu kampànda padici cibuuulwila muntu udi musòmbe ku luseke, mukwàbò àpuwè dîbà adi.” Ngeela meeji ne cìvwa “disangisha dyà pabwàdi bwà mapà,” ciine aci ncifwanyine kwikala ànu cìmpè. Bu bwòbò baswè kwikala ne masangisha à pabwàwù mùdi bantu bwònsò bàdi ne mapà batwilangana musangu ùmwèpelè ku lumingu, aba bàdi ne mapà, ne bàlwa babwela mu èkèleeziyà, aci's ncifwànyine kwikala cìmpè. Bènze bòbò disangisha adi, kakwèna...kamwikadi diyiiisha nànsha òmwè to, dîdi mbwà mapà à Nyumà.

¹⁴⁵ Ki ndyà beena pambelu ne beena bupidyà to. Bàvwa ne cyà kubwela, kusòmbela panshi, bàmba ne... Ùmwe ùjuuka kuulu ne ùbanga ne: “ah-ah,” wàkula mu myakulu; mukwàbò pèndè wàmba ne: “wha-ah.” “Ncinyi ciine eci kwòkù's!” Mbafwànyine kubwela ne kwamba ne: “Misambu yèpi? Bikwàbò byònsò ebi bìdi penyì?” Nwamònu anyì?

¹⁴⁶ Kàdi, mpindyewu, aba bàdi bààkula mu myakulu, bààbùngi bàà kùdibo (ne bàndamuna, ne bikwàbò) mbànà bàà mu mabòko bàà mu Èvànjeeliyò. Nwamònu anyì? Kanù—kanùbalendwishi to, bàlekelaayi—bàlekelaayi bàkolè too ne piikalà dipà adi... Àmwè à ku wòwò, nudi mwà kumòna mùdi Sàtaanà uteeta bwà

kudifindamu ne budimù mu àmwè. Mu bushùwà bwà bwalu, bankòlomu, tudi—tudi tumòna cyôci aci. Nwamònu's, tudi mwà kubakula cyôci aci, nènku nenùcitàbàleelè.

¹⁴⁷ Mwab'ewu ànu àbìdì àdì panshì aa mwambi kampànda, mmusòmbe mwab'ewu mpindyewu mene, kulwaye kùndì e kungambila ne kuyayè naanyi kwèndè kumbelu, mwanèètù wa mushinga mukolè wa dikèma.

¹⁴⁸ Ncyèna ncyàmbe ne bwalu yéyè mmusòmbe kaaba aka to, kàdi nudi bònsò bânà bèètù bàà *mushinga* mukolè. Bu ne ncivwa ngeela meeji nàнку to, mvwa mwà kunwàmabila ne: “Nwènu ne mèmè tulongololàayi cintu eci mu twètù, dyàmbedi.” Nwamònu anyi? Ncyà bushùwà. Nwamònu anyi? Ndi munùnange nwènu bònsò, ne ndi mwaba ewu ànu mu nyumà wa ditwàlàngana mu Bible, nudi numòna's, bwà—bwà kukwacisha. Nwamònu anyi?

¹⁴⁹ Mwanèètù ewu ùvwa muyè naanyi ku nzùbu kwèndè bwà . . . mukàjì kampànda, ne mukàjì awu ùvwa mu ntùpàkànyì. Nènku eci . . . Kacya ncitu mwanji kumòna mukàjì awu to kàdi ndi mucyùmvilè pa mukàbà wa mèyi, yéyè ufila dyandamuna dyà myakulu, ne wamba cintu kampànda. Udi mufwànyine kucibakula ànu pa dîbà adi mene.

¹⁵⁰ Dìngà ditùkù, kùdì mwambi mukwàbò, ne mèmè, bwà muntu umwèumwè awu, tuvwa basòmbe pa citùmpàmpà cyà mucì, tulemba nshindì, ne twakulangana bwà cyôci aci. Ne bambi bwònsò bàbìdì, bàdì mwaba ewu mpindyewu, mbamanye mwàkenzekabi. Nwamònu's, nudi ànu, nutàngila cyanààna.

¹⁵¹ Panùdì nwènu bambi munkacì mwà kulongolola muntu kampànda pa bìdì bìtangila dipà kampànda, panùdì nubàlongolola, Nubalongolola bilondèshile Mifùndu, kàdi bàlèndwishiibwa, vùlukàayi ne, kacivwa Nyumà wa Nzambi to, bwalu Nyumà wa Nzambi kèna mwà kulèndwishiibwa kùdì Dîyi Dyèndè to. Yéyè ùdi ùtwa ku Dîyi Dyèndè. Nwamònu's, yéyè ùtu misangu yònsò ànu mwanyishe. Munsantu mulèlèlè wa Nzambi mmuswè kwenda mùlulàmè. Èyowà's, mukalenge.

¹⁵² Ndi muswè kulongolodiibwa. Ndi muswè bwà Nyumà Mwìmpè àndongòlòlè mu bintu bìndì ngenza bìdì bibì. Ncyèna muswè cintu cyà mupinganyi nànsha cìmwè to. Ndi—ndi muswè cintu cilelèlè anyi ncyèna muswè cintu nànsha cìmwè to, ndekèlaayi nàнку, Ncipeci cintu nànsha cìmwè to. Nwamònu anyi? Bwalu mbipiciibwe ne mèmè mwenze aci pamutù pàa kufwisha Kilistò bundù.

¹⁵³ Nènku ncyèna mufwànyine kulongesha cintu nànsha cìmwè ne ncyèna mufwànyine kwamba cintu nànsha cìmwè pàdici kaciyi Mufùndu nànsha . . .

¹⁵⁴ Nènku bu mwanèètù wa balùme kampànda, mwanèètù wa balùme mwena Kilistò kampànda mwà kummòna ndongesha cintu kampànda cyà cibì, ndi mufwànyine kwanyisha bu wèwè mwà kumbiikidila ku luseke paanyimà pàa disangisha,

ne kwamba ne: “Mwanèètù Branham, ndi muswè kulwa mu birò byèbè bwà kuyiikilangana neebè, udi mu ntùpàkànyì pa cintu kampànda.” Nwamònu anyi? Ncyà bushùwà ne ndi mufwànyine—ndi mufwànyine kwanyisha aci, mwanèètù, bwalu ndi muswè kwikala mubinge. Ndi muswè nànkù.

¹⁵⁵ Mpindyewu, twètù bònsò tudi baswè kwikala babinge, ki bwà cinyì tudi baswè—tudi baswè kwakula bintu ebi. Nènku bìdì bikèngela bwà kufùminabi mu Mifùndu, nudi numòna’s, bwà kwenza ne Mifùndu yiswikakanè pàmwè.

¹⁵⁶ Mpindyewu, bìvwa bikèngela bwà dyakula dyà mu myakulu kwikaladi. . . Mpindyewu, paanyimà ndambù. . . Mpindyewu, bìlekelaayi byènzekè bwà mpindyewu, bwà katanci kakesè. Nwamònu’s, ndi mufwànyine kunùbela bwà nwènù kubilekela bìya mùyaayàbi amu ne kubilekela mùdìbi amu. Bwènù nwènù bambi mpindyewu, nwènù bampasààtà, bìlekelaayi biye mùyaayàbi amu too ne pìikalà bânà batòòke abu mwà kukola. Mpindyewu, pàmwàpa, nànsha ku tootooto nànsha ku ndandanda, pìikalabi ne mmwena lukuna udi uteeta bwà kuseeswisha muntu awu, neèdiibwe patòòke. Katwèna batàmbe kwikala batwishùbwe menemene to.

¹⁵⁷ Mpindyewu, paanyimà pàà cyòci eci, kumpàla kwà nwènù kubanga eci, yikalaaayi ne nyumà wa lungenyi kampànda muntwamu, ndambù wa dijingulula dyà nyumà, nudi numòna’s, bwà kujandula. Cintu cyà kumpàla, nudi bamanyè’s, nudi nubanga kumòna ne muntu kampànda ùkaadi mubange kumòna ne kùdì kaacintu kampànda kàdì kakàyi mu kòkò to, aci’s ndijingulula. Dìbà adi, mwànà mutòòke awu mu katanci kakesè amu’s. Nwamònu anyi? Nènku dìbà dinùdì numòna dijingulula dyènda dìbìipa, dìbà adi dìlongòlòlaayi. Nènku pìikalà cintu aci. . . pìikalàci cyà kùdì Nzambi, yèyè neàtwalè dilongodiibwa ku bilema ne Dìyì. Nwamònu anyi?

¹⁵⁸ Twàmbèbi, cileejilu ne, ndi njinga kwamba ne tudi baakùle mu myakulu, muntu kampànda, tudi. . . ewu mmusùmbà wa—wa bantu bàdì ne mapà. Ki Leo kujuuka e kwakula mu myakulu; dìbà adi, ne mwanèètù wa balùme kampànda kaaba aka, Willard, kufila dyandamuna. Èyo. Mpindyewu, ndi njinga kwamba ne Mwanèètù Neville ne Mwanèètù Junie ne Mwanèètù Willard Collins bàvwa bajinguludi, nwamònu’s. Mpindyewu, bwalu Leo mmwàkùle. . . Mpindyewu, tudi mwaba ewu ànu bu mu disangisha dikesè dyà bansantu, disangisha dyà mapà, ki Leo kwakulaye ne Willard kufilaye dyandamuna mwaba ewu, ki yèyè kwamba ne: “EMU MMÙDÌ MUKALENGE WÀMBA! ‘Mu diisàtù dilòòlò nekùlwe mukàji kampànda mwab’ewu ne yèyè neà—neikalè wà lwonji. Ambilaayi Mwanèètù Branham bwà kàmutandishi to, bwalu mmupàle. Kàdì nùmwambile bwà àyilè nendè mu ditumba, bwalu civwa mmu ditumba muvwaye mwenzèle cintu cyà lwonji aci musangu kampànda ke cintu

kampànda kwenzekaci.” Nwamònu anyi? Aci’s cìdi cyumvwika cimpè be, kî mmwômò anyi? Nwamònu anyi? Èyo.

¹⁵⁹ Mpindyewu, kadi katanci aka, nudi bamanye, mu Mifundu yà Kale, nànsha bàmba ne mupròfetà mmwambe cinyi anyi cìdi ní nganyì mukwàbò mwambe, cìvwa citeecibwa kùdi Ulimà Tuumimà, dyàmbedi. Nwamònu’s, cìvwa cikafika ku Dìyì. Kàdi pàvwà makénkè awu káyì ateema to, bàvwa bacilekela. Nwamònu anyi?

¹⁶⁰ Ne cintu cyà kumpàla, mpindyewu, tucyalujaayibi ku Dìyì. Mpindyewu, ewu muntu mmwakùle mu myakulu, byumvwike bìmpè. Ewu ewu mmwandàmune, byumvwike bìmpè. Kàdi Dìyì ndyambe ne: “Cilumbulwishiibwe kùdi balumbulwishi bàbìdì anyi bàsàtù, dyàmbedi.” Ndàayi naaci kùdi Ulimà Tuumimà.

¹⁶¹ Mpindyewu, cintu cyà kumpàla, Willard Collins ùdi wàmba ne: “Cìvwa cyà kùdi Mukalenge.” Junie wàmba ne: “Ncyà kùdi Mukalenge—Mukalenge.” Abu mbàbìdì pa bàsàtù. Èyo, ncifündiibwe pa dibeji, mbacyàmbè patòoke mene mu èkèleeziyà emu. Dìbà adi pàdì bantu bàdi bàcimòna bàcibala kumpàla mene kwà kwenzekaci, ne pashùshe bàcimòna cyènzeka, bàdi bàmba ne: “Mwanèètù, aci’s n’Nzambi! Nwamònu’s, aci’s n’Nzambi!”

¹⁶² Kàdi ambàbi tǔng cyòci kaciyi cyènzèke to, dìbà adi cyènzekà ncinyi? Nwamònu anyi? (Mpindyewu netùfikè ku cikwàbò cintu cìndì mufwànyìne kulenga mwab’ewu mene, “Cìpròfetà cyònsò mu kaabujimà...mandamuna ònsò ne mikenji ncìpròfetà anyi?”) Mpindyewu, indilaayi kakesè. Mpindyewu, kàdi cyòci kaciyi cyènzèke? Dìbà adi Leo ùvwa mwakule mu nyumà wa mashimi; yèyè kufila dyandamuna dyà mashimi; ne wèwè kufila dijingulula dyà mashimi. Dìbà adi patula cintu aci munda mwèbè. Kwèna naaci dijinga to. Ncyà mafi. Cilekèle cyèndelè dyàcì dibòko. Ki dyabùlù nyèyè awu. Nwamònu anyi? [Katùpà kàà mukàbà wà mèyì munda mutupù—Muf.] “Mèmè ncyèna muyiishi to, kàdi ndi—ndi mwandamunyi. Nwamònu’s, mèmè ndi mwandamunyi, Mukalenge, mèmè—mèmè ncyèna muyiishi to. Ndi...” Mwanèètù Leo ùdi wàmba ne: “Mukalenge, mèmè ncyèna muyiishi to, kàdi ndi—ndi ne dipà dyà myakulu kàdi dyabùlù mmulwe kumbwelelamù. Nzambi, nguumushileku cintu aci mu mèmè’s.” Wèwè udi wamba ne: “Mukalenge, Wèwè’s udi mumpe nyumà wa dijingulula, ne mèmè ewu’s nkààdikù muKumòne wucyènta misangu búngiyì’s, mbyenzèke bìshi? Taatù, nkezùleku ! Cyàkenzekà ncinyi?” Nudi numòna’s, ki bwalu mbwòbù abu’s, dìbà adi udi ucìpeta ànu cyà bushùwà.

¹⁶³ Nwamònu’s, aci’s ndisangisha dyà bansantu dyà ciibidilu. Ngeela meeji ne ki cìvwàku mu Bible, bwalu Pòlò mmwambe ne: “Muntu yèyè mwambe cìpròfetà ne cintu kampànda ciikàle cyambiibwe mu cìpròfetà, cintu kampànda ciikàle...ne cintu

kampànda cisokolwela ewu udi musòmbe; àshaale mupùwe too ne pàdi ewu wàkula dyàmbedi, dîbà adi yéyè ùdi mwà kwakula. Nènku nwènù *bónsò* nudi mwà kwamba biprófetà ku umwe ku umwe.” Mpindyewu, aci kî ncifwànyîne kwikala mu disangisha dyà ciibidilu to, bwà aci’s nudi bamanye, muntu ne muntu kàvwaku mufwànyîne kwikala mufile to.

¹⁶⁴ Mpindyewu, bwà kwikala batwishìibwe ne ncyà kùdi Nzambì, nwamònu’s, bwalu cyòci ciikale ànu dikutakana cyanààna kî ncyà kùdi Nzambì to. Cyòci kaciyi cyenzèke to, kî ncyà kùdi Nzambì to. Nwamònu anyi? Cìdi ne cyà kwenzeka. Nènku—nènku ki bwà cinyi mu èkèleeziyà yètù, nwamònu’s, mwanèètù, tudi dîbà adi ne èkèleeziyà mushindàme, nwamònu’s, mùdi muntu nànsha umwe kàyì mwà kwambaku ne cintu nànsha cìmwè cikaadiku cyambiibwe anyi cyenjìibwe. . .

¹⁶⁵ Tàngilàayi mùdibi binshiye kumpàla, pàndi mwimàne kumpàla kwà bantu kwaka. Tàngilàayi aci! Ambàayibi tũng bu cilema cìmwèpelè mwà kwenzekapu? Nwamònu anyi? Bwalu mèmè ndi muMweyèmene. Nwamònu anyi? Mèmè ndi muMweyèmene. Muntu kampànda ùdi wàmba ne: “Wèwè udi ucìina kwenza cilema anyi, Mwanèètù Branham?” To, to, uh-huh, ncyena ne bwòwà bwà cilema nànsha. Mèmè ndi mMwitàbùùje. Yèyè ke dyànyì Dikùbiibwa. Ndi mutèekiibwe bwà kwenza cyòci eci bwà ngashààla ànu mwaba awu.

¹⁶⁶ Pìikalabi ne Nzambì ngudi mukutèeke bwà wèwè kwenza cintu kampànda, dîbà adi Yèyè kî Dikùbiibwa dyèbè. Nwamònu’s, Yèyè’s neàkukùbè. PìikalaYe mukutùme, Yèyè neàtwe dîyì dyèbè nyama ku mikòlò. Dîbà adi udi mùlòpò. *Udi* mùlòpò ne dipà dyà myakulu adi; *udi* mùlòpò ne dipà dyà dyandamuna adi; *udi* mùlòpò ne dipà dyà dijingulula adi; búsàtù bwènù. Nudi búmvwe cìndi muswè kwamba aci anyi? Dîbà adi wèwè udi ne cinyi? Udi ne èkèleeziyà mushindàme. Kwéna mufwànyinekù kuciina to. Mwimane, èyo, ànu makèèlèlè ewu. . .

¹⁶⁷ Mwaba ewu, mvwa nsanganyiiibwa mu disangisha kampànda lwà kwinshi eku. Mwànà mukesè wa balùme wa kale wa cyena Angleterre mufumine mu Angleterre mulwe apa, ùvwa ùteeta bwà kudishipa. Mwanèètù Banks kulwa mwaba awu e kwamba ne: “Ùvwa muye kuntwaku munda mwà matùkù anaayi anyi ataanu.” Mvwa ne bintu byàbùngi byà kwenza, kàdi kwambayè ne: “Mwànà wa balùme awu’s neàdishebèyè.” Ku Cilààla-beenyi cyà Waterview aku kungambilabo bwà ngiikàdilu wa mwànà wa kambodyoto awu.

¹⁶⁸ Ki mèmè kubwela mu cibambalu amu bwà kumusambidila. Mèmè kwalukila pambèlu e kwamba ne: “Mpindyewu, Mwanèètù Banks, kacya ncitu mwanji kumòna muntu wàwa anyi ncyèna mumanye kantu nànsha kamwè pa bwalu bwèndè to, kàdi nènkwambilè cìdi cimutàcisha kumpàla kwà mèmè

kufika kuntwaku.” Ncyà bushùwà anyì, Mwanèètù Banks? Nènku patwàkafika kuntwaku, Nyumà Mwimpè kupweka e kumwambila cìvwà cicyenze ne byònsò bìvwà bìmutàngila, ne mwaba ùvwàye usanganyibwa ne byònsò bìvwà bìtàngila nsòmbelu wendè. Kwambaye ànu kubùnguluka panshi, nàнку awu.

169 “Udi uciina kwenza cilema anyì, Mwanèètù Branham, paùdi wambila muntu cintu bu nàнку awu?” Kadi ne twambe bishi bwà ku cibumbà cyà ku cyambilu eku, wambila muntu mùdiye kàyì ne lulamatu kùdi mukàjèndè, mulelè mwànà ne mukàjì mukwàbò? Yèyè’s neàkwelèshè mu bùlokò. Bikèngela wikale wamba bulelèlà! Nwamònu anyi? Nwamònu anyi? Kuciinyi to, pìikalaci ne n’Nzambi. Kàdi pawikalà kùyì ucìina to. . . Pawikalà—pawikalà kùyì mumanye ne n’Nzambi to, nàнку shààla mupùwe too ne paùdi umanya ne n’Nzambi. Ncyà bushùwà anyi? Ikala mutwishìibwe ne udi mubinge díbà adi ùtùngunuke uye kumpàla.

170 Mpindyewu, edi ndilongesha dikolè, mwanèètù, kàdi nwènu nudi bânà bèètù. Nudi—nudi—nudi bambi batekète bààlondà, mèmè ndi muntu mununu, wìkala ne cyà kuumuka dimwè dyà ku àdi panshi aa. Nwamònu anyi? Ne pa nàнку wikale mutwishìibwe ne—ne mbulelèlà.

171 Pàmvwà mpatuka mu cibambalu cyà. . . Pàmwàpa nèmbakulè bwalu ebu paanyimà apa ndambù. Mwànà wa balume. . . Èè, ndi muswè kwamba citùpà cyàdi mpindyewu. Makèlèlèlà awu, Mwanèètù Banks ne mèmè, tuvwa ne mudimu wàbùngì be, biikale (kaa, ekèlekèle) ne mwanyì mwònsò, nènku nèn—nènnwámбилè cìmvwà ne cyà kwenza mu disangisha edi. Leo ne Gene ne musumbà wètù twètù tuvwa ne cyà kuya kuntu kwaka, ne bânà bèètù, twambe ne tuvwa tuya kalemba ngulube, twenda tukebanga ne ngulube yà cisuku. Bàvwa ne matùkù ataanu à dizomba ngulube yà diitu, mu Arizona, paanyimà pàa disangisha dimane kujika, disangisha dyètù dijike’s. Tudi tuya ku Phoenix bwà ditùkù dimwè, ne nebikengelè bwà kwindila matùkù ataanu kumpàla kwà twètù kupeta dikwàbò, matùkù anaayi kumpàla kwà bóbò kwenza disangisha dikwàbò mwaba kanà ónsò. Bidi bikèngela bwà twètù kwikala ànu kwòkò ku Arizona aku’s. Èè, bìdi byènzeka ne mmu cikondo mene aci cìdi muvù wà dizomba dyà ngulube yà cisuku cìkàngudiibwa’s.

172 Pa nàнку mwà muswè kukùma ne kangoma kàànyì kakesè, bwà kumòna ní kàvwa kimpè. Banks ùvwa naanyi mu lwendu amu. Twètù kubanga kupàtuka ku ciibi, kubanga kupàtuka ku ciibi. Ki muntu ulwàlwa ewu, kàyì nànsha ùtàngila cimanyinu cìvwà kuulu menemene aku aci (nwamònu’s, cìvwa cyamba ne: “Bu wèwè mwà kuswà kùkonkikù bwà kumònangana ne Mwanèètù Branham to”).

173 Nwamònu’s, cìdìbo benzela nàнку. . . kì mbwà bantu bàdi

bàsaama to. Ekèlekèle, ne ku nzùbu awu, konkàayi Banks, tudi batwàngane nendè mutumba's. Bantu bàdi bàlwa, muunya ne bufùkù ne bikwàbò byònsò, ne bânà bàsaama, ne bikwàbò byònsò. Twètù katùtukù twipata muntu wa mùshindù awu to. Kàdi . . .

¹⁷⁴ Ki kumbiikilabo, Leo ne bakwàbò abu, lwà pambèlu pàapa ku ditempu dyà màshinyi kwàka, nènku Jim ne bakwàbò abu ne: "Kùdi muntu kampànda kaaba aka ne mwànà ùsaama. Ne muntu kampànda nyèwù apa ne kansèrè." Tudi tutèeka bintu byònsò ku luseke ne tuya kùdiye.

¹⁷⁵ Makèlèlè dilòlò awu mvwa mubiikidiibwe mu cibambalu kampànda cyà lùpitaadi mvwa muntu kampànda mumbiikile amu, kàdi muntu awu kàyiku mufwànyine kungiiabila bwà mèmè kubwelamu paanyimà pàà mèmè mumane kufikaku to. Nwamònu's, muntu mukwàbò ànu musaluke cyanààna. Kàdi aci's cidi ànu cimpè, nànsha bìshi mèmè kuya ànu's. Nwamònu anyi? Bwalu mmudimu wànyì bwà mèmè kuya, nwamònu's, ne kuteeta bwà kukwàcishakù muntu kampànda.

¹⁷⁶ Èè, kî mbwà aci bùdi cimanyinu aci citèekela to. Kàdi muntu ewu, ànu patùkavwà twenda tubwela mu kàshinyi amu, ne Mwanèètù Banks mmumanye ne bìvwa bikèngela bwà mèmè ku. . . Mèmè kwindila mu nzùbu awu mu mùshindù kampànda. Kùvwa kubwela muntu kampànda kwà Mwanèètù Banks uvwa mumulame. Tudi benze ànu tufika kuntwaku anyi, mèmè nguvwa mulamiibwe. Pashiishe tudi benze ànu twangata cingoma cyètù bwà kubànda mu kàshinyi anyi, ki muntu ewu pwàà lwà makàsà ubwela. Ùfika mwaba awu.

¹⁷⁷ Nènku nkààvwa ànu munkaci mwà kudilongolola bwà kumwambila bwà kupatukayè ne kubiikilayè nombà uvwa pambèlu awu (ku BUTler 2-1519) ku cimanyinu aci. [Nomba wa tèlefone mmushintùlùdiibwe.—Muf.] Mèmè ne: "Tudi mu dilwijakaja."

Yèye ne: "Ndi ncinka ne udi mu dilwijakaja, mukalenge."

Mèmè ne: "Dìnà dyànyì . . ."

¹⁷⁸ Dyàmbedi mèmè kusemena, yèye ne: "Wetwàwù?" Ki mèmè kumòna ne kavwa mumanye ne mvwa nganyì to.

Mèmè ne: "Dìnà dyànyì m'Branham."

Yèye ne: "Wèwè ke Mwanèètù Branham anyi?"

Mèmè ne: "Mmèmè."

¹⁷⁹ Ki yèye ne: "Ndi—ndi . . . Mvwa njinga kutwilangana neebè, Mwanèètù Branham." Yèye ne: "Ndi mmòna ne ukaadi pabwìpi ne kuumuka."

Mèmè ne: "Èyowà's, mukalenge, ndi pabwìpi."

Yèye ne: "Ndi mumanye ne udi mu dilwijakaja."

Mêmè ne: “Ndi mu dilwijakaja mpindyewu mene, mukalenge.”

180 Ki yèyè ne: “Èè, mvwa njinga kuyiikilanganaku neebè tusunsa tukesè.”

181 Nènku nkààvwa ànu ne mmwambile; ki Nyumà Mwîmpè kwamba ne: “Mubweje mu cibambalu emu, udi mwà kumwambulwisha.” Mpindyewu, mwaba awu, aci cidi cishintulula bintu byònsò. Cingoma aci citèèka ànu ku luseke, ne bintu byònsò byà mùshindù awu, mudimu wa Nzambi dyàmbedi. Nwamònu anyi? Ki yèyè kwamba . . .

182 Mêmè ne: “Lwàku, tàyè.” Mêmè ne: “Nèngààlukilè paanyimà pàà katanci Mwanèètù Banks.”

Yèyè ne: “Bwalu mbwà musùkà wànyì, Mwanèètù Branham.”

Mêmè ne: “Èyo, bwelààku.”

Mêmè kubwela mu nzùbu amu, Meda kwamba ne: “Kwèna ànu mwanji kuya anyi?”

183 Mêmè ne: “To, to, to, kùdi muntu kampànda pambelu apa.” Mêmè ne: “Lamina bânà mu cibambalu cikwàbò amu.” Mêmè kumubweja mu cibambalu cikese cyà bingoma, twètù kusòmbela panshì. Ndi mwenzè ànu ntwà nyimà panshì anyi . . .

184 Muntu awu ùvwa mu èkèleeziyà makèèlèlè dilòòlò awu. Anyi ùvwa mulwè anyi, Banks? Uvwa . . . Èyo, èè, bìvwa bikèngela bwà yèyè kulwa makèèlèlè dilòòlò awu. Ùvwa ànu . . .

185 Cintu cyà kumpàla, Nyumà Mwîmpè kubanga kumwambila ne yèyè ùvwa nganyì, civwaye mwenze, civwa cimwenzèkèle mu nsòmbelu wendè, maalu ònsò pa bwalu abu, nwamònu’s, wènda ùtungunuka ànu nànkù, wènda ùmwambila bintu byònsò. Banks ewu’s nkàmwenà. Kààkabuululaku mukana mwèndè to ànu bwa kungambila mèyì matwè bu ku àbidi; ki mwaba awu Yèyè kuditwa mu dimwambila maalu, kwamba ne: “Ùvwa mulalakanyi, mu bulelèlè udi musòmbèle mu Madison. Ucidi ùfùminaku ku Evansville, mu Indiana. Uvwa kuntwàku ku Cilongelu cyà Bible, kasumbu kampànda kàà ntèndeleele, mukabwela mu cibwejàkàjì cyà menemene. Ucidi ufikilaku mu Louisville kukaadi tusuunsa tukesè. Kuvwa muntu mulùme kampànda, ne muntu kampànda kukwambilayè (bwà wèwè kusòmba ne kudyà nendè), mmukwambile bwà wèwè kulwa mwaba ewu bwà kumòngana naanyi ne ‘yèyè neàkupatule mu lutàtù elu.” Mêmè ne: “Aci’s ng’EMU MMÛDÌ MUKALENGE WAMBALA!”

186 Muntu awu musòmbè ànu cyanààna, ùtuuta mipòdi, muntàngilè, wamba ne: “Èyowà’s, mukalenge!”

Mêmè ne: “Cyàkukèmeshi bikolè’s, kî mmwômò anyi?”

Yèyè ne: “Ncikèmeshe bikolè.”

Mémè ne: “Udi witabuuja Nyumà Mwímpè anyi?”

Yèyè ne: “Ndi muswè bwà kumwitabuuja, mukalenge.”

187 Ki mémè ne: “Udi muswè bwà nkwabwibile cyùdì munkaci mwà kwela meeji anyi?”

188 Yèyè ne: “Èyowà’s, mukalenge.” Ki mémè kumwabwibila. Yèyè ne: “Nènku, mwanèètù, aci’s mbulelèlà.”

Ki mémè ne: “Shintulula meeji èbè.”

Yèyè ne: “Èyo, ngàshintùlùdì.”

Mémè ne: “*Eci’s* ki cyùdì welela meeji.”

Yèyè ne: “Ncyà bushùwà! Ncyà bushùwà!”

189 Mémè ne: “Mpindyewu, kabyèna bìkukèngela cikèèna-kumòna to, bìdì bìkukèngela ànu kuludikiibwa cyanààna.” Ki mémè kumwabwibila cintu kampànda mwaba awu cinùdì kanùyì bafwànyìne kujinga bwà mémè kwamba to. Bu ne cìwà pambidi pèèbè, nùnkù’s kwèna mwanýishe to. Ncintu kampànda cibì be cyà cyènta bwòwà, mu mùshindù wa ne wèwè kùvwakù mufwànyìne kujinga bwà mémè kucyàmba bu ne cìwà pambidi pèèbè nànsha. Nènku ncyèna ngàmba cìdì Mukalenge undeeja pa bantu to. Ki mémè kwamba ànu ne: “Èyo, nèucyènzè anyi?”

Yèyè ne: “Nèncyènzè.”

Mémè ne: “Kwàta njila ndààku.”

190 Tuvwa munda amu mu tusunsa katùyì tutwè ku dikumi to, kí mmwómò anyì, Mwanèètù Banks? Bu nànkù awu, pankaci pàà tusunsa mwandamutekète ne dikumi. Twètù kupàtuka, kwalukila twenda tupweka ne njila, twenda tupweka ne njila, yèyè ne mémè ne Banks, ne mwanàanyì wa balùme mutekète, Joe, Ngeela meeji ne ke mùvwàbì, twenda twendela pàmwè mu mashinyi, tuya bapweke cibeeba aci. Kukùdimukaye kùndì, kwambayè ne: “Mukalenge, ndi muswè nkwelèku lukonko.”

Mémè ne: “Èyo.”

191 Yèyè ne: “Ndi mu cibwejàkàjì ndambù.” Yèyè ne: “Mmunyì mùdì mumanye bintu byònsò bìdì pambidi pàanyì abi?” Nwamònu anyi? Banks uvwa musòmbe mwaba awu.

192 Ki mémè ne: “Mukalenge, ukààdikù muumvwe bààkula bwà bìkèèna-kumòna byànyì ne mudimu wanyì wà bwambi anyi?”

193 Yèyè ne: “Kacya ncitu mwanji kumanya dìnà dyèbè to ànu bu mu dìbà dijima nànkù awu. Muntu kampànda mmungambile, wàmba ànu mu Louisville mwàmwa, mmungambile bwà kulwa kuneeku, nènku ke mémè kusambuka cilamba.” Ncyà bushùwà anyì, Banks? Yèyè ne: “Kacya ncitu mene mumanye dìnà dyèbè to, mumanye ne wèwè uvwa nganyì to.”

194 Mémè ne: “Mu mudimu wànyì wà bwambi, ndipà dyà kùdì Nzambì didìYe mutùme.”

195 Yèyè ne: “Nènku pìikalabi ne ki—ki mùshindù awu ùdìbi,” yèyè ne, “mpindyewu ndi . . .” Yèyè ne: “Ndi ànu bîmpè. . . Ndi bîmpè mpindyewu,” mwàkambàye, “byònsò mbimane kuya.” Nwamònu anyi? Yèyè ne: “Bwalu budi ne, n’Nzambì uvwa ungaakwila ku wèwè aku.”

Mêmè ne: “Menemene.”

196 Yèyè ne: “Mpindyewu, mêmè ndi ngùmvwà mu Bible ne. . . Musangu kampànda mvwa mubale mu Bible, bamba ne: Yesù wàkaakula ne bayiidi Bèndè,” ùvwà muswè kwamba ne “ne bantu,” nudi numòna’s. Yèyè ne: “Wàkaakula ne bayiidi Bèndè ne Wàkabàmbila bintu bivwàbò beela meeji.” Nwamònu’s, “ùmòna meeji abo” ki ku cìvwaye ukafika aku. Yèyè ne: “Ne Yèyè wàkamba ne ùvwà n’Taatù Wendè uvwa wakwila munda Mwèndè.”

Mêmè ne: “Aci’s ncyà bushùwà.”

197 Yèyè ne: “Mpindyewu, mpindyewu, Taatù dîbà adi wàfumu ku dikwàta neebè mudimu bwà kungaakwila ku wèwè aku, bwà kungambila maalu aa, bwà kumfikisha ku diitabuuja ne cyùvwà mungambile cìvwà bulelèlè.”

Mêmè ne: “Cìvwa bulelèlè anyi?”

Yèyè ne: “Èyowà.” Yèyè ne: “Nànku bikèngela cìikàle Nzambi.”

198 Ki mêmè ne: “Mwanèètù, wamanyì byàbùngì pa bwalu abu mpindyewu” (mêmè ne Banks tuvwa munkaci mwà kumòna bwalu abu) “kutàmba bàmwè bàdì mu masangisha kukaadi bidimu dikumi kàdì kabàyi ànu bamanye to.” Ànu mwine muntu awu—awu! Mpindyewu, ki cyòci aci cìdì bwalu. Nwamònu anyi?

Nènku Nyumà (ne dilondangana dyà maalu) mu myakulu ncipròfetà cìvwàbo ne cyà kukwàta naaci mudimu dîbà dyà disangisha anyi?

199 To. Bìvwà bikèngela kukwàta naabi mudimu mùshindù ewu, ne pashìshe kwambùbwaci mu disangisha. Kàdì bwà musangu ewu, bwà dîbà dyà mpindyewu edi, bàlekèlaayi bààkulè. Mpindyewu, cyòci mwà kubanga kuya kwànaka, dîbà adi kî ncyòci to, bikèngela nùcitàngile. Mpindyewu, misangu mikwàbò ncifwànyine kwikala Nzambi. Balùmyànà batekète abu, bàdì ànu bu mùdì mwànà mutekète ùteeta bwà kwenda amu, mpindyewu, yèyè mudishinde panshì misangu yìnaayi anyi yìtaanu. . . Mpindyewu, nkaadiku mumòne cyòci eci kacya ànu ngáfika kaaba aka mu èkèleeziyà emu, ne—ne, èè, nèn—nèncilekele ànu mùshindù awu. Nwamònu anyi? Nènku, kàdì, nudi numòna’s, kàdì bwalu bùdì cinyì, dîbà adi udi mufwànyine kwamba ne: “Mwanèètù Branham, bwà cinyì kwèna mulongolole eci?” To, to.

200 Pààkabanga Billy Paul udi paanyimà wàwa kwenda, ùvwà wìmanyina kuulu wàdishinda, ne ùdishinda bikolè kutàmba

mùvwàye wimana kuulu. Kàdi kàvwa mumanye mwà kwenda to. Kàdi ndi ngiitabuuja ne yéyè ùvwa ne dipà dyà kwenda. Nwamònu anyi? Mvwa mmulekela wènda katanci kakesè. Kàdi pàkavwàye ubanga kutètuka ne makàsà èndè manène awu, ndi mmwambilaci mpindyewu. Nudi bùmvwè cìndì muswè kwamba aci anyi? Nwamònu anyi? Pàdiye ànu ùtùngùnuka ne kutangila cintu kampànda cikwàbo ne ùdìbyankula ku cintu kampànda, mvwa ngàmba ne: “Ambùlùlà makàsà èbè kuulu, mulùmjànà. Udi penyì?” Nwamònu anyi? Mpindyewu, aci’s—aci’s ki dishiìlangana, nudi numòna’s.

²⁰¹ Mpindyewu, balekèlaayi—balekèlaayi batetuka ne lekèlaayi bakalame ndambù katanci kakesè. Mpindyewu, byòbì bikèngela bwà wèwè kubalongolola, bòbò babènge kucyàkidila dîbà adi udi umanya wèwè mwine ne kàvwa Nzambi to. Bwalu Nyumà wa Nzambi ùdi ùkòòkela. Ànu munwaciteeji ndambù kaaba aka ne: “Nyumà wa cipròfetà ùdi ùkòòkela mupròfetà.” Nwamònu anyi? Ncyà bushùwà.

[Mwanèètù Stricker udi wàmba ne: “**Mwanèètù Branham, ndi njingaku dilongolodiibwa kampànda.**”—Muf.] Eyo, mwanèètù. [**“Misangu yàbùngì ntu musòmbesòmbe mu masangisha ne muumvwè dyakula dyà mu myakulu ne dyandamuna, nènku misangu yàbùngì ntu mudyùmvwè bibi bè bwà bwalu abu. Nènku ngààlukila kumbelu ne ndyumvwa bu ne mvwa munyingàlèle mu njila mujimà amu. Cìvwa mbwalu mvwa mudyùmvwè ne kacìvwa cyà kùdì Nzambi, anyi cìvwa mbwalu kacìvwa mu bulongame?”**]

²⁰² Cìvwa cìfwànyine kwikala, mwanèètù, cìvwa cìfwànyine kwikala anyi eci anyi cikwàbò. Nwamònu anyi? Ndi mufwànyine kwamba. . . Mpindyewu, ewu—ewu ng’William Branham, nwamònu’s; pàndì ncìyi ànu mukabwele mu Mifundu to, mòna’s, cìcìdi ànu mèmè, nudi numòna’s. Mpindyewu, ndi mufwànyine kwamba eci ne: Mwanèètù Stricker, ncìfwànyine kwikala anyi eci anyi cikwàbò. Cìvwa cìfwànyine kwikala bwà ne kacìvwa mu bulongame to; cìvwa cìfwànyine kwikala bwà ne wèwè nguvwa ne cintu kampànda cyà cibì; ncìfwànyine kwikala bwà ne kuvwa cintu kampànda cipampalamuke mu muntu awu; cintu kampànda cipampalamuke mu mukenji; anyi cintu kanà cyònsò cyà cìfwànyine kukufikisha ku *didyùmvwa* bibì.

²⁰³ Mpindyewu, mpindyewu, ngànji nkukwàcisheku ndambù, Mwanèètù Stricker, kaaba aka. Nwamònu anyi? Misangu yònsò. . . Kulumulwishiku cintu kampànda ku njiyà yàcì to, udi umòna’s. Cilumulwishile ku byambìibwa byàcì, nwamònu’s; ku mamuma ònsò àdìci cikwama awu, nudi numòna’s. Bwalu misangu mikwàbò. . .

²⁰⁴ Mu bushùwà bwà bwalu, tudi tujandula ne kùdì bintu byùdì uumvwa, bìdì ne njiyà yà yènza bwòwà’s. Ndi ncyumvwa mèmè

mwine, nènku, balumyana wa yaaya, ki mêmè kubanga kuya ku luseke ànu—ànu bipeepèle nùnkù, nudi bamanye's. Kàdi ncyèna ngamba cintu nànsha címwè to. Ndi ànu ncilekela nànkù bwalu ncyèna mumanye ne ncifwànyine kwikala cinyi to, nudi numòna's, too ne pàndi *mmanya* ne ncinyi mene aci.

205 Mpindyewu, ànu mùdì bantu bààbùngì bamba ne: “Yoyöyò! Mwanèètù, mêmè's ndi mumanye ne ndi ne Nyumà Mwímpè! Àlèluuyàh! Nzambì àtumbè!” Kàdi bòbò kabàvwa ànu bafwànyine kwikala ne Nyumà Mwímpè to. Bàvwa mwà kwakula mu myakulu, ne bikwàbò byònsò, ne kwela mbila ne kuja maja mu Nyumà, kàdi kabàyi ànu ne Nyumà Mwímpè to. Bwalu mvula ùtu umacila baakane ne babi. Ki nku njiyà to, nku *mamuma* abo.

206 Amba ne kùdi. . . Nudi bavùluke cikèèna-kumòna cyànyì pa cyòcì aci anyì? Mùshindù kaayi ùdì. . . Ebèlu 6, nudi numòna's: “Mvula udi uloka pa buloba misangu yàbùngì mbwà kubumyamina màyi, bwà cìdìbo bulongolwela, kàdi mēbà ne mingonga bidi pabwìpì ne kubengiibwa byena ndekeelu wabi nkwohiibwa.”

207 Mfwilaayiku luse, nembwejeku kapeepèle kakesè munda emu, ndi mumanye ne nudi bwònsò munkaci mwà kubùnga ne tulù ne nwenda nucyòka. Pa nànkù mpindyewu, indilaayi, nebikèngelè bwà mêmè kulwijakaja mu maalu aa ne lùkàsà ndambù bwà cyanààna ncyàdyàkuàjikija to. Eci cidi ne. . . Tukààdi bu bafike na nshindàmeenu waci—waci cyònsò, ànu mu dyanza edi dya nkonko mene emu. Kàdi bòbò nebiikalè. . . Nwamònu's, kùdi. . .

208 Budimi mbwòbò ebu bùle tètè ne blé. Ne mu bwòbò budimi amu mbamyaminemu nkùlaanyi, mpopù, anyì ni ncinyì cikwàbò cyònsò, bisoosa bibì. Èè, mushipu ngwewu utuuta. Mpindyewu, nkùlaanyi ne mpopù kabyàkwikala ne nyòtà ànu bu blé anyì? Nènku mmvula wa mùshindù kaayi mwine awu udi. . . mvula wa pabwèndè utu ùlòkela blé ne pashùshe mvula wa pabwèndè ùlòkela mpopù anyì? Neyà bushùwà anyì? To, mvula umwèumwè awu ùtu ùbimacila. Neyà bushùwà anyì? Nyumà umweumwe udi ùlòkela mwena lubombo awu ngùdì ùlòkela mwena Kilistò, cintu címwècímwè aci. Kàdi ku “mamuma àbò”! Aci cidi cìbwela cìtukina anyì, bânà bèètù?

209 Cileeeji cyà Nyumà Mwímpè mmamuma Èndè awu, mamuma à Nyumà. Èè, cidi. . . Èè, mpindyewu, wèwè udi wamba ne: “Mêmè ndi cicolakola, ndi mpopù. Ndi cicolakola ànu mùshindù ùmwèumwè ùdì blé mwikale cicolakola awu.” Kàdi mmwoyi wà mùshindù kaayi ùdì munda mwèbè's? Mwoyi ùdì munda mwàcì ùdì ùkwama mēba, ajuula ànu ndululu ne ùtápangana misangu yònsò, ne: “kwenza mutooyi” ne lwonji, ne mwòyi mubì, ne bikwàbò byònsò. Nudi bumvwe cìndì muswè kwamba aci anyì? Mwena dyambu, nwamònu's, aci kí mmamuma à Nyumà to.

Mamuma à Nyumà mbupolè, lutùùlù, kalolo, nwamònu's, byònsò abi. Nwamònu anyi?

²¹⁰ Ùdi mwà kwamba ne: “Èè, ndi mwà kwela mbila ne dīyì dikolè dyònsò bu munùdi mwà kwela amu. Nzambì àbèneshiibwe, Nyumà Mwîmpè nyawu upona pambidi pàànyì!” aci ncifwànyine kwikala cilelèlè mu katòba ne katòba, kàdi lwendu ludiye wènda kalwèna lùnwàngana ne cidīye munkaci mwà kwamba to. Nwamònu anyi? Ùvwa cisoosa cibi, ùvwa cisoosa cibi ànu kwine kwònsò aku.

²¹¹ Mpindyewu, tudi tulwa ku lukonko lunène mpindyewu, nwamònu's, ku *disungula*, nudi numòna's. Pa nàнку aci cìdi. . . Bidi bìkèngela bwà wèwè kwikala nàнку. Nudi bumvwe aci.

²¹² *Bwòbò* bàvwa mpopù ànu kwine kwònsò aku; *yèyè* ùvwa blé ànu kwine kwònsò aku. Pa nàнку kī mushipu kutuutawu aku's; mvula kumacila baakàne ne babi. Èyo, nwàcyumvù anyi?

[Mwanèètù wa balùme kampànda ùdi ùkonka ne: “**Kàdi bishi bwà mamuma à muiishi, aci ncifwànyine... nkuyiisha kwà Dīyì anyi?**”—Muf.]

²¹³ Aci, muiishi awu, nànsha nàнку, bu yèyè mwà kwimana mwaba awu ne kuyiishaye Dīyì bu Mwarkanjèlo, nwamònu's, muumvwe maalu masokoka à Bible, ne mwikale mpaasàtà mwîmpè wa dikema, uya kakumbula bantu ne bintu byà mùshindù awu, yèyè mmufwànyine ànu kwikala mujimine. Nwamònu anyi? Mamuma èndè ngàdi àcìleeja musangu wònsò, mwanèètù. Nwamònu anyi? Yèyè, nànsha yèyè mwîmpè wa bishi anyi cidīye aci, ùdi ne cyà kwikala ne Nyumà Mwîmpè mu nsòmbelu wendè. Nwamònu anyi?

²¹⁴ Mpindyewu, Yesù kààkambaku ne: “Bààbùngì nebàlwe Kùndì mu ditùkù adi bàmba ne: ‘Mukalenge, ncyàkambaku bipròfeta (muiishe) mu Dìna Dyèbè, ne mwenze bishimà mu Dìna Dyèbè anyi?’” Ùvwa mwakule mu myakulu, ùvwa mwenze bishimà, mufile dyandamuna, bintu bisokoka byà Nzambì, ne bintu byònsò abi mwaba awu; Yèyè kwamba ne: “Ngumukilaayi apa, nwènù beena mudimu bàà bubì, kacya Mémè ncitu munumanyeku to.” Nudi buumvwe cìndi muswè kwamba aci anyi?

[Mwanèètù Taylor ùdi ùkonka ne: “**Kàdi bishi bwà muntu udi ufila—mukenji wà mafi? Ndi muswè kwamba ne, ùdi—ùdi wèla meeji ne ùdi mu bulelèlè kàdi mwikale ùyiisha bintu byà mafi.**”—Muf.]

²¹⁵ Èè, mèmè ndi ngiitabuuja ne muntu awu ùdi ne meeji matòòke, bu mùdi mwanèètù wa balùme udi musòmbè mwab'ewu ùkeba kwalukila ku wendè. . . kulondeshilula bintu mùshindù awu. Pìikalà muntu awu mmusungula kùdi Nzambì, ne bwòbò bamutwàle kumpàla kwà Bulelèlè, yèyè nèa—yèyè nèaBùjìngùlùle. Nwamònu's: “Mikòòkò Yànyì mmimanye Dīyì Dyànyì.” Udi muumv-. . . Udi muumvwe cìndi njinga kwamba

aci anyi, Mwanèètù Taylor? Ki ciine cyúvwà wamba aci anyi? Nwamònu anyi?

²¹⁶ Mpindyewu, cileejilu, twámbe ne Mwanèètù Crase—Crase—Crase, twambe ne úvwà muyiishi wa ba-Baptistes kàdi kacya kavwaku mumanye kantu nànsha kámwè pà dibatiiza dyà Nyumà Mwímpè to, anyi mene kàvwà nànsha mumanye cimwè cyà ku bintu ebi to, mapà à Nyumà, kàdi pèndè muyiishi mwímpè, wa lulamatu wa ba-Baptistes. Nwamònu anyi? Kàdi katanci aka anyi, Eci kulwaci kumpàla kwèndè. Ne ndi ngiitabuuja ne mwàna yònsò wa Nzambi neikalè... cikondo ne cikondo cyònsò necyele bukòndò too ne pààmupetàYe. Bukalenge kabwèna mwà kulwa pàdi Diswa dyà Nzambi kadiyi dyenzèke to. Ncyà bushùwà. Ne muntu nànsha umwe kààkufwà to, nudi numòna's. Mpindyewu, nwamònu's, ki mùshindù ngwòwò awu.

²¹⁷ Ne Bukalenge bwà mu Dyulu bùdi bu muntu wèla bukòndò mu mbù ne kubùpatulayè. Pàakabùpatulayè, úvwà ne bintu byà mishindù yònsò. Wàkalama mishipa, ne nkùvu ne nkùvu mikesè yà mu màyi matalàle yàkaalukila mu màyi. Wàkabwèla cyàkàbidi, e kukwàtayè ndambù mukwàbò, pàngàpa wàkawàta mushipa ùmwèpelè. Kàdi wàkatùngùnuka ne dyela bukòndò mu màyi too ne mwà keelaye bukòndò mu màyi mwònsò. Nudi buumvwe cindi muswè kwamba anyi?

²¹⁸ Kàdi mushipa awu wùvwà mushipa ku cibangidilu. Úvwà mutèèkiiibwe ànu ku mudimu wà Mfùmù, kwàjikì, e kuwùtèeka mu dijiba dikwàbò mwàmwa mùvwà mutàmbe bwímpè, mutàmbe kutòoka. Kàdi Yèyè úvwà ànu munkaci mwà kwela bukòndò mu dijiba edi dyà ndimbà too ne pààkapàtula Yemù mishipa yònsò yà mu màyi matalàle. Nwamònu cindi muswè kwamba anyi? Umvù cindi muswè kwamba's, Mwanèètù Taylor. Uvwà ne cyà kumanyina ku bèbèbè bàdi kuntu kwàka abu's.

Èyo, mpindyewu:

113. Twambe ne ewu udi... Yèyè ùdi ne bukòntononyi dibà dyònsò pa Nyumà pa bidì bitangila cikondo ne mùshindù wà kwenza maalu anyi?

²¹⁹ Èyowà's, mukalenge. Èyowà's, mukalenge, Nyumà Mwímpè ngudi ukòntonona. Èyowà's, mukalenge. Yèyè ngudi ne bukòntononyi bwèbè wèwè ne wèwè udi ne bukòntononyi pa Yèyè, ne Yèyè kàdyàkukwenzejakù cintu nànsha cimwè cìbèngangana ne Mifundu nànsha. Yèyè neenzè... "Nyumà kènà ùDitwala bibi to." Ncyà bushùwà. Mmwòmo.

²²⁰ "Byumukila kùdi ewu udi mukunange..." Èyowà, aci's cidi—aci's cidi mwab'ewu. Èyo, mpindyewu netùtùpikè tuye kùdi mukwàbò kaaba aka bwà kumòna mwaba wutùdi.

²²¹ Mpindyewu, ndi ngeela meeji ne aci cìvwà ne nshìndamenu. Mpindyewu—mpindyewu, pàndì ntèèla yòyi eyi mpindyewu apa, kwòkò lukonko... Kùvwà kàbidi lukonko pa bwalu ebu

anyi? Tudi bônso tubyùmvwa anyi? Tudi tuumvwa mutùdi tuCìtabuuja mpindyewu anyi?

222 [Mwanèètù wa balùme kampànda ùdi wàmba ne: “Ndi ne lukonko lùm wèpelè.”—Muf.] Elààku. Ànu pa cyòci eci anyi? Èyo. [“Èyo, pa lwòlò alu. Ndi mwenze ànu bu udi mwelàkàne nànkù, kàdi. . .”] Kwèlakanyiku to, eci cìdi—eci cìdi. . . [“Ùvwa wakula bwà muntu udi uyiisha, ne yéyè kàyì uyiisha Mukenji ùdi Kilistò mutwàle awu, kàdi nànsha cinyi cyènzeka mu mudimu wèndè wa bwambi to. Pàdiye utwilangana ne Bulelèlà kàdi ùBùbenga, dîbà adi ncinyi?”] Mmujimine. Numfwileku luse bwà katanci kakesè cyanààna bwà. . . [“Mvwa ngàmba bwà didyanjila-kulongolola anyi mutèèkìibwe kumpàla kwà difùka dyà dyulu ne buloba.”] Ncyà bushùwà. Ncyà bushùwà. Nwamònu anyi? [“Dîbà adi, mutùdi mwà kwamba, kàvwa ne cyà kwikala mùshindù awu to?”] Kàvwa ne cyà kwikalabi mùshindù awu ku cibangidilu to, nwamònu’s. “Bààkapàtuka munkaci mwètù bwalu kabàvwa bàà kutùdi to.”

223 Cileejilu, bu mùdi, ncintu cìmwècìmwè aci mu Ebèlu 6. Nwamònu anyi? Bantu bàdi bumvwija Mufùndu awu bibi be, bàdi beela meeji ne ncyà “kaciyikù mwà kwenzeka to.” Yéyè mwàmbè ne: “Kabyèna mwà kwenzekaku to bwà aba bàkaavwà musangu kampànda bamana kukenkeshila ne bavwijibwe baabanyanganyi bàà Nyumà Mwimpè, bôbò badishinde.” Nwamònu’s, kabèèna ànu bàCyùmfvwa to. Yéyè ùdi wàmba ne: “Kabyèna mwa kwenzekakù to bwà aba bàkaavwa musangu kampànda bamana kukenkeshila ne baabanyanganyi bàà Nyumà Mwimpè, bu mùdibi ne bu bôbò mwà kudishinda bwà kudyalujululaba bôbò biine cyàkàbìdi ku kanyinganyinga, pa kumòna ne bàdi bàpoopela cyàkàbìdi bwàbò bôbò biine Mwànà wa Nzambi pa nkuruse ne baMuzanjika ku bundù bwà patòòke; babalè Mashì à cipungidi àkeedibwaYe naawu ku nkuruse ne ‘ncintu cyà cyanààna,’ bapeetùle byenzedi byà ngàsà.”

224 Èè, bwànyì mèmè, ndibuulula. Bushùwà’s. Bidi ànu bu mùdi Byenzedi 2.38, ne Byenzedi . . . ne Maatàayi 28.19. Bìkèngela ànu ùCyùmfvwè, wamònu’s.

225 Mpindyewu tàngilàayi, ncyòci eci’s, cintu cìmwècìmwè aci. Èè, mpindyewu, yéyè udi wambila beena Ebèlu. Nwamònu anyi? Mpindyewu balàayi mu nshapitá mujimà awu ne kwìnshì, too ne mwaba ùdibo batungunuke bàmba ne: “Bwalu ncintu cyà cikwacisha bwôwà bwà kumata mu—mu byanza byà Nzambi udi ne mwoyi.” Mpindyewu, muntu’s nyéyè ewu ànu bu mwena kwitabuuja wa ku mikalu awu. Mòna, eci’s. . . Mòna, cintu cìmwècìmwè aci civwa mwaba ewu, cileejilu cipwàngàne cìndi mmòna mu meeji àanyì.

226 Nzambi wàkabiikila Izalèèlà bwà kumupàtula mu Ejiipitu. Bantu bônso aba kulwabo, muntu ne muntu

wa kùdìbo wàkápikudiibwa, wàkasabuka Mbù Mukunze kubwela mu cipèèlà. Ncyà bushùwà anyi? Mbù Mukunze. . . Pààkadilongololabo, kutèèleja mukenji wà Mòsà, kwasabò lwendu, (dibingishiibwa) kukudimukabo, kubangilabo lwendu apa.

227 Bààkafika ku Mbù Mukunze, (Mashi), ne bààkapticila mu Mbù Mukunze, nènku paanyimà pààbò benzejanganyi bàà midimu ku makàndà bònsò bàvwa balàle, bafwè. Bàvwa ànu mu ntàntà wà matùkù asatu ne buloba bulaya pa díbà mene adi. Nwamònu anyi? Ki cyònsò civwàbo, bashààdile ku ntanta wa kilòmèètà makumi àsambòmbò ne yìnaayi, nwamònu's. Nànku's ki bwalu mbwàbù, ànu matùkù àbìdì cyanààna àvwa mafwànyìne kubàbweja mwòmò amu bìmpèè.

228 Ki cìndì ngiipacila bwà kuyiisha mu Phoenix mu ndambù wa matùkù emu kuumukila ku mpindyewu, ku disangisha dyà Beena Kantu-ku-byanza, *Bashààle pa Mukùnà ewu*. Kàdì Yèyè wàkabàlama ànu mwaba awu munda mwà bidimu makumi anaayi bwalu bóbò. . . Uh-huh! Nwamònu anyi?

229 Ki kulwabo ku eci ne kutangilabo paanyimà, (bajidìibwè): “Kaa, àlèluuyàh! Nzambi àtumbè! Butùmbi kùdì Nzambi's wè. Àlèluuyàh! Ki cintu cyà kale civwà cintacisha musangu kampànda ncyòci aci, cikaadi cifwè. Mfwankà yà kale yìmvwà munwànwàne kale ayi mmiyè. Maala makolè à kale àmvwà ne ciibidilu cyà kunwa awu àdì àsanganyibwa wònsò mu mbù mukunze wa Mashi à Yesù Kìlistò. Èyì butùmbi kùdì Nzambi's wè! Àlèluuyàh!”

230 Yònsò wa kùdìbo wàkalwa mwab'ewu, bóbò kukungamanganabo ne Kaanààna mpindyewu, kusabukabò Yadènè. Èè, yèyè kwangataye muleeji wa mpàla mu cisàmbà ne cisàmbà cyònsò. Ncyà bushùwà anyi? Ki kubàtùmàyè kuntwaku. Èè, bàmwè bà kùdìbo kwambabò ne: “Ha, ha, ha, katwènakù mwà kwangula mpasu to. To, cidi—cidi. . . Mòna's, twètù's tudì tumwèka ànu bu tupasu ku luseke lwàbò!” Nwamònu anyi?

231 “Mpindyewu, ndi mufwànyìne kwikala nyiisha èkèleeziyà wa mùshindù kaayi pìikalàbi ne ndi mulongèshe Nyumà Mwìmpè awu ne bintàkanyì byònsò byà mùshindù awu abi? Mòna's, nùnkù's ndi mushààle ne nkwasà munda mutupù. Bakwètù ba-Méthodistes nùnkù's mbapàtuke, bakwètù ba-Baptistes, bakwètù ba-Presbytériens.” Bàlekèlaayi baye. Bóbò abu bàvwa mbuji ànu kwine kwònsò aku! Nudi nujinga mìkòòkò, nwamònu's. Nwamònu anyi? Nwènù kanwèna nudìisha mbuji to. Dishaaayi mìkòòkò's! Bìdì ne dikwacisha kaayi bwà kudiisha mbuji pàdì. . . ? . . . pàdìku mìkòòkò yà kudiisha? Nwamònu anyi? Nènku's ki—ki bwalu mbwòbù ebu mwab'ewu, nwamònu's. Mvwa misangu yònsò ànu ngàmba ne nényiishè makunji anaayi kàdì kuyiisha Bulelèlà, Èkèleeziyà. Èyowà's, mukalenge, lwàku apa.

232 Kàdi mōnaayi mpindyewu, mmwenze ncinyi? Bààkaalukila, nènku Yoshùwà ne Kaalèbà, byà pa lukàmà bibìdì, anyì aci ncyà pa lukàmà cyà mùshindù awu. . . bàbìdì pa. . . byà dikumi ne bibìdì byàbò bibìdì, byà dikumi ne bibìdì bibìdì. Èè, bàvwa dikumi ne bàbìdì bajima, bàvwa bàbìdì pa dikumi ne bàbìdì, byà dikumi ne bibìdì byàbò bibìdì e kuCìitabuujabo. Kusabukabo buludi ne kubwela mu buloba bulaya, bàmba ne: “Balumyana wa yààya, ewu’s mmwaba mwîmpè be wà kusanganyiibwa.” Mukulumpe Yoshùwà ne Kaalèbà, balumyana wa yààya, bàvwa beeyemene Dìyì; Nzambì wàkabapabù, wàmba ne “abu mbwènù nwènù.” Bwòbò kuya, e kwapulabò bisùmbùsumbu binène byà tumuma twà mvinyò, ki bwòbò aba balwa bapulùmùnàngàne naaci mùshindù ewu. “Lwàyi kunu, balùmyanà! Ewu mwaba’s ngwà dikema! Labùlaayibi tǔng,” nwamònu’s, tumuma twà mvinyò twà bunène *abu’s*.

233 Nènku, kaa, balùmyanà wa yààya, bòbò kutùmòna, kwambabo ne: “Aa, katwènakù mwà kwangula mpasu to.” Pààkaalukilabo, kwambabo ne: “To, mwanèètù, Mòsà ewu mmutùpàtule mulwè nèètù mu cipèèla emu,” Nyumà Mwîmpè ewu, nudi numòna’s, uvwayè uleeja mpàla awu ne: “mmutufikishe mwaba ewu mu cipèèlà emu. Kadi’s ki twètù aba, mudimu wètù wà bwambi mmunyanguke, nènku katùvwa bafwànyine kwenza cintu bu nàнку to.”

234 “Bàalukila,” nwamònu’s, “aba bàkaavwà musangu kampànda bamana kukenkeshila, babingishìibwe ku diitabuuja, bajidiibwe.” Nwamònu’s, bàdi basabuka cyoshelu ciibìdì eci ne batangila mu buloba bulaya. “Twètù bàakamanabo kukenkeshila musangu kampànda ne bàkaadi. . . balabule mapà à ku Dyulu.” Nwamònu’s, “baMulabùle” Yèyè. Bàvwa babìtwale. “Tudi tumòna ne Ncyà bushùwà. Tudi tuCìmòna ànu bulelèlà.” “Balabule mapà à ku Dyulu, bavwijìibwe baabanyanganyi bàà Cintu eci, nudi numòna’s, Nyumà Mwîmpè ewu, baMwabànyàngane.”

235 “Abi’s mbîmpè, balùmyanà wa yààya, tàngilàayi muntu wàwa—wàwa nàka. Mòna’s, ndi mumanye ne yèyè ùvwa mpfofo, mpindyewu ùdi mwà kumòna. Tàngilàayi mukulumpe awu. . . Balùmyanà wa yààya, cidi cyenzèkèle mulùmyanà awu ncinyi? Nganyi uvwaku mwà kwela meeji ne mwànà awu udi pambelu pààpa wàwa kàyì ne kàlaasà kalonga. . . ki yèyè wàwa mwimane ne Kapyà pa buloba.” Nudi numòna anyi? Nwamònu anyi? Nwamònu anyi?

236 Ne pashiishe badishinda, nwamònu’s, ne bàdi ne. . . bwà kudyalujululabo bòbò biine, kwalukila cyàkàbìdì ku kanyinganyinga, kwalukila ku diyishi kanyinganga pamutù pa civwàYe mwambe kumpàla, kutèèka. . . tudi. . . Nudi bamanye’s, bwà kwasa cyàkàbìdì bishimikidi byà byenzi bifwe byà kanyinganyinga, ne bikwàbò. Ke citwènza, bu Nzambì mwà kwanyiisha, nudi numòna’s. Nwamònu’s, netwènzè nàнку awu.

Netwàlukile cyànyimà bwà kwasa cishimikidi eci dîbà adi, kàdi kwalukila ku kanyinganyinga kiine, bwà kunyingalala ku cyôci aci bwà kwikala kwôkò aku. “Ndi ngùmvwà bibì bu mùmvwà kuntwaku,” ne kuvwija Mashi à cipungidi àvwaye mujidiibwe naawu bu ne Cìvwa “cintu cyà pàtupù,” ne mumane kudyombola byenzedi byà ngàsà. Yèyè ukaadi muye, mwanèètù! Kwajiki. Kwendè nkumane kujika. Nwamònu anyi?

²³⁷ Èè, mpindyewu, nwamònu’s, kabyèna mwà kwenzekaku bwà mwànà musungula kwenzaye nànkù to. Yèyè kààkwenzakù aci to. “Mìkòòkò Yànyì mmimanye Dìyì Dyànyì.” Yòyì mibìikidiibwe mu Kaanàànà anyi nì mpenyi pònsò, yìyaaya. Nwamònu anyi? “Mìkòòkò Yànyì mmimanye Dìyì Dyànyì.”

[Mwanèètù wa balùme kampànda udi ùkonka ne: “Nènku bìdi bìkèngela bwà bóbò kwitabuujà Byenzedi 2.38, kàbìdi, kí mmwómò anyi?”—Muf.]

²³⁸ Aci’s ncifwànyine kwangata bwalu abu, kantu ne kantu kàà mu Mifundu, kuBibweja byònsò munda. Ncyà bushùwà menemene, mwanèètù.

114. Kùdikù yibìdi, kùdiku—kùdiku mishindù yibìdi mishìilàngàne ya myakulu yà mu Bible anyi? Kùdikù dishìilangana mu myakulu yìdi yàkudiibwa mu disambila dyà pàànkààyà, ne mu èkèleeziyà mùdi dyandamuna dilòmbiibwe anyi? Mu Ditùkù dyà Mpenta myakulu yivwa yùmvwika kùdi bantu bà matùngà mashìilàngàne; kàdi mu Kolintò wà Kumpàla 14.2, myakulu myenyi yàkudiibwa kùdi Nzambi, kí kùdi bantu to. Kolintò wà Kumpàla 13.1 ùdi ùleeja eyi yà bantu . . . (K-o-l, ngeela meji ne n’Kolintò 13, cìdi . . .) . . . kùdi yà bantu ne mikwàbò yà banjèlò.

²³⁹ Kaa, èyowà’s. Nwamònu anyi? Èè, cìdi . . . Mpindyewu, mwanèètù, nànsha wèwè mwikale nganyì, wèwè—udi mwandàmùne wèwè mwine lukonku lwèbè mwaba ewu. Nwamònu anyi? Nwamònu:

Kùdikù myakulu yibìdi mishìilàngàne anyi? (Kudi myakulu mishìilàngàne búngì cyanàànà. Nwamònu anyi?) **Kùdikù myakulu yibìdi mishìilàngàne mu Bible, myakulu yibìdi mishìilàngàne anyi?**

²⁴⁰ Mu Ditùkù dyà Mpenta ditùnga ne ditùnga dyònsò dyà mwinshì mwà Dyulu divwa kuntwaku ne myakulu. Nwamònu anyi? Èyo.

Ne kùdikù dishìilangana pankaci pàà myakulu myakula mu disambila dyà pàà nkààyà ne mu èkèleeziyà mùdi dyandamuna dilòmbiibwe anyi? Èyo.

²⁴¹ Pòlò mmwakùle kàbìdi lwà mu Kolintò mùvwà ukonkela emu, ne mmwambe ne: “Kùdi myakulu yà banjèlò ne kùdi myakulu yà bantu.” Mpindyewu, myakulu yà banjèlò mpàdi muntu ùdisambidila—ùdisambidila kùdi Nzambi, pàà

nkàayendè. Kàdi pàdiye wàkula mu—mu mwakulu kampànda, bìdi ne cyà kwandamunyiibwa mu èkèleeziyà, bwà diibakiibwa dyà èkèleeziyà. “Ewu udi wakula mu mwakulu mwenyi awu ùdi ùdiibaka yèyè mwine; kàdi ewu udi wakula . . . ewu udi wamba cipròfetà ewu udi wibaka èkèleeziyà.” Ki kwambayè ne: “Mbipicìibwe ne mêmè mwakùle myakù yitaanu ne luumvu kutàmba binunu dikumi mu mwakulu mwenyi, pakuumusha, ànu kwòkò kwikale dyandamuna.” Dìbà adi ncyà—ncyakùdiibwe dìbà adi ku cipròfetà cidi munkaci mwà kwibaka. Nwamònu cìndi muswè kwamba anyi?

²⁴² Mpindyewu, kùdi . . . Mpindyewu, kùdi myakulu yìbìdi mishìlàngàne, yà bantu ne yà banjèlò. Nwamònu anyi? Ki Pòlò kwambayè ne: “Nànsha mêmè ngaakula mu myakulu yà bantu ne yà banjèlò,” nwamònu’s, bantu ne banjèlò, myakulu yònsò yìbìdi eyi, ewu ùdi kawùyi mwà . . .

²⁴³ Mpindyewu, ki mwaba wùdi beena Mpenta, bantu bàtù bàmba ne myakulu ncileeki abu, bangambile ne: yèyè ne: “Mpindyewu, Mwanèètù Branham, wèwè udi mu cibwejàkàjì.”

²⁴⁴ Yèyè ne, mêmè ne: “Èè, wèwè mumupete bilondèshile Byenzedi 2.4, dìbà adi bantu bònsò bàvwa bakuumvwe wakula mu mwakulu wàbò wà ku dibèlè awu.”

“Kaa!” mwàkambàye. Nènku ne: “To! To!” mwàkambàye.

Mêmè ne: “Bushùwà’s. Èyowà’s, mukalenge.”

²⁴⁵ Yèyè ne: “Mpindyewu, Mwanèètù Branham, wèwè udi mu cibwejàkàjì.” Yèyè ne: “Udi wakula bwà . . .” Yèyè ne: “Kùdi myakulu yà ‘banjèlò.’ Awu’s mmwanjèlò wa Nyumà Mwìmpè udi upweka wakwila mu wèwè amu.”

²⁴⁶ Mpindyewu, cidi cyumvwika cìmpè, nwamònu’s, cidi cyumvwika ànu bu ne ncifwànyine kwikala bulelèlè bwàbùngì, kàdi kì m’Bulelèlè bwònsò to. Pààkambila Sàtaanà Eva ne: “bulelèlè menemene kanwàkufwà to,” aci cìvwa . . . wàkamwambila bulelèlè bwàbùngì, kàdi kacìvwa Bulelèlè to. Nwamònu anyi?

²⁴⁷ Mpindyewu, kwambayè ne: “‘Bantu ne banjèlò,’ ne mwanjèlò uvwayè wamba awu ne ùvwa . . .”

²⁴⁸ Mpindyewu, tumònaayi ne kabyàkunwàngana ne Mufùndu to. Nwamònu anyi? Mpindyewu, kabyà “kukwacila mudimu pàmwè to,” ke cìndi muswè kwamba. Mfwilaayiku luse, ncìvwa ne meeji à kwamba ne “kunwàngana” ne Mifùndu to. Ndi muswè kwamba “kukwàcila mudimu pàmwè” ne Mifùndu, anyi “kulonda, kupetangana” ne Mifùndu ke mwàkù mutàmbe bwìmpè.

²⁴⁹ “Mpindyewu, muntu udi wàkula mu myakulu yà banjèlò,” yèyè udi wamba ne: “aci’s mmyakulu yà Nyumà Mwìmpè ayi” kwambayè ne: “mpindyewu, panùvwà, patùvwà, pàvwàbo bapete Nyumà Mwìmpè.”

Mêmè kwamba ne: “Bàvwa... Pàvwàbo, mpenyi panwàkaMupetela?”

²⁵⁰ Èè, mmungambile ànu menemene mwaba awu, kasunsa ne dibà adi. Ncyèna ngeela mpatà ne bìvwa nànkù to. Nwamònu anyi? Ncyèna ne... Ncyèna mulumbulwishi wendè to. Nwamònu anyi? Yéyè ne: “Ki mwaba úmvwà mwakùle ngwòwò awu.” Úvwa mumanye menemene mwaba mwine awu. Yéyè ne: “Cintu kampànda cyàkangenzekela.”

²⁵¹ Mêmè ne: “Ndi nciitabuujà. Nwamònu anyi? Kàdi aci kacìvwa ànu cileeji cyà Nyumà Mwîmpè kùdi wèwè to, mwànàanyi wa balùme.”

“Kaa, èyowà!” Yéyè ne: “Aci, cìvwa ncyòcì!”

Nènku: “To.”

Yéyè ne: “Mpindyewu, tàngilà, ndi muswè nkwabibile cintu kampànda, mwanèètù.”

²⁵² Mêmè ne: “Bantu bàà mu batèeleji bèèbè, mu èkèleeziyà awu wa mu Indianapolis múvwa mwambe ne ke múvwa muMupetèle amu, bantu abu bàvwa bakuumvwe wakula mu Anglais ùbàmbila bwà dibìika dyà ku lufù ne bukòlè bwà Nzambi ne bikwàbò byònsò anyi?”

Yéyè ne: “Mòna’s, to! Mêmè’s ngaakaakula mu—mu myakulu myenyi.”

²⁵³ Mêmè kwamba ne: “Kwenakù mumupete bilondèshile Byenzedi 2.4 to, bwalu cyònsò... kakùvwa mwaku ùmwè mwenyi to. “Tudi tuumvwa muntu ne muntu mu mwakulu wètù twètù.”

²⁵⁴ “Kaa,” mwàkambaye, “Mwanèètù Branham, ndi mmòna mwaba wùdi mu cibwejàkàjì.” Yéyè ne: “Udi umòna’s,” yéyè ne, “kùdi myakulu yìdi myakulu yà banjèlò, paùdi upeta Nyumà Mwîmpè,” yéyè ne: “dibà adi udi wakula mu myakulu ne kabyèna bikèngela bwà muntu nànsha umwe kuyàndamunaye to, aci’s—aci’s n’Nyumà Mwîmpè munkaci mwà kwakula. Nwamònu anyi? Kàdi pashiishe udi ne dipà dyà myakulu, ne aci cidi ne cyà kwikala dyandamuna.”

²⁵⁵ Mêmè ne: “Dibà adi’s udi mucyòmpàkaje maalu. Mu Ditùkù dyà Mpenta bàvwa bacyòmpàkaje maalu. Kumpàla kwà kupetabo Nyumà Mwîmpè, myakulu myenyi, bààkaakula mu myakulu yìvwàbo bumvwa.” Nwamònu anyi? Pa nànkù mu bulelèlè bìvwa... .

²⁵⁶ Kùdi myakulu yìbìdi mishiilàngàne. Myakulu yà banjèlò, aci’s mmuntu mu disambila dyà pàà nkààyendè mwaba kampànda munkaci mwà kwakula ne Nzambi, wàkula ne Nzambi mu myakulu yà banjèlò. Ndi mufwànyine ànu kunùvùlwija bwalu bwà mùshindù awu bùmwè mpindyewu mene, kàdi ncyèna ne dibà to. Nudi bàvùluke pààkalwà mukàjì awu mu dibalaasa kuntwaku, mùvwa Docteur Alexander Dowie

mupàtukile amu, ku Siona. Nudi bavuluke pàmvwà kuntu aku anyi? Ki Billy kulwaye kundonda bwà kuya naanyi ku disangisha, ki mêmè ne: “Billy, alukila.” Ki mêmè. . .

Yèyè ne: “Cyûdì udila ncinyi? Muntu kampànda ùvwa mwaba ewu anyi?”

²⁵⁷ Mêmè ne: “To, mukalenge. Wèwè alukila, ambila Mwanèètù Baxter bwà kuyiishaye dilòòlò edi.”

²⁵⁸ Ki mêmè kutwa binù panshì apu mêmè kwamba ne: “Mukalenge, mbwalu kaayi ebu kùndi?”

²⁵⁹ Ki dyàkàmwè mêmè kuumvwa Muntu kampànda ku ciibi aku, wàkula mu myakulu mikwàbò. Mêmè kudyàmbidila ne. . . Cìvwa mmu ci-allemand. Mêmè kudyàmbidila ne: “Èè, mulumyana awu mmulwè bwà kupeta. . .” Mêmè kwimana, nudi bamanye’s, munkaci mwà kusambila, mêmè kumuteeleja mwimane mwaba awu mùshindù ewu. Ki mêmè kudyàmbidila ne: “Èè, mmunyi mwíkala mulùmýànà awu mwà kucyùmvwà?” Bwalu mvwa mumanye muntu uvwa ulombola nzùbu wa cilààla-beenyi awu, ntàntà wa kilòmèètà mitwe ku mwandamukulu pambelu pàà cimenga eci, nudi bamanye’s. Bivwa bikèngela bwà mêmè kupàtùka mwaba awu (bantu búngì cyanàànà nu nyungulukilu amu), kaacimenga kakesè. Mêmè ne: “Èè, ebu’s mbwalu bwà dikema. Uh.” Ki mêmè ne: “Mwaba awu. . . Èè, balùmýànà wà yààyà, nukààdikù buumvwe. . . cidi. . . Mulùmýànà awu kèna nànsha mwà kweyela to, mbikolè’s.” Nwamònu’s, mvwa ndyambidila nàнку, mùvwàye wàkula ne mwèndè mwònsò! Èè, mêmè ne: “Èè, aci, mòna’s, ùvwa mmêmè’s!” Ki mêmè kushààla ànu mupuwe, nwamònu’s, ncinyi ngààkula nànsha kantu. . . ànu mushààle mupùwe vii. Paanyimà pà katançi Yèyè kujikijaye dyakula, nènku, pàkenzaYe nàнку, mêmè e kudyùmvwà bu mufwànyine mwà kupicila munkaci mwà musùmbà wà bàsàlaayi ne kutùpika cimanu.

²⁶⁰ Ki mêmè kupàtùka pambelu ne Billy ùvwa ùpàtuka ku ciibi cyà lupangu ki mêmè kumwela lubila ne: “Indila kakesè!”

²⁶¹ Kwalukilayè, ùvwa munkaci mwà kunwà ka soda. Ki yèyè ne: “Papa bwalu bùdi bishi?”

²⁶² Mêmè ne: “Anji indila kakesè, ànu kakesè cyanàànà, Nyààya neebè.”

²⁶³ Mêmè kubanga kwowa màyi kwìsù ne lukàsà lwònsò. Yèyè ne: “Mbwalu kaayi ebu?” Pèndè’s mmumanye ne kí mbìmpè kwakula naanyi to, patùyaaya mu disangisha apu. Yèyè ne: “Mbwalu kaayi abu?”

²⁶⁴ Mêmè ne: “Kì ncintu to, kí ncintu to, kí ncintu to, nànsha kakesè. Tutungùnùke ànu too ne mu disangisha.”

²⁶⁵ Twètù kuya mu disangisha adi, Mwanèètù Baxter ùvwa musòmbe mwaba awu wimba ne: “*Kakwèna cintu nànsha cimwè*

pankaci pàà musùùkà wànyì ne Musùngidi to.” Kubwelaye, kwambaye ne: “Yoyòyò! Mvwa ngeela meeji ne kwàkulwa to!”

Mémè ne: “Sh.” Mémè e kubànda kutwàdija kuyiisha.

²⁶⁶ Pangàjikìjì, pabwìpì ne dìbà dingàjikìji kuyiisha, èè, balùmyàná, bìvwa byenze ànu bu ne muntu kampànda ùvwa mubùcikile mwinshankùnyì mwà citanda aci, mu ndekeelu mwà dìmàlaasa dinène adi. Kutùmabò cìkolokolo cyà katàmbakanà aci muntwamu, ne kùvwa mukàji kampànda mu ndekeelu amu ùbànda ùpweka ne kajila aku, wela mbila mikolè ne mwèndè mwònsò muvwaye mwà kwela mbila amu.

²⁶⁷ Mémè kujandula, ne ùvwa ne dísamà dyà cyàdì, ne ùvwa muumukile mu Twin Cities, mu Saint Paul, màshinyì à cyàmbula babèèdi kààvwa maswè kumwambula to bwalu bàvwa ne bwòwa bwà ne ùvwa mwà kutaayika bisùlusulu byèndè. Ngàngàbukà kwambaye ne: “Cintu kanà cyònsò, bisùlusulu byèndè bìvwa bu mùdì nsàpu wa bwìci,” yèyè ne: “byòbì ànu bicibùluka mmufwànyine kufwà. Bwalu pààbù bùmba butùuka.” Ke bàmwè bansantu kwangatabò kàshinyì kàà Chevrolet kà mu 38, ne kwangatabò nkwasà wa paanyimà kumwakajabò, kumutèèkabòmu kwikila mu njila bwà kuyabò kuntwaku. E kudikumabo ku kabùmbà kakesè anyì ku cintu cikwàbò lwà panshi apu, e kubangayè kupùmuna mashi, ke kubangaye ànu kutùnkumwina mashi panshi, nènku mukàji awu . . . àvwa amupatukila mu dyùlù ne bikwàbò byònsò byà mùshindù awu. Kubangaye wenda ùteketa ànu kuteketa, ne ndekeelu wa byònsò . . . Kàvwa muswè kufwila mu kàshinyì aku to, kubàmbilaye bwà kwimanyikabò kàshinyì ne kumulààdikabò mu mashinde.

²⁶⁸ Kumupatulabo pambèlu. Nènku bònsò bàvwa biimane bamunyangulukile, basambila, nènku dyàkàmwè mukàji awu kwambayè ne cintu kampànda ncimulengè e kumbà kwimanyinayè kuulu. Ki kuyayè, wenda wèla mbila mikolè mu njila amu, ne mwèndè mwònsò. Ki yèyè uvwa mu èkèleeziyà ewu, wenda ùbanda ùpweka ne kajila aku.

²⁶⁹ Mémè ne: “Mwanèètù wa bakàji, aci cìvwa ndìbà kaayi?” Ndìbà ànu dìmwèdìmwè adi menemene dìvwà Nyumà Mwìmpè wàkwila kùndì. Cìvwa ncinyì? Mapà.

²⁷⁰ Ncinyì cìvwa—cìvwà opossu mu kale awu mulààdile kuntu kwàka nàka ku ciibi cyà lupangu bwà kumusambidilabo aci’s? Nyama mupangi, kàyì nànsha ne musùùkà to, kàyì mumanye kusunguluja bwìmpè ne bubi to; nwamònu’s, kàyì ne musùùkà to, (ùdì ne nyumà), kàyì musùùkà to.

²⁷¹ Cìvwa ncinyì aci? Nyumà Mwìmpè mwikale wenza dyakwilangana. Nzambi wàkatùma dipà pa buloba, ne Nyumà Mwìmpè kàvwakù mwà kwindila kàbidì ntanta mule to pa nànkù ke kulwaYè kungangata ku bukòkeshi kubanga kuDyakwila mùshindù awu, ùDyakwila, wenza

dyakwilangana Yéyè mwine. Kàdi patwàkakenketa dîbà, pa kasunsa kàmwèkàmwè kavwàye... bamupatule pambelu e kumulàdikabò panshi mùshindù awu aku, bàvwa baswè kumòna... Bwalu bàvwa bamanye ne ùvwa munkaci mwà kupùnga ne lufù, bìvwa bikèngela bwà kwambabo ne mmu dîbà kaaayi mùdiye mufwè. Pàvwa mpa kasunsa mene aku pàvwa Nyumà Mwimpè mumpwekele pambidi kuntwaku ne mubange kwenza dyakwilangana, wamba mèyi, mèyi, àmvwà nciyi mwà kuumvwa to, nwamònu's, mùshindù awu, munkaci mwà kufila mèyi. Ki Nyumà Mwimpè ùdi munkaci mwà kwakula awu's.

²⁷² Kabìvwa bikèngela bwà mèmè kumanya aci to. Nwamònu's, nciwva mucimanye to. Ùvwa nyéyè... pàmwàpa mwanjèlò wendè awu. Netùfike ku cyòci aci mu tusunsa tukesè emu, nwamònu's, uvwa mulwè mwaba awu ne kufila mukenji awu, nudi numòna's.

²⁷³ Mpindyewu—mpindyewu, aci's—aci's ncyà bushùwà. Kùdi myakulu yibidi mishilàngane, umwe wa kùdiyi ùdi ne cyà kwikala... .

²⁷⁴ Kùdikù lukonko anyi? Èyo, ùteeta kumanya cìdi Nzambi wàmba, nudi numòna's. Mpindyewu, ndi mufwanyine—ndi mufwanyine kwamba ne, Mwanèètù Stricker, mu cyòci aci, bwà bidì bitàngila cyòci aci, kùteeci kwela meji pa bwalu abu to, wamònu's. Lekèlaayi ànu Nyumà adyàkwilè Yéyè mwine. Kùteeci bwà kucyùm vwa to, wamònu's, bwalu ùtambe ànu kudilekelela kùdi Nyumà. Nwamònu anyi? Bwalu udi uteeta bwà—bwà—bwà kwamba ne: “È, cyùdi wamba ncinyi?” Nwamònu anyi? “È, mèmè ngùdi wambila anyi? Huh?” Nudi numòna's, yéyè ùdi... .nwamònu's, ùdi ùteeta.

115. Mpindyewu. Mbímpè bwà muntu kwakulayè mu myakulu pàdiye ùsambidila bakwàbò ku cyoshelu [Katùpà kàà mukàbà wà mèyi munda mutupù—Muf.] **kakùyì dyandamuna anyi?** [Katùpà kàà mukàbà wà mèyi munda mutupù.]

²⁷⁵ Ndekèlaayi mmònebi cìndi mufunde pa bwalu abu, bikèngela ntàngile. Kwòkò kakùyì mwandamunyi to, bàpuwe. Mu Kolintò wa Kumpàla, nshapità wa 1... , nshapità wa 14 ku mvnsa wa 28. Nganyì udi ne Bible? [Mwanèètù wa balùme kampànda ùdi ùbala Kolintò wa Kumpàla 14.28—Muf.]

[... kwòkò kakùyì mwandamunyi to, àshaale mupùwe mu èkèleeziyà;...]

²⁷⁶ Èyo. Mpindyewu, kwòkò kakùyì mwandamunyi to, dîbà kanà dyònsò mu èkèleeziyà, mwaba kanà wònsò mu èkèleeziyà, nùpuwè pìikalàku kakùyì mwandamunyi to.

²⁷⁷ Ku cyoshelu, cintu cìmwèpelè cìdi muntu kampànda... Misangu yàbùngi nutu nuumvwa bantu bàtù baya ku cyoshelu. Mvwa muumvwe mwanèètù wa balùme kampànda wa mushinga mukolè ànu àbidi àdi panshi aa ku cyoshelu, mupweke ànu

cyanàànà kàdi kunyukusha muntu kampànda paanyimà, ne pashiishe wàkula mu myakulu yéyè mwine, ùyàkula mwenze bu ùteeta kumuleeja cyà dyenza. Nwamònu's, aci ncyenze bu mùshindù kampànda mukwàtakaja wà kutwàla Nyumà Mwimpè (ùteeta's) kùdì bantu. Kanwenji nàнку to. Nwamònu anyi? Cintu cyà dyenza cidi ànu cyà kulekela muntu awu nkàayendè. Mulekele èlè byanza byèndè muulu too ne pàdi Nyumà Mwimpè ùbwela, nudi numòna's. Nwamònu anyi? Pa nàнку kî—kî—kî mbimpè to. To, bìvwa bikèngela kushààlabo bapùwe mu èkèleeziyà, nwamònu's.

278 [Mwanèètù wa balùme kampànda ùdi ùkonka ne: “Mwanèètù Branham?”—Muf.] Èyowà's, mwanèètù. [“Amba tũng muntu kampànda mwikàle mu disangisha kampànda nènku—nènku ku ndekeelu kwà disangisha, pa ciibidilu dîbà kanà dyònsò didi mukenji ùpàtuka, muntu udi ne dipà, neikale mukùmbàne bwà kwamba, anyi ùdi mwà kwamba dishiilangana didi pankaci pàà—pàà mwanjèlò . . .mwakulu wà mwanjèlò anyi mukenji wùdi wùpàtukamù awu ànyì?”]

279 Mpindyewu, twànji tumònaayibi. Mpindyewu . . . [Katùpà kàà mukàbà wà méyi munda mutupu—Muf.] . . . pàdìbo ànu bàbwela ne bafùnda cintu aci, bacitèeka pa birò byànyì. Nwamònu anyi? Nènku ndi mufwànyine kucibala ànu mùshindù ewu. Kàdi pàmvwà mbwela mu cibambalu amu, mwanèètù, bwalu bìvwa bujika. Nwamònu anyi?

280 Kàdi kumpàla kwà kubwelabò munwemu, bàvwa ne cyà kwimana paanyimà apa ne muntu ne muntu kacya wàpùwa ànu vii. Nènku mwanèètù wa bakàji awu neikalè mufwànyine kwikalakù, Mwanèètù wa bakàji Irene, lwà ku—ku cyoshelu aku, mwikàle wimba mwaba awu, wimba *Ku Nkùruse*. Katwèna bafwànyine . . . Baawisiye bàvwa ànu bènda bàtàmbakana ne bikwàbò. Bwòbò bamòna muntu kampànda wàkula, mbafwànyine kwamba ne: “Sh, sh, sh.” Nwamònu anyi? Kàdi bàna bwòbò biikàle ne . . . Mbafwànyine kusòmba panshi ne kalolo kwamba ne: “Nzùbu wa Mukalenge, munanga wanyì. Kabìvwa bikèngela bwà wèwè kwenza nàнку to. Bìvwa bikèngela bwà wèwè kuditwala bimpè mpindyewu mu nzùbu wa Mukalenge.”

281 Nènku mulùme ne mukàjèndè, ne bwònsò abu, bàbàleeja kwà kulembelejilabò nkooci yàbò ne bintu byà mùshindù awu. Muntu kampànda ku ciibi bwà kubàakidila ànu pàdi ciibi cyùnzuluka dyàkàmwe. Kùdì . . . ne bintu byònsò bilongolola bwà kubanga, nudi bamanye's, kuteeka èkèleeziyà mu mùshindù mujaalàme. Muntu yònsò mupetela nkwasà bwà kumòna ní bàvwa basòmbe.

282 Nènku mvwa nsanganyibwa mu cibambalu amu, nsambila, mvwamù pàmwàpa kubangila pa dîbà yibidi anyi yisàtù jaajaaja

mu mapingaja amu. Muntu nànsha umwe kàvwa ùntàcisheku to. Mvwa mpweka kuntwaku ne mukenji wànyì.

²⁸³ Ne pashìishe ànu pa díbà mene dyà kubanga, mulombodi wa misambu ùvwa ùtuma musambu ne: “Tubuululààyaaku mu musambu nombà *kampànda*,” bu nàнку, *Ku Nkùruse kwàkafwila Musungidi wanyì*, ànu nàнку awu, nudi bamanye’s, byènda biya ànu nàнку. Díbà adi nwènù bamanè kwimba misambu mitwè ku yibìdì yà pabwàyì. . . Twètù katùtukù tufila díbà dyàbùngì menemene mu kwimba kwà misambu to; Díyì ke didì ne bwalu. Bòbò biikale ne masangisha à kwimba kwà misambu, ki cidìbo benzela masangisha aa à kwimba kwà misambu pa ciibidilu. Tudi—tudi. . . Díyì ki cintu cidì citàmbe kwikala cyà mushinga cìdì bantu bàlwila, n’nzùbu wa dilongolwelamu bilema.

²⁸⁴ Ne pashìishe pàmwàpa mukwàcishi, bu mùdì Mwanèètù George, Mwanèètù George DeArk, ùdì ùjuuka kuulu wenza disambila. Nènku díbà adi tudi bafwànyine kwikala ne musambu wà pabwàwù, cyenze bu musambu wà muntu nkààyà anyì cintu kampànda cyà mùshindù awu’s. Nènku pàvwà díbà dikumbana, muntu kampànda ùvwa ùmmanyisha ne díbà dikaavwa dikumbàne bwà mèmè kupàtuka. Dyòdì dikumbàne, èyo, mvwa mufwànyine kupàtuka ne cyashima cyònsò mwinshì mwà dilaabiibwa. Nwamònu anyi?

²⁸⁵ Èè, pàmwàpa lumingu alu bàvwa benze disangisha mwaba kampànda mu èkèleeziyà emu, benze disangisha dyàbò bòbò biine. Pàmwàpa kumpàla mene kwà disangisha kukangukadi dilòlòlò adi, bàvwa benze disangisha. Kàdì’s ki dyòdì edi. . . Ndi naaci mwab’ewu, ngàmbe ne: “Mbafùnde mwab’ewu pa díbeji edi ne nekùlwe mvula kampànda wa cipùpu mu ditùnga dijimà emu lumingu lùlwalwà elu,” anyì cintu kampànda, cintu, nudi bamanye’s, cintu kampànda cyà mùshindù awu necyènzekè. “Cìvwa cifùndiibwe, cyakùdiibwe mu myakulu, ne bacyandamune kùdì bansantu bàbidì bàà mu èkèleeziyà emu, Mwanèètù *Kampànda* ne Mwanèètù *Kansanga*. Baantemù bàbidì mbacifidile bujaadiki kaaba aka, mbafùndepu mènà àbò, bwà ne cìvwa cijaadikiibwe ne ‘ncifwànyine kwikala cyà kùdì Nzambi,’ n’*kampànda* ne *kansanga*.” Ki cyànyì citùpà cyà kumpàla ncyòci aci.

²⁸⁶ Pashìishe mèmè kwamba ne: “Èyo, netùdilongòlòlè bwà cyòci eci, muntu ne muntu ikale mu disambila. Nwamònu anyi? Mpindyewu kùdikù dilòmbà dyà pabwàdì anyì, bantu bònsò?” Nudi bamanye’s. “Tusambilààyì.” Kwimanabo ne kusambila. Buludi ku Díyì, ànu ku Díyì.

²⁸⁷ Pashìishe dyàkàmwè paanyimàà pà disangisha dimane kujika, dibikila dyà ku cyoshelu adi dyenjiiibwe. Nwamònu ànyì? Dibikila dyà ku cyoshelu ke dyòdì ditùvwà bafilèèje, dibikila dyà ku cyoshelu, bwà kufikisha bantu ku cyoshelu.

Ne pashishe paanyimà pàà dibùikila dyà ku cyoshelu adi dimane kujika, pàmwápa díbà adi ndi mufwànyine kusambidila babèèdi, nwamònu's, anyì cintu kampànda bu nàнку awu.

²⁸⁸ Disangisha dyònsò dyambulwila kuulu bwalu nyumà yà baprófetà yìdi yikòokela muprófetà.

²⁸⁹ Ki cìmvwà ngeelela meeji...Nudi bavùlùke dilòòlò dingààkamònà cikèènà-kumònà adi pààkalwa mwanjèlò awu kúndi anyi? Mvwa musòmbe mwaba awu mu cibambalu amu, munkaci mwà kwela meeji. Bu mùdi, kaa, ànu munda mwà bufùkù menemene emu, bàmba ne: “Nyumà wa baprófetà ùdi...’ Ciine aci ncifwànyine kwenzeka bìshi?” Mémè e kutàngila Bukènkè bùvwà bwèla nsènsà abu, kàdi ki Yèyè ulwàlwa ewu wènda ùpweka mutàngile lwà kúmvwà aku. Nwamònu anyi? Ki pààkantumaYè ne mudimu ànu mwaba awu, nwamònu's, kùdi masangisha aa.

²⁹⁰ Mpindyewu, to, mu—muntu udi ufila mukenji awu. Aci, ke lukonko lwèbè ndwòlù alu, ngeela meeji, “Muntu udi ufila mukenji awu, ùvwa mufwànyine...muntu udi—udi ufila mukenji, mmufwànyine kumanya ne uvwa mmwanjèlò wa Mukalenge anyi kí nyèyè to anyi?”

²⁹¹ [Mwanèètù wa balùme kampànda ùdi wàmba ne: “Mpindyewu, lukonko alu lùvwa ne, udi wamba ne kùdi myakulu ya banjèlò...” Katùpà kàà mukàbà wà mèyì munda mutupù—Muf.] Ncyèna ngeela meeji ne mmufwànyine kucimanya to. Mpindyewu, bwà mùshindù utùdi naaci mpindyewu ewu. Kàdi, nwamònu's, patùdi tufika mùshindù ùvwa ùkengela bwà twètù kwikala awu, mwaba ùdibo benza disangisha ànu bwà cyòci aci, balekela... .

²⁹² Nwamònu's, dyònsò dyà kùdiwu mmudimu wa bwambi. Twàmbè ne, *wèwè* udi wakula mu myakulu, *yèyè* ùdi wàndamuna, ne *yèyè* wàkula mu myakulu, *yèyè* ùdi wàmba ciprófetà; nudi ànu beena kwitabuuja cyanàànà aba, èkèleeziyà, kàdi nànsha nàнку nudi ne mudimu wa bwambi ne nudi ne cintu kampànda. Nudi nuteeta bwà kukwàcisha Bukalenge bwà Nzambi, bwà kwenza cintu kampànda bwà bwalu abu, nwamònu's, ne pa nàнку nwènù bânà bèètù disangishaayi pàmwè. Ki bwà cinyi bampaasàtà, bu mutùdi emu, tudi tudisangisha pàmwè, tudi ne cintu kampànda cyètù bwònsò. Nwènù bânà bèètù nudi nudisangisha pàmwè, nulonga Mifùndu, ne nwakula mu myakulu ne nwandamuna, ne nufila mikenji, nudi numòna's.

²⁹³ Kàdi mpindyewu, pìikalà muntu ewu, díbà adi, pìikalaye mumanye ne...Yèyè ùvwa mu disangisha, mwikale ne dipà dyà myakulu. Èè, yèyè's ùdi ùfika ku disangisha, wàkula mu myakulu kàdi kakùyì dyandamuna nànsha òmwè dìfidiibwa to, mwandamunyi kàyì ùcýmvwà to.

[Mwanèètù wa balùme kampànda ùdi ùkonka ne: “**Udikù mwà kwamba díbà adi ne bantu abu bàdi bìibàka Mubidi anyi, kàdi midimu bu baampaasàtà, balongeshi, ne ciine aci, yidi yìpwangaja Mubidi awu anyi?**”—Muf.]

²⁹⁴ Èyowà, ki bwà cinyi cyôci aci cidikù, bupwàngàne. Nwamònu anyi? Wòwò aa mmafidiibwe bwà bupwàngàne, nudi numòna’s. Ndi ngiitabuuja ne, kùdi—kùdi—kùdi Nyuma mmifidiibwe bwà kupwàngaja, bupwàngàne bwà èkèleeziyà.

²⁹⁵ Mpindyewu, bôbò, bantu bàdi bàakula aba, bàdi bùle tètè ne Nyumà, kakùyi mpatà to. Mpindyewu, muntu nyèye ewu, pàmwàpa ùdi wàkula mwab’ewu mu disangisha emu, ne ùdi ùfila. . . Mpindyewu, yèye ùdi ànu kumpàla kwà bandamunyi, nwamònu’s, kàdi nànsha nàнку muntu nànsha nànwè kàyi ànu ùpeta dyandamuna to, kùdi ànu cintu kampànda cipampàlamuke. Mwandamunyi kèna ne cidìye mwà kwenza nànsha, nwamònu’s. Yèye—yèye ùdi ne cyà kwandamuna ku disonsodiibwa dyà mwomùmwe ne dyà ewu udi munkaci mwà dicyàkula awu. Ne yèye mmufwànyine kwikala ne dipà dilelèlè dyà dyakula dyà mu myakulu, kàdi kèna ne dipà dyà myakulu to, mwakulu kampànda. Nwamònu’s, yèye. . .

²⁹⁶ Ne díbà adi cintu cyà yèye kwenza ncyà ne, pàdiye ùkwàta mudimu ne mwakulu ewu, díbà adi ùdi ùmòna. . . Mpindyewu, cidìye—kèna ùteeta to. . . Piikalàye ùteeta bwà kudítumbishaye kàbidì, mmwena dyambu. Kèna. . . Yèye—yèye mmupiile ànu kwine kwònsò aku, nudi numòna’s, yèye kàakuyaku mwaba nànsha ùmwè to. Nwamònu’s, nudi nwela meeji ne: “Èè, Nzambì àbèneshiibwe, mulùmnyàna awu kèna ànu muswè kwandamuna myakulu yànyì to. Ki cyònsò cidìku ncyôci aci.” Mpindyewu, nwamònu’s, mmupiile ànu kwine kwònsò aku. Ànu mwaba awu yèye ùdi ne—yèye ngudi ne kabingila kàdi kakàyi kòkò to, kiipacila kabi’s. Nwamònu anyi?

²⁹⁷ Kàdi piikalàye ne kalolo ne kudipwekesha, wàmba ne: “Èè, pàmwàpa Mukalenge kàvwa muswè kukwata naanyi mudimu mu disangisha Dyèndè to. Kàdi nànsha nàнку ndi. . . Yèye ùdi ùbèneshi musuùkà wànyì. Mmuswè bwà kunkolesha, bwà kumanya ne ndi pabwipi Nèndè pàndi ngàakula mu myakulu. Pa nàнку nèmpatuke nye mu budimi bwà micì yà pommes ne: ‘Éyi Nzambì!’ Nèнку bukòlè bùdi bùbanga kumpwekela ne mèmè kubanga dyakula dyà mu myakulu. Mèmè kubwela mu citeleela, nudi numòna’s.” “Kaa, Udi umòna’s, Wèwè ngudi wakula naanyi, Mukalenge, Wèwè udi ànu kacya wandama mu njila ku dyakula dyà mu myakulu.” Nwamònu anyi? “Nèнку, Mukalenge, leelù bìvwa bìkèngela bwà mèmè kwikala mwakule ne muntu awu. Wamfwilakù luse bwà cyôci aci, Mukalenge. Ndi—ndi—ndi mulèngùlùle cintu kampànda cimvwà nciyi ne cyà kulengulula nànsha. Taatù, bu wèwè mwà kuswà mfwilèku luse.” Nèнку, dyàkàmwè, ki kudìtwa mu dyakula dyà myakulu. “Aa, yoyòyò, ngàdyùmvù bimpè be bwà bwalu abu mpindyewu!”

²⁹⁸ Nudi numòna's, abi's bìdi ànu bîmpè. Nwamònu's, dyèbè—dyèbè dipà kí ndyà kukwàta naadi mudimu mu èkèleeziyà to, kàdi mbwà kukukolesha wêwè. “Ewu udi wakula mu mwakulu mwenyi (mwenyi) ùdi ùdikolesha yêyè mwine.” Nwamònu anyi? Mpindyewu, kwòkò kakùyì mwandamunyi to, dîbà adi. . . Nudi búmvwe cîndi muswè kwamba aci anyi? Nwamònu's, ki cyòci aci. Pa nàнку yêyè kàvwà mwà kudimanyina to. Ùdi ànu. . . Kàdi neàmanye pùkalàye ne bakwàbò apu.

Mpindyewu, mpindyewu nudi ànu bamanye ne nudi ne cyà kubilekela pàmwè, nudi numòna's, aci's ke cintu cîmwè cinùdi ne cyà kwenza too ne panwàbitapulula. Ki bwà cinyi ndi ngeela meeji ne cidi. . .

116. Umvwija Kolintò wa Kumpàla 14.5.

²⁹⁹ Nganyi udi mumupete lukasalukasa? Umwe wa kunùdi mmumupete anyi? [Katupà kàà mukàbà wà mēyi munda mutupù. Mwanèètù wa balùme kampànda ùdi ùbala Kolintò wa Kumpàla 14.5—Muf.]

[. . . bônso bàakula mu myakulu, kàdi mvwa mutambe kuswa bwà nwênù kwamba bîpròfetà: bwalu ewu udi wamba cipròfetà mmumène mutàmbe ewu udi wakula mu myakulu, pùkalàye kàyì wandamuna, bwà èkèleeziyà wàmòna mwà kwibakiibwaye.]

³⁰⁰ Èyo. “Mvwa mutambe kuswa. . . Mvwa muswè bwà nwênù bwònsò kwikala nwakula mu myakulu.” Pòlò ùvwa ùteeta kwamba. . . Bu mudi èkèleeziyà, nwênù—nwênù biikale èkèleeziyà wanyi. Yimwè yà ku èkèleeziyà yà Pòlò kayivwa ne bidimba búngì bu búndi naabu mwaba ewu ebu to. Ncyà bushùwà, misangu mikwàbò dikumi anyi dikumi ne bàbìdi. Nwamònu anyi? Nwamònu anyi? Mpindyewu, mpindyewu kwambayè ne: “Mvwa njinga bwà nwênù bwònsò kwakula mu myakulu.” Ncinùbazule anyi?

³⁰¹ Nwamònu's, pàdi è—è—èkèleeziyà udi. . . mu Byenzedi 19, ngeela meeji ne ùvwa ne bidimba bitwè ku dikumi ne bìbìdi muntwamu. Nwamònu anyi? Ànu tuumasangisha, tukese menemene, nwamònu's. Pa nàнку ke mùtùbi misangu yònsò ànu mu banyàabanyà nàнку, nwamònu's. Nènku ndi ngeela meeji ne mbambe ne kuvwa bantu ndambù, bantu dikumi ne bàbìdi balùme ne bakàjì, nudi numòna's, mwòmò amu.

³⁰² Mpindyewu, bu nwênù—nwênù mwà kumòna kaaba aka, mmwambe ne: “Mvwa muswè bwà nwênù bwònsò kwakula mu myakulu. Ndi—ndi njinga bwà nwênù bwònsò kwakula, bwònsò bàakula mu myakulu, kuujiibwa ànu tètè ne Nyumà Mwimpè mu mùshindù wà bafwànyine kwakula ànu mu myakulu. Kàdi” kwambaye ne “Mvwa ntamba kujinga bwà nwênù kwamba cipròfetà; ànu cyòci ciikale cyà dyandamuna, kwòkù kwikale dyandamuna.”

303 Ciine aci cidi cibadiibwa mwaba awu bishi? Nganyi... Nudi naaci mwaba awu anyi, ncyà bushùwà...?...Tucibalàayi cyàkàbìdi. Mpindyewu tèèlejaayi:

304 [Mwanèètù wa balùme kampànda ùdi ùbala Kolintò wa Kumpàla 14.5—Muf.]

[*Mvwa muswè bwà nwênù bwònsò kwakula mu myakulu,...*]

Mpindyewu shààlaayi balame aci bwà katanci kakesè ne: “Mvwa muswè bwà nwênù bònsò kwakula mu myakulu.”

[...*kàdi nùtàmbe kwamba cipròfètà:...*]

“Kàdi mvwa ntamba kujinga bwà nwênù bwònsò kwamba cipròfètà.”

[...*bwalu ewu udi wamba cipròfètà mmutàmbe ewu udi wakula mu myakulu,...*]

Mpindyewu anji lamàayi aci katanci kakesè.

305 Mpindyewu, mbwena kwamba cinyi ne: “Mutàmbe bunène ngewu udi wamba cipròfètà awu”? Ke mwaba úvwà muswè bwà mèmè kwimanyina awu anyi? [Mwanèètù wa balùme kampànda ùdi wàmba ne: “Mvwa ngamba ànu ne: ‘Aci cìvwa cishìlàngàne...?’”—Muf.] Èyowà. Nwamònu anyi? Èyowà. Nwamònu anyi? Mpindyewu, mwaba ngwòwò ewu...]

306 Mpindyewu, nudi nwamba cileejilu ne, mpindyewu, tudi ne bantu bàbìdi kabàyi balonge kàlaasà munkaci mwètù dilòlò edi. Ki mbamanye kantu nànsha kàmwè pa bwalu ebu to, nènku mèmè mbwelamu ne nwênù bònsò biikale...tudi tubanga mu disangisha edi kaaba aka, nènku—nènku udi ànu ubanga kwakula mu myakulu, yònsò wa kunùdi wàkula ànu mu myakulu, wàkula mu myakulu, ne wàkula mu myakulu, ne wàkula mu myakulu. Nènku, èè, ncinyi aci? Nwamònu’s, muntu udi kàyì mulonge tulaasà awu ùdi wàmba ne: “Uh! Bwònsò mbapàle!” Nwamònu anyi? Kàdi umwe yèyè mwambe cipròfètà, nwamònu’s, dìbà adi ùdi wàmba cintu kampànda cidiye mwà kuumvwa.

307 Mpindyewu, tòngùnukaayi ne kubala bìdi bishààle mpindyewu. [Mwanèètù awu ùdi ùtòngùnuka—Muf.]

[...*ànu yèyè mwandàmùne,...*]

S’ki bwalu mbwòbù abu. Mpindyewu ne: “pa kuumusha,” nwamònu’s. Ndi—ndi mufwànyine...Aba bàdi—aba bàdi bàmba bipròfètà mbatàmbe ewu udi wakula mu myakulu *ambà ànu* ewu yèyè mufile dyandamuna. Mpindyewu, tòngùnuka, nwamònu’s.

[...*bwà èkèleeziyà amòne mwà kupeta dikoleshiibwa.*]

S’ki bwalu mbwòbù abu, nwamònu’s, èkèleeziyà mmukoleshiibwe.

308 Mpindyewu, mu ngaakwilu mukwàbò, mòna's, èkèleeziyà, mulùmyànà ewu. Kùdi—kùdi mwaba ewu bààbùngì *aba* bàdi kabàyi balongeshiibwe to, nùdi ànu basòmbe munkaci mwètù dilòòlò edi; tudi munkaci mwà kwenza disangisha edi. Tudi bwònsò kaaba aka twenda tukeba wètù... baswè kumanya bwalu bwà Mukalenge, bònsò bwènù nudi babange ànu kwakula mu myakulu. Muntu nànsha umwe kî mwambeku cintu nànsha cimwè to, babange ànu kwakula mu myakulu. “Ndi muswè bwà nwènù. . . Ndi mufwànyine. . . Abi's mbifwànyine kwikala bîmpè,” Pòlò mmwambe. “Nwènù bònsò baakùle mu myakulu, mbifwànyine kwikala bîmpè.” Kàdi ambàayi túng bu bàmwè bàà kunùdi mwà kwamba cipròfetà, kjuuuka kuulu kwamba ne: “EMU MMÜDÌ MUKALENGE WÀMBA: ‘Kùdi muntu musòmbe kaaba aka mwikàle mwenyi munkaci mwètù. Dìna dyèndè n'John Doe. Ùdi ùfùmina ku mwaba *kampànda*. Mmushiyekù mukàjèndè ne bânà banaayi. Ùdi kaaba aka dilòòlò edi bwalu ùdi ùkèba dyambulwisha. Ùvwa mukamònganganane ne ngàngàbukà leelù ewu mu Memphis, mu Tennessee. Ki yèyè ne. . . Ngàngàbukà mmumwambile ne ùdi ne kansèrè kàà ku bisulusulu. Ùdi munkaci mwà kupùnga ne lufù’?”

309 Yèyè ne: “Bu bònsò mwà kwakula mu myakulu ne ùdi kàyi mulongeshiibwe mwà kulwa munkaci mwènù, yèyè's mmufwànyine kwamba. . . dîbà adi yèyè neàmbe ne: ‘Kanwena bònsò babuluke anyi bapàle anyi?’ Kàdi pàdi umwe wamba cipròfetà ne ùsokolola maalù masokome à mu mwoyi, dîbà adi nebàpone panshì, bàmba ne: ‘Bulelèlà Nzambì ùdi neenù!’” Nwamònu mwaba awu anyi?

310 Èè, mpindyewu, mwaba ewu. Mpindyewu nwènù nwakula mu myakulu, kàdi umwe ùfila dyandamuna, wamba ne: “EMU MMÜDÌ MUKALENGE WÀMBA,” mu dyandamuna amu ne: “‘Kùdi muntu musòmbe munkaci mwètù, mmushiye mukàjèndè, ùvwa mu Nashville leelù ewu,’” anyi mu Memphis, ànyi ní mpenyi ní mpenyi apa, “‘ne ùdi ne kansèrè kàà bisulusulu. Mmubwele muneemu emu, ne dîna dyèndè n'John Doe,’” *Cikampànda* cyà mùshindù awu. Nwamònu anyi?

311 “Ànu cyòci ciikale cyà dyandamuna,” ànyi, nwamònu's, dîbà adi cidi cifila dikoleshiibwa. Nwamònu anyi? Dîbà adi nebàmbe ne. . . Dîbà adi mulumyana awu neàpatuke, wamba ne: “Lekelaayi nnwàmbilèku cintu kampànda, kanùngambidiku ne Nzambì kèna ne bantu bàba kuntu kwàka to. Cyà bushùwà's! Bantu abu kabàvwa bammanyè to nànsha kakesè.” Nwamònu anyi?

312 Pa nànku tudi baswè mapà à cipròfetà *kusakidilaku* ne mapà à dyakula dyà mu myakulu. Kàdi, mu dyakula dyà mu myakulu, nwamònu's, mùdi ne cyà kwikala ne dyandamuna. Ne pashiishe, pakàadibo bandàmune, ncipròfetà. Nwamònu anyi? Ncipròfetà. Mpindyewu, ndi mupete lukonko alu kaaba aka mu katanci

kakesè emu's, pa nànkù nê—nêmfikèkù ànu ne lukàsà lwônso. [Katùpà kàà mukàbà wa mēyì munda mùtupù—Muf.]

117. Maatàayi 18.10.

[Mwanèètù wa balùme kampànda ùdi ùbala Maatàayi 18.10—Muf.]

[. . . *bwà kanùpetudiku wumwe wa ku bânà bakesè aba to; bwalu ndi nzwàmabila, Ne mu dyulu banjèlò bààbò—banjèlò bàdi bulelèlèlè bàtàngila misangu yônso mpàla wa Taatù wanyì udi mu dyulu.*]

³¹³ Èyo. Mpindyewu, mwanèètù, nànsha wèwè nganyì, mu bushùwà bwà bwalu kakwena mènà mafùnda to, ànu tubeji tukesè cyanàànà, nudi numòna's, udi mwambe cyôci eci awu. Ndi mutwìshìibwe ne ndi. . .

³¹⁴ Mpindyewu, nudi bafwànyine kulwàngata mu mìshindù yìbìdi, nudi numòna's. Kàdi mèmè ndi ngeela meeji ne dyandamuna adi, bu nwènù ànu mwà kunkonka ne: "Umwijaaaku eci," s'ki wànyì pàanyì mùshindù wùndi mwandamune eci awu's.

³¹⁵ Mpindyewu, buulùlaayi mu Kolintò Mwibìdi, muntu kampànda, 5.1, ùdi wàmàbà nùnkù ne: "Ntenta wa pa buloba ewu yèyè munyanguke. . ." Nudi bamanye ne ncinyì anyì, nwamònu's. "Ntenta wa pa buloba ewu yèyè munyanguke, tukàadi ne mukwàbò," nudi bamanye's, "mwindile." Èyo.

³¹⁶ Mpindyewu, mpindyewu Yèyè ùvwa mufwànyine. . . Bu nwènù mwà kumòna bîmpè, mu Maatàayi 18.10, Ùvwa wàkula bwà kwakidila kwà "bânà" bakesè. Bàvwa bânà bakesè, tûtôtù, twà bidimu bisàtù anyì binaayi, kubambulaye. "BààkaMutwadila bânà, mwànà." *Bânà* bàdi bafùmina mu dînà dyà "mwànà." Mwànà udi ànu kaamuntu kakesè—kakesè, kí mmwànà wa mu dibòko to kàdi ànu pankaci pàà cyôci aci ne nsòngà. Nwamònu anyì? Kì mmwanji kudyàmbwila bujitu bwèndè to.

³¹⁷ Mpindyewu, kwambaYè ne: "Nwadimuka bwà kanwikadi *nwàpeetula*." Bu nwènù mwà kwangata bulelèlèlè dyumvwija dyà mwàku awu, didi ne "dikèngesha." Nwamònu's: "Kukèngesha umwe wa ku bwòbò abu." Kukèngesha mwànà, kabìvwa bikèngela bwà nwènù kwenza nànkù to. Mbànà, kí mbamanye to. Nwamònu anyì?

³¹⁸ Nènku mpindyewu mònaayi, kwamba ne: "Bwalu bôbò. . . banjèlò bààbò bàdi bàtàngila misangu yônso mpàla wa Taatù Wanyì udi mu Dyulu," nudi numòna's. Mu ngaakwilù mukwàbò ne: "Banjèlò bààbò, baamisànjeela bààbò—bààbò, mibidi yàbò, mibidi ya banjèlò yààyàbò kabwela bu bôbò mwà kufwà ayi, yidi misangu yônso kumpàlè kwà Taatù Wanyì mu Dyulu." Nwamònu anyì?

319 Mpindyewu: “Ntentà wa pa buloba ewu yéyè munyanguke, tukàadi ne mukwàbò mwindile.” Ncyà bushùwà anyi? Aci’s mmubidi.

320 Tàngilàayi kuneeku. Bu ngikalapu ànu ne díbà dyà kubwela mu byòbì ebi! Mu bushùwà bwà bwalu, ndi mumanye ne ncyà—ncyàkudìpeta to. Kàdi, mwaba ewu, indilaayi nnupebi ànu cyanààna bwà cìikale pa mukàbà wa mēyi, nènku nenùcìpete mu mishindù yònsò.

321 Tààngilàyi, bufùkù kampànda Peetèlo ùvwa mu bùlokò. Bàvwa benza disangisha dyà milòmbò kumbelu kwà Yone Maakò, nwamònu’s. Nànku ki Mwanjèlò wa Mukalenge kubwelayè, Dikunji dyà Kapyà adi, Bukènkè kupwekabu, kàdi Peetèlo kwela meeji ne ùvwa munkaci mwà kulòòta pààkamònaye Bukènkè ebu bulwa kùdiye. Bible mmwambe ne: “Cìvwa Bukènkè.” Nwamònu anyi? Ne mèmè ndi ngiitabuuja ne m’Bòbò bùmwebùmwe abu neetu, nwamònu’s, Yèyè wàkapweka. Nènku tudi tubwela mu lutatu lùmwlùmwlè alu, pàmwàpa cintu cìmwècìmwè aci necyènzeke. Nwamònu anyi? Ke kubwela muntwamu, nànku awu ke Yèyè ne: “Lwàku, tuye Naanyi.”

322 Ki Peetèlo kudyàmbidilayè ne: “Ndi ndòòta mpindyewu, pa nànku nèmmonè cidi cilòòta eci cyùmvwija.” Ke kupicilaye ku luseke kwà balami, e kudyàmbidilayè ne: “Uh-huh. Mpindyewu tudi tutungunuka ne kuya, ciibi cyumba cidikàngukila nkàayaci.” Kupàtukaye pambèlu ku ciibi cìvwa cilonda, kudikàngukilaci nkàayaci. Kupàtukilayè ku biibi byà cimenga, ne kudikàngukilabi nkàayabi. Kàdi yéyè ùcìvwa ànu wela meeji ne ùvwa ùlòòta. Nènku pààkiimanaye pambèlu apu, ki yéyè ne: “Èè, ndi mudishikamine, nènku nèmpwekè ànu kwà Yone Maako bwà kwenzaku bwobùmwlè kampànda.”

323 Bàvwa kuntwaku ne: “Éyi Mukalenge, tumaku Mwanjèlò Webè bwà kusungilaye Peetèlo.”

324 Nènku bu pa díbà adi mene cintu kampànda kwenzekaci [Mwanèètù Branham ùdi ùkookola—Muf.]. Nsongàakàji mutekète kuyaye ku ciibi e kwambaye ne: “Nganyi awu?” Kwambululaye kasengulu kakesè aku, kwambaye ne: “Mòna bwalu’s, m’Peetèlo!” Kì kwalukilay, e kwamba ne: “È, nwènù—nwènù kanwènaku nulekela disambila mpindyewu, Peetèlo’s nyewu kuntu kwàka.”

Yèyè ne: “Kaa, ekèlekèle! Tungunuka,” yéyè ne, “udi—udi—udi. . .” Nwamònu anyi?

325 [Mwanèètù Branham ùdi ùkookola cyàkàbìdì—Muf.] Yèyè ne: “Kangulaayi! Ndi muswè kubwela’s.” Nwamònu anyi? Kì yéyè kwamba ne. . .

Kì kwalukilaye, kwambaye ne: “To, muntu’s—muntu’s m’Peetèlo udi ku ciibi.”

326 “Kaa,” kwambabò ne: “bàkaadi bamane kumukosa mutù, awu’s mmwanjèlò wendè awu ku ciibi. Nwamònu’s, tabernacle wendè wa mu Dyulu, ùkaavwa mumane kumupeta, bu mùvwà wendè wa pa buloba ewu munyanguke, bwalu ùvwà mumwindile mu Dyulu bwà yèyè kuyamu.”

327 Cìngààkamònà ditùkù adi mu cikèènà–kumòna aci, nudi bamanye’s, musabùke dyàmwàmwa. “Ntentà wa pa buloba ewu yèyè munyanguke, tudi ne mukwàbò.”

328 Nènku bânà bakesè aba bàdì kabàyi banjì kwenza mpèkaatù aba, nudi numòna’s. . . Nwamònu anyi?

329 Pàdì mwânà munkaci mwà—mwânà munkaci mwà kufùmbiibwa mu difù dyà maamù kampànda, pàdiye ànu ne wàtèekibumù. . . Nwamònu anyi? Nwamònu anyi? Kàdì dyàmbedi n’nyumà. Nènku pàdì ànu nyumà awu ùbanga kuvwala mubidi, kaamùtolokù kakesè kàà mwoyi kabanga kuvwala mubidi, nènku pàdiku ànu ne kuumuku ku wàkù. . . Mpindyewu, mu difù, mmisunya mikesè, munkaci mwà kunyungakana, munkaci mwà kujeekekana. Tudi bamanye nànkù. Abi’s ntubùlu twà mashi. Ànu munùdì nwangata mwòsà wà kabalu nuwèla mu màyi, newùlelema ne newùnyunge, ne wèwè muwùlengè newùtupike. Ke mùshindù ùdì mwânà munda mwà mamwèndè nànkù.

330 Kàdì pàdiye ànu ne wàledìibù pa buloba ebu ne ùpuyakana mupuuyakeenu wendè wà nzànzànzà awu, ùdì ùlwa musùùkà kampànda ùdì ne mwoyi. Nwamònu anyi? Bwalu pàdì ànu mubidi wà pa buloba ewu ùledìibwa pa buloba, kùdì mubidi wa mu dyulu, anyi mubidi wà nyumà, bwà kulamata kùdìwu’s. Nènku pàdì ànu mubidi wa mu bufuki ewu wùpona, kùdì tabernacle wa mu Dyulu udi muwindilè’s. “Ntentà wa pa buloba ewu yèyè munyanguke, kùdì ntentà wa mu Dyulu udi mumwindilè.” Pàdì ànu—pàdì ànu mwânà umata pa buloba mu mubidi, kùdì mubidi wà nyumà ùdì mwindilè bwà kumwàkidila. Nènku pàdì ànu mubidi wà nyumà. . . mubidi wà mu bufuki ùnyangakajiibwa kùdì mubidi wà nyumà ùdì mwindilè dyàmwàmwa. Nwamònu anyi? “Tèòfàni” mutùtù tucibùikila, nwamònu’s, tèòfàni.

[Mwanèètù wa balùme kampànda ùdì ùkonka ne: “Èè, mpindyewu, mubidi ewu ki wòwò. . . ki wà citùpà cìpì awu, ùdì mwindilè dibùikà dyà ku lufù dyà mubidi ewu anyi?”—Muf.] Èyowà. Nwamònu anyi? Èyowà. Kaa, èyowà’s. [“Ki ngiikadilu mutwikadilà ne mwoyi nyèyè awu too ne—ne ku dibùika dyà ku lufù anyi?”] Ncyà bushùwà. Nwamònu anyi? Nwamònu anyi?

331 Ki ncyànji kubuulwila bânà bàà bantu to. Ngeela meeji. . . Ndi—ndi mumanye ne mvwa mucimòne. Nwamònu anyi? Kàdì ncyèna mumanye ne mmubidi wà mùshindù kaayi to, kàdì mvwa mwà kubùumvwa ànu mùmvwà mwà kuumvwa byanza byènu

anyi ní ncinyi cikwàbò cyònsò emu. Mu bushùwà bwà bwalu, eci cidi pa mukàbà wà méyi ne nudi mwà kwikala nucimba paanyimà pàà bidimu mémè mumane kuya's. Nudi numòna anyi? Kàdi. . . Nènku ciine aci, cyònsò cìvwàku aci, nwamònu's, mvwa—mvwà mukwàta bantu abu ne mubàpye ku byanza, nènku cìvwa cyà bushùwà ànu—ànu múdi wa bushùwà amu, kàdi nànsha nànkú kacìvwa. . . Kabàvwa bàdya ànyi bànwa to. Kamùvwa ní mmakèèlèlè anyi mààlabà to. Nwamònu's, cìvwa n'Cyendèlèlè.

³³² Nènku mpindyewu pàvwà ntentà awu. . . bôbò buumuka mwaba awu mu mubidi awu, bàdi bààlukila pa buloba, ne mùshindù wà mubidi ùvwàbò naawò ùvwa mulwàte dibènga kufwà awu's. Lu—lupwishi lwà buloba ludìkùngwija mu tèòfàní awu mu mùshindù kampànda nènku bàvwijiiibwa cyàkàbìdì bantu, bikèngela kudyàbò mwàkadyàbò mu budimi bwà Edèna amu. Nwamònu anyi? “Kàdi ntentà wa pa buloba ewu yèyè munyanguke, tukàadi ne mukwàbò mwindìle.”

³³³ Pa nànkú bânà bakesè bàvwà kabàyi ne mpèkaatù to abu, nwamònu's, kabàyi banji kwikala ne mpèkaatù to, *banjèlò* bààbò, “mibidi” yààbò (ewu ùvwa Peetèlo mwalùkilemu awu. . .) nwamònu's, yìvwa mindìle. “Mbàtàngila mpàla wa Taatù, mu Dyulu,” misangu yònsò yidi ànu kumpàla Kwèndè; “bôbò mbacìmanye.” Ki cyòci aci.

³³⁴ [Mwanèètù wa balùme kampànda ùdi wàmba ne: “Kàdi's cìvwa kaalutàtu kakesè mwaba awu pàvwà Yesù mwambe ne: mu citùpà cyà kumpàla cyà dibìikà Dyèndè dyà ku lufù, Yèyè kwamba ne: ‘Kanùdengì to,’ Kàvwa mwanji kubànda muulu to. Nènku pashìishe pààkalwàYe mu cibambàlu mùvwà Tomàsè usanganyiiibwa, kwambaYè ne: ‘Lwàkù apa nùnkú kàdi ubwejè cyanza cyèbè mu lubadi Mwànyì emu; ela munu wèbè.’”—Muf.] Ncyà bushùwà, Yèyè kàvwa mwànji kubànda muulu to. [“Nènku di—dishiilangana dyà myaba yibìdì eyi, mu ùmwè muvwaYè—muvwaYè mubàmbile bwà kabàMulengi to, ne lwà kwaka kwàkambilàYè e Tomàsè bwà kumulengaYè.”] Kàvwa mwànji kubànda muulu to, nudi numòna's. Yèyè. . . [“Bwalu Ncyèna mwanji kubànda kùdi Taatù Wanyì to.”]

³³⁵ Ncyà bushùwà, nwamònu's, kabìvwa bikèngela bwà kuMulengabò pàvwàYe kàyì mwànji. . . paanyimà pàà dibìikà Dyèndè dyà ku lufù. Ùvwa mupatukile mu buloba, nudi numona's. Wàkapàtuka mu buloba ne ùvwa wèndakana munkacì mwà bantu, kàdi Kàvwa mwànji kubànda muulu to. KwambaYè ne. . . Wàkambila Màriya, Wàkamba ne: “KùNdengìku to.”

Yèyè ne: “Laabòni.”

³³⁶ KwambaYè ne: “Lenga. . . kùNdengìku to, bwalu Ncyèna mwanji kubànda kuulu kùdi Taatù to. Kàdi Ndi mbànda kuulu kùdi Nzambi Wanyì ne Nzambì wènù, kùdi Taatù Wànyì ne Taatù wènù.”

³³⁷ Ne pashiishe dilòlò adi, paanyimà pàà Yèyè mumane kubànda kumpàla kwà Nzambi, ne mumane kubiika ku bafwè, wàkabànda kumpàla kwà Nzambi. Dyà ùpingana, kubiikilaYè Tomàsè bwà kulwa kulenga lubadi Lwèndè. Nwamònu's, Yèyè ùkaavwa mubànde kumpàla kwà Nzambi. Ncyà bushuùwà. Èyowà.

118. Mpindyewu. **Mu Kolintò wa Kumpàla 14: “Ikalaayi nulonda—nulonda luse, ne jingàayi mapà à Nyumà, kàdi nangàngà bwà nwènù kwamba cipròfetà.”** Webster, ngudi wamba ne: “kwamba cipròfetà: bwà kudyanjila kwamba maalu àcilwalwà, nangàngà ku disonsodiibwa dyà kùdi Nzambi.” Mukenji kampànda ùdikù mwà... Mpindyewu bòbò... aci—aci's nciidi Webster mwámbe ne cidi—cidi mwanèètù mukonke. **Mukenji ùdikù mwà kubìkidiibwa ne “ncipròfetà” pàdiwu kawùyì ùdyànjila kwamba maalu àcilwalwà anyi?**

To, mukalenge. *Kwamba kwà cipròfetà* kùdi “kudyanjila kwamba.” Nwamònu anyi? Eyo.

119. Mpindyewu. **Kolintò wa Kumpàla 14.27, ndi ngiitabuuja ne bìvwa bikèngela bwà mikenji yònsò kwandamunyiibwayì kàdi kî mmikenji mipite pa yisàtù mu myakulu yìvwà ne cyà kufidiibwa mu disangisha kanà dyònsò edi to.**

³³⁸ Ki Mufundu ngwòwò awu. Ndi naawu mufunda kaaba aka. Mu bushuùwà bwà bwalu, katwèna... Tudi biibidilàngàne naaci ne bacimanye, nudi numòna's. Aci's... Èyowà's, mukalenge, cidi... bìvwa bikèngela kwikalaci ànu kùdi bantu bàsàtù muntu ku muntu. Aci's mmu Kolintò wa Kumpàla 14, kàbidi. Nwamònu anyi? Ncyà bushuùwà ne: “kùdi bantu bàsàtù muntu ku muntu.” Mpindyewu nutàbalelàayi aci mu masangisha ènù, bàna bèètù. Mpindyewu, nenù—nenùsangànè aci cijuuka mpindyewu, nenùsangànè ne bantu bààbùngì bàtu bàsaluka. Kàdi ncyèna ngàmba ne kabèèna ne Nyumà Mwimpè to, mpindyewu. Kàdi, nudi numòna's, Pòlò wákaya bwà kutèeka èkèleeziyà wa Kolintò mu bulongame. Tudi bònsò bamanye aci, kî mmwòmò anyi? Byàkakèngela bwà yèyè kumutèeka mu bulongame. Ki kwambaye ne: “Maalu ònsò enjiibwe mu bulongame ne kaneemu.”

³³⁹ Mpindyewu, bu nwènù mwà kumòna, Pòlò, mu dipweka amu, ùvwa misangu yònsò ànu ne lutàtù ne èkèleeziyà wa Kolintò. Kacya kanùvwaku mwà kumusangana mùshindù awu mu... Yèyè kàakambilaku èkèleeziyà wa Efèsò kantu nànsha kàmwè pa bwalu abu to, ùvwa mwà kubalongesha dikubiibwa dyà Cyendèlèlèlè. Kakwèna cintu nànsha cìmwè pa bìdi bitangila dikubiibwa dyà Cyendèlèlèlè mu—mu èkèleeziyà wa Kolintò to. Bàvwa misangu yònsò ànu bàna bàà mu mabòko, bateeta ne: “Ewu udi ne mwakulu, ewu udi ne musambu.” Ki mmwòmò anyi?

Nwamònu anyi? Kàdi bu nwênù mwà kulekela disangisha dyènu diditwa mu byà nànkù . . .

340 Bu mùvwà Martin Luther, wàkuujiibwa tètè ne Nyumà mu mùshindù wà ne wàkaakula mu myakulu. Yèyè ne, mu difundà dyà cibejibeji cyèndè, yèyè wàkamba ne: “Mémè’s ntu mwakule mu myakulu,” yèyè ne: “kàdi mémè mulongeshe cisàmbà cyànyì aci” mwàkambaye “bòbò nebàkebe dipà pamutù pàà Mufidi wa mapà.” Aci’s civwa cyà bushùwà, nwamònu’s, bòbò nebàkebe dipà pamutù pàà Mufidi wa mapà.

341 Ne cyòci aci’s ke cidi bantu bàpeta, ke mùdibo bònsò bafika ku difika dyà munda ne bàditambisha pàdìbo bàbàlekela bààkula mu myakulu anyi cintu kampànda cyà mùshindù awu. Kàdi cyòci kaciyi cyà Nzambì to, dìbà adi kacyakwikala . . . s’neçikale ànu cyà cyanànà. Kàdi twètù . . .

342 Mpindyewu, èkèleeziyà yà cyena leelù ayi yidi yibènga cintu cyònsò aci mu kaabujimà, kàdi twètù katwèna tucibènga nànsha. Tudi twitabuuja ne ndipà dyà Nzambì ne didi mwà kutèekiibwamù kùdi Nyumà wa Nzambì. Udi pèèbè wamba bishi bwà cyòci aci, Mwanèètù Roy? Ncyà bushùwà. Èyowà’s, mukalenge. Ditèekiibwe mu èkèleeziyà! Ndyà mu èkèleeziyà. Dipà dyà dyakula dyà mu myakulu ndyà mwómò amu, nwamònu’s, mu Èkèleeziyà wa Nzambì.

343 Mpindyewu, twànji tumònaayibi mpindyewu menemene civwà lukonko lwèndè kaaba aka. Mbambe, ne:

**Ndi ngiitabuuja ne mikenji yònsò . . . (ncyà bushùwà) . . .
bivwa bikèngela kwandamunyiibwayi, ne ciine aci kùdi
bantu bàsàtù muntu ku muntu.**

344 Ncyà bushùwà, nwamònu’s, bwalu nwênù balekèlè . . . Mpindyewu twànji kwamba, cileejilu ne, byenze bu ne nuvwa nwenza disangisha ne twètù basòmbe muneemu ne—ne . . . Mpindyewu, bivwa bifwànyine kwikala ne dikwacisha kaayi bwà kulekela ewu wàkula mu myakulu, ewu wàkula mu myakulu, ewu wàkula mu myakulu, ne ewu? Mòna’s, twètù’s tudi bafwànyine kupeta cibwejàkàji mu mùshindù wà katùyiku nànsha bafwànyine kumanya ne citùdi munkaci mwà kwenza ncinyi to. Nwamònu anyi? Kùdi bantu bàsàtù muntu ku muntu, twànjàayibi . . . bu mùdi, Hollin, ùdi wàkula mu myakulu, piikalayè wàkula mu myakulu . . .

345 Ne kùdi ne cyà kwikala kàbìdi mwandamunyi. Mpindyewu, kùdi mwà kwikala mwandamunyi umwèpelè paùdi kuyi wandamuna mu mwakulu wèbè wèwè mwine to. Mpindyewu, nwênù . . . “Ewu udi wakula mu myakulu myenyi awu àsambilè kàbìdi bwà yèyè kwandamuna.” Yèyè ùdi mwà kwandamuna myakulu yèndè yèyè mwine cidi ànu—ànu cilondangane ne mikenji ànu mùdici bwà mungà mwandamunyi amu’s. Kàdi kùdi ne cyà kwikala mwandamunyi umwèpelè kumpàla kwà myakulu kwikala . . . Nwênù ne musumbà wa bantu bààkula mu myakulu

kàdi kakùyi mwandamunyi to, dībà adi ùdisambìdile nkaayebè bwà wamòna mwà kwandamuna cyùdi—cyùdi wamba aci.

³⁴⁶ Mpindyewu, kwikadi wacyènza ànu bwà kuditàmbisha to, bwalu dībà adi udi munkaci mwà kudikolesha wèwè nkaayebè, nudi numòna's. Kanwenji nànkù to. Kàdi akulà mu myakulu bwà wamòna mwà kutùmbisha Nzambi, wamòna mwà kwibaka èkèleeziyà. Nudi numòna's, byònsò bìdi bwà kiipàcila kanène kàmwè, mwanèètù. Mapà aa mbwà kutùmbisha Nzambi, bwà kwibaka èkèleeziyà, bwà kufikisha bantu kùdi Nzambi, bwà kubamanyisha ne Nzambi ùdi nèètù. Yèyè kèna Nzambi mufwè to, Yèyè n'Nzambi udi ne mwoyi mwikàle ùkwàta mudimu munkaci mwètù. Nwamònu anyi?

³⁴⁷ Nènku bìdi bikèngela ànu bwà twètù kutabaleela cyòci aci ne ntèmà yònsò bwalu, balùmyàna wa yààyà, dyabùlu mmukine aci ànu bu mùdiye mukine bintu byònsò emu, nudi numòna's, bwà kumòna mapà malelèlà. Bwalu mapà àtu ne butekète, ne yèyè ùdi mwà kudibwinka mu dikwàcila mudimu mu miine mapà awu. Mwabilaayi, kaa, mwabilaayi, yèyè's mu bulelèlà ùdi mwà kutentula dipà ne dipà dyònsò dyà ku wówò. Pa nànkù's ki kabingila nkòkò aku. . .

³⁴⁸ Mpindyewu, tàngilàayi, dishiilangana dìdi pankaci pàà dipà dyà cipròfetà ne mupròfetà, kùdi dishiilangana ànu dyà ntàntà wa mìliyò yà kilòmèetà's. Kumpàla kwà cipròfetà. . . Muntu mwikàle ne dipà dyà cipròfetà cidì mene mwà kwambiibwa kumpàla kwà èkèleeziyà, bikèngela bàbìdi anyi bàsàtù bajingulule aci ne bambè ne “aci ncilelèlà.” Ncyà bushùwà. Kàdi kù mmupròfetà to. Nwamònu anyi? Mupròfetà mmudimu. Dipà dyà cipròfetà ndipà. Mupròfetà mmuledibwe, ùdi ne EMU MMÙDÌ MUKALENGÈ WÀMBA, mwanèètù, ànu nànkù ànu nànkù. Kakwèna cintu nànsha cimwè mu cyòci aci to, nudi numòna's. Ki mupròfetà nyàwù's. Kàdi dipà dyà cipròfetà dyòdi, aci's ndipà, nudi numòna's. Ewu mmudimu wà Nzambi, cikwàbò ndipà dyà Nzambi. Nwamònu anyi? Nènku's ki dishiilangana ndyòdi adi.

³⁴⁹ Mpindyewu, mikenji, twàmbè ne, mpindyewu, cileejilu, ewu ke mùshindù ùdìbi bifwànyine kwikala. Mpindyewu, tudi baswè kwamba ne, bu Mwanèètù Junie, dilòòlò edi, ùdi wàndamuna. Tudi bamanye ne yèyè mmwandamunyi. Mwanèètù Neville mmwandamunyi, nwamònu's, wàndamuna myakulu. Aci's tudi bamanye. Mpindyewu, kàdi bu ne tudi basómbe dilòòlò edi, kaa, Nyumà wa Nzambi mwikale ànu ùtaayika ne dikàndà bwà kwakula. Ekèlekèle, Nzambi wanyi! Ne twètù katwèna. . . bìdi bikèngela bwà twètù. . . bìdi bikèngela bwà twètù. . . Indilaayi, èkèleeziyà neàbange mu tusunsa tukesè emu. Nwamònu's, tudi—tudi tudisangisha ànu kumpàla kwà èkèleeziyà. Ndi nciètèka mu bulongame ànu bu mutùdi bafwànyine kwikala naabu kaaba aka.

350 Èè, dîbà adi, katancì aka anyì, Mwanèètù Ruddell ewu ùlandapuka ne wàkula mu myakulu. Anji indilaayi kakesè. Nwamònu anyì? Junie ùtùpika eku ne: “EMU MMÜDÌ MUKALENGÈ WÀMBA: ‘Cintu *kampànda-cikansanga* eci.’” Èyo, muntu kampànda lwà mwab’ewu, bafùndi bènda bàcifùnda mwab’ewu, nwamònu’s, ní ncinyì cyònsò civwà cyambiibwe aci; uh-huh, twánjàayibi ànu kucyàngata ne lukàsà lwònsò, bwalu cìdi...kucyàngata mpindyewu, ànu cìdiye mwambe aci. Èyo, bàdi...Pìikalàci—pìikalàci cibèngiibwe, dîbà adi nudi—nudi ànu nucilekela, nwamònu’s, cyùmushaayi. Kàdi cyòcì kaciyì cibèngiibwe to, ciitabiibwe kùdì bantu bàbìdi, pashiishe cifùndiibwe patòòke mwab’ewu, bàdi bàfùndapù mènà ààbò. Nwamònu anyì? Aci—aci—aci’s mbwà èkèleeziyà wenù. Aci’s...Ndi nzwambila nwènù bònsò bwà dyàkalenga dyènù, nwamònu’s, ncyèna mumanye ní bààkacyènza ku cibangidilu anyì to.

351 Kàdi katancì aka anyì, Hollin ùlandapuka, wàkula mu myakulu. Mpindyewu, mwandamunyi awu mmufwànyine kukùpa mukenji ùmwèùmwe awu, nwamònu’s, ncifwànyine kwikala cintu ànu cyòcì cimwècimwè aci, cintu kampànda cìdi ne cyà kwenzeka, cipròfetà; nwamònu’s, cintu kampànda cìdi cìswa kwenzeka, anyì cintu kampànda cyùdì ne cyà kwenza. Ki Mwanèètù Roberson ewu ùlandapuka, paanyimà apu, wakula mu myakulu. Èyo. Ncifwànyine kwikala ànu mukenji wùmweùmwe awu, ùfila dyandamuna òmwèòmwè adi, nwamònu’s, anyì mbifwànyine kwikala mikenji yìsàtù.

352 Mpindyewu, Nzambi kààkupàtulakù mikenji makumi àtaanu mu dilòòlò dimwèpelè tò. Bwà aci’s tudi bamanye, bwalu kanwèna—kanwèna mwà kuyàngata to. Nudi numòna anyì? Kàdi cyònsò cìdi ànu cìtácisha èkèleeziyà aci, bu mùdì... anyi cintu kampànda cìdiye munkaci mwà kwenza, mbwà diibakiibwa dyà èkèleeziyà. Nwamònu anyì? Dîbà adi mèmè—mèmè—mèmè ncivwa kàbìdi mufwànyine kwanyisha nàнку to, nwamònu’s, bwalu Yèyè mmwambe ne: “Ciikaleku kùdì bantu bàsàtù muntu ku muntu.” Nwamònu anyì?

353 Anu kùdì bantu bàsàtù muntu ku muntu, dîbà adi—dîbà adi ndi mufwànyine kwamba ne “Tùngùnukàayi nubifùndè, ne nubitèèkè pa cyambilu pààpa.” Nwamònu anyì? Dîbà adi mààlabà dilòòlò tudi tusangila cyàkàbìdi. Nwamònu anyì? Ne kwòkò cintu kampànda cìdi cyàmbà kwenzeka pankaci pàà mpindyewu ne mààlabà dilòòlò, Nzambi nèacyàkwilè ku ùmwè wà ku mikenji ayi. Nudi búmwè cìndì muswè kwamba aci anyì? Ciikaleku kùdì bantu bàsàtù muntu ku muntu. Nènku ndi ngeela meeji mpindyewu ne, Webster ùdi wàmba ne, cipròfetà cìdi mwà... .

Dikonka didi mwà...mukenji ùdi mwà kubìikidiibwa ne ncipròfetà pàdìwu kawùyi ùdjànjila kwamba bìcilwalwà anyì?

³⁵⁴ To. Piikalàci ne ncipròfetà, cidi cyàmba cipròfetà, cidyànjlila kwamba maalu àlwà kwenzeka. Aci's ncilelèlè, cyôci pààci.

³⁵⁵ Èyo, nènku ndi ngeela meeji...Mpindyewu, elu ndwà ndekeelu too ne patwàfika ku yidi mwab'ewu eyi.

120. Mwanèètù Branham, lùmwè lwà ku yôyi eyi lùdikù mwà—lùdikù mwà... Mwanèètù Branham, lwónsò kanà lwà ku nkonko eyi... Ndufundiibwe kùdi mutuuci wa ku màshinyi à mikàndà kàdi ludi ànu bu lukùpùke menemene. Kùdikù lwónsò kanà lwà ku nkonk-...Mwanèètù Branham, lwónsò kanà lwà ku nkonko eyi lùdi kuyi udyùmwa mulombodiibwe bwà kwandamuna anyi kwenzapu... anyi kuumvwijja (èyo), kulùmvwija, ulùtèèke ku luseke, ncyàkumvwaku bibi to nànsha kakesè. Mmidimu kaayi yidi mulami ne cyà kukwàta bilondèshile Mifundu?

³⁵⁶ Èè, ndi—ndi ngeela meeji ne bàdi naayi kuntwaku. Piikalàbi ne cidi...Ndi mumanye ne ng'umwe wa ku balami bàà mu èkèleeziyà wètù. Pa nànkù ndi ngeela meeji ne bàdi ne bulongame bwàyì kuntwaku. Bìdi bìkèngela bwà twètù kupeta àmwè mabeji pa cyôci aci ne kuàbanyina umwe ne umwe wà ku balami bèètù patwikala katùyì naawu. Ndi ndikonka ní tudikù mwà kupeta dìbeji dyà cyôci aci, Gene, òmwè...anyì, wèwè anyì Mwanèètù Leo, anyì bàmwè bàà ku bôbò, pabwìpì ne... kwangata matwè ku àsambòmbò anyì mwandamukùlu à ku òwò kuàpèsha balami bèètù. Aci's cidi cileeja midimu yà kwenza, bilondèshile Mifundu, cidi cìkèngela bwà mulami kwenzaye.

121. Byôbi byenzeke ne tupete cipròfetà anyì mukenji kampànda wà mu myakulu kabiyi mu bulongame, mmùshindù kaayi mwine uvwabi bìkèngela bwà twètù kubilongolola?

³⁵⁷ Mpindyewu, aci's mbwalu bwìmpè bwà lukàsàlukàsà, nwamònu's. Nwamònu anyì? Mpindyewu, àkubènèshè, wèwè mulami udi mutèèle bwalu ebu awu, bwalu eci ncintu cìmpè. Mbìmpè kucyèngeleka. Mpindyewu, nwènù bafile...Bu muntu kampànda mwà kulwa mu disangisha dyètù emu kàdi kufila mukenji anyì cipròfetà bìdi kabiyi mu bulongame to, kakwènaku cintu nànsha cìmwè cyùdi mwà kwenza pa bwalu abu to piikalàye munkaci mwà disangisha. Nwamònu anyì? Wèwè udi ànu...Yèyè's mmumanye ne ùdi pambelu pàà bulongame ne nebìikalè—nebìikalè...s'bìdi mwà kunyangakaja disangisha. Nwamònu anyì? Kàdi, byôbi byenzeke nànkù, cintu citàmbe bwìmpè cyà dyanza, bwà balami, cidi ànu kushààla bapùwe. Nwamònu anyì? Bwalu mupròfetà pa cibùmjà cyà ku cyambilu ki udi mu bushùwà bwà bwalu mwà...Nwènù nudi—nwènù nudi bamukubi, nudi bampulushi bèndè, nwamònu's, nwènù nudi balami bàdi ku nyungulwilu wètù. Nwamònu anyì?

³⁵⁸ Mpindyewu piikalàye mmuntu kampànda wa mu dyètù disang-...Piikalàyi ngwa pambèlu pàà disangisha dyètù, muntu

awu ki mmulongèshìibwe to, nwamònu's, ki mbalongèshìibwe to. Ki citùdi tuteeta bwà kubweja muneemu emu, nwamònu's, bwà twètù—twètù kumanya cyà dyenza. Tudi bamanye mwà kulongesha bantu bèètù. Kàdi piikalabi—piikalàbi ne mbàà pambelu pàà disangisha dyètù, èè, twètù katwèna bamanye mùshindù mwine ùdi muntu mukwàte ne byà luse awu mulongèshìibwe to.

³⁵⁹ Cileejilu, bu mùdi. . . Billy mmuvùlùke bwalu ebu, ku Costa Mesa, mu Californie. Musangu wònsò wùndi ndilongolola bwà kwenza dibìikila dyà ku cyoshelu kuvwà mwà kujuuka mukàji kampànda, ùnyeemakana mu tujila atu ùbànda ùpwèkà, wènda wàkula mu myakulu, ne mufwànyine kunyakaja dibìikila dyà ku cyoshelu adi. Nènku mvwa ànu ne cyà kupàtuka. Nudi mwà kumòna ne Nyumà ukaavwa mumane—ukaavwa mumane kubungamijiibwa, nwamònu's. Kakwena cintu nànsha cìmwè cidi mwà kubungamija Nyumà wa Nzambi pàdici mu bulongame to. Nwamònu anyi? [Katùpa kàà mukàbà wa mèyi munda mutupù—Muf.] . . . ànu kumpàla kwà kudilongololayè bwà kubanga, mùvwàye ùdilongolola mene's, bwalu mvwa mùmutàngile's. Mwambi kanà yònsò ewu neénzè cyòci aci pàdiye ùmòna cintu kampànda kaciyi mu bulongame nànsha. Pashiishe mukàji ewu ùvwa lwà paanyimà apu ne ùvwa muyiikile ne Billy, ne Billy kungambilayè pàmvwà ndwa dilòlò adi apu, yèyè ne: “Papa, s'udi mumanye mukàji uvwa munyangàkàje di—dibìikila dyà ku cyoshelu adi awu, malòlò àbìdì's?”

“Èyo.”

³⁶⁰ Yèyè ne: “Ùvwa musòmbe mwaba awu,” yèyè ne, “yèyè kwamba ne: ‘Butùmbi kùdi Nzambi, Billy, ndi mupete mukenji mukwàbò dilòlò edi!’”

³⁶¹ Èè, mpindyewu, nudi numòna's, mèmè kumutangidila lwà mu batèeleji amu. Kùvwa binunu byà bantu muntwamu; ndìbà divwà *Reader's Digest* mufunde bwalu bwà dyondopiibwa dyà Donny Morton, s'nudi bamanye, *Cishìma cyà Donny Morton*. Ki mèmè kutàngila mukàji awu, nènku ànu lwà pa dìbà dìmvwà mubange kwenza dibìikila dyànyì dyà ku cyoshelu adi, yèyè. . . Mpindyewu, yèyè kàvwa ànu mulongèshìibwe to; kakùyì mpatà to, mukàji mwìmpè. Kàdi kuzakanyaye, kubangaye kudyàkaja nsukì. Ùvwa ne nsukì mibebula, nwamònu's. Pa nànkù, nudi numòna's, yèyè ùvwa wa mu Assemblées anyi umwe wa ku èkèleeziyà ayi yìvwà—yìvwà micyanishe's. Ukaavwa ulongolola nsukì yèndè. Kwololayè cyanza e kukòkayè nshesheete yèndè ayi, kudilongololayè mùshindù awu. Ànu ne ki mèmè udi ubanga dibìikila dyà ku cyoshelu ewu anyi. . . Mèmè ne: “Mpindyewu, mbanganyi mwab'ewu. . . mbanganyi bàdìpu mpindyewu bàdi baswè kulwa kumpàla ne—ne kufila myoyi yàbò kùdi Mukalenge Yesù?”

³⁶² Kulandapukaye. Mèmè ne: “Sòmbe panshi.” Ùkaavwa

ne àbanga. Mémè ne: “Sòmbe panshi!” Nwamònu anyi? Nènku, balùmyànà wa yààya, bantu bônso. . . Mémè kwanji ànu kwimana. Kwenzaye ànu bu ne kàvwa mungumvwe to, ki mémè kubàndisha kàbìdì díyì. Ke mukàjì awu kungumvwayè dībà adi, bwalu mvwa mwambè kunyungisha citanda aci ne cicolokolo cinène aci mwimànyine ànu mwaba awu. Ki kusòmbayè panshi.

³⁶³ Mémè ne: “Mpindyewu, ànu mùmvwà ngàmba, mbanganyi bàdì baswè kulwa ku cyoshelu bwà kufila myoyi yàbò kùdì Nzambì?” Ki mémè kutùngùnuka buludi ne disangisha, nwamònu’s.

³⁶⁴ Kàdì ki dilòòlò adi pangàkabanga kuya ku màshinyì, bàvwa bankùte kùdì bantu. Kàdì ki musùmbà wa bakàjì wàwa biimane mwaba awu bu musùmbà wa nzòòlo, nudi bamanye’s ne: “Udi mupende Nyumà Mwímpè.”

³⁶⁵ Mémè ne: “Mémè mwenze cinyi?” Mémè ne: “Mmunyi mündì mwà kupenda Nyumà Mwímpè pa kulonda kwà bulomb-. . . diyì dyamba dyà mu Mifùndu?” Nwamònu anyi?

³⁶⁶ Ki mukàjì ewu kwambayè ne: “Mvwa ne mukenji wà ufuma buludi kùdì Nzambì.”

³⁶⁷ Mémè ne: “Kàdì uvwa uwùfila mu cikondo cibì, mwanèètù wa bakàjì.” Mémè ne: “Ncyèna. . .”

“Wèwè udi wamba ne aci kacìvwa—kacìvwa cyà kùdì Nzambì anyi?”

³⁶⁸ Mémè ne: “Ncyèna mwà kukwambila to, inàbànza.” Mémè ne: “Ndi—ndi—ndi ngeela meeji ne ke mùvwàbi, nwamònu’s.” Mémè ne: “Nèncyàmbe bwà kukubingisha, ne: ‘Ndi ngàmba ne ndi ngeela meeji ne ki muvwàbi.’ Ne ndi ngiitabuja ne wèwè udi mukàjì mwímpè, kàdì uvwa pambèlu pàà bulongame.”

³⁶⁹ Nènku ki mpaasàtà wendè nyèyè awu mwimane mwaba awu. Mvwa mumanyè ne yèyè nguvwa mpaasàtà wendè, nwamònu’s. Ki mémè kwamba. . . Mémè—mémè kwamba ne: “Kàdì ànu cintu cimwèpelè cìndì mwà kwamba, ncyà ne anyi wèwè uvwa mu mubidì anyi udi ne mpaasàtà udi mukulongèshe kàdì kàyì mumanyè kantu nànsha kàmwè pa bidì bitàngila Mifùndu to.” Mémè ne: “Bìvwa bikèngela bwà yèyè kulwa bwà kuyiikila nèètù ndambù pa bidì bitàngila Mifùndu. Aci’s ncyà cyanààna, udi pambèlu pàà bulongame. Udi mujimijje misuùkà yàbùngi, makèèlèlèlè mushààle awu dilòòlò, ne bààbùngì makèèlèlèlè dilòòlò kàbìdì, ne uvwa mufwànyine kwenza cintu cimwècimwè aci dilòòlò edi.”

³⁷⁰ Ki muntu ewu kwambayè ne: “Mwanèètù Branham,” yèyè ne: “mfwileku luse.”

Mémè ne: “Udi uswà kwamba cinyi?”

³⁷¹ Yèyè ne: “Ùvwa ne bukenji bwà kufila mukenji awu, ukààvwa mujikije’s.”

372 Mémè ne: “Mvwa pa cibumbà cyà ku cyambilu, ne nyumà wa baprófetà ùdi ùkòòkela muprófetà. Mémè ncidi ànu pa cibumba cyà ku cyambilu apa.”

Ki yèyè ne: “Èè. . .”

373 Mémè ne: “Ncìvwa ànu ne Mukenji. Mvwa ngenza dibìikila dyànyì dyà ku cyoshelu, mbwà kunowa. Mvwa mwelè bùkòndù bwànyì, ndi munkaci mwà kubùkòka mpindyewu. Kanwèdipù tukanu twà mèbà anyì cintu kampànda bwà kubunyakaja to, nwamònu’s.” Mémè ne: “Ncìcìvwa ànu munkaci mwà kukòka bùkòndù bwànyì’s.” Nènku—nènku mémè kwamba ne: “Mukàjì awu ùvwa mupangishe di—ditwàlà dyà misùùkà. Kùdì. . . Mbifwànyìne kwikala ne dikwàcisha kaayi bwà kuyiisha anyì ní ncinyì cikwàbò cyònsò pawikalà kùyì ubìikila ne ufikisha bangèzàmpèkààtù ku dilwa? Nwamònu anyì?”

374 Ki yèyè ne: “Èè, mukenji wèndè ùvwa paanyimà pàà wèbè wèwè. Wà mukàjì awu ùvwa ùmukila buludi ku cibumbà cyà ku cyambilu aku. . . Wà mukàjì awu ùvwa ùmukila buludi kùdì Nzambi.”

375 Mémè ne: “Muntu nànsha yèyè nganyì wèla meeji ne yèyè ngwa nyumà anyì mmuprófetà ajingululè ne cìndi ngàmba eci m’Mèyi matùma à Mukalenge. Kàdi yèyè mwikàle mupangi, ikale mene ànu mupangi. Twètù katùtu ne bilèlè byà mùshindù awu to, anyì Èkèleeziyà wa Nzambi,” mwikale ntèela Pòlò, nudi bamanye’s. Mémè ne: “To, mukalenge, kakwèna cintu nànsha cimwè cipyacìpyà to! Yèyè. . . Yesù wàkamba ne: ‘Diyì dyà muntu yònsò diikale mashimi kàdi Dyànyì diikale Dilelèlè.’ Pòlò wàkamba ne: ‘Nànsha Mwanjèlò wa mu Dyulu mulwè ne cintu cikwàbò kampànda cìdi kaciyì Apa eci to, èdiibwè mulawu.’” Mémè ne: “Mukalenge, wèwè’s udi mupàtuke mu njila ànu byà menemene ebi.” Mémè ne: “Udi ne èkèleeziyà wa mùshindù kaayi? Ndi ncinka ne mmusumbà munène wà cimvundù. Nwamònu anyì? Pawikalà mwà kulekela bantu abu benza nàнку mmunyi mùdiku mwà kwenza dibìikila dyèbè dyà ku cyoshelu? Yèyè mukàjì awu ùdi ne mudimu wà bwambi, bònsò bàdi ne mudimu wà bwambi, kàdi udi ne bikondo bilongolwela mudimu wèbè wà bwambi awu, wamònu’s, bìdi biwùlongolwela.”

376 Pa nàнку aci’s ncyà bushùwà. To, nènku mpindyewu aci cyòcì cyenzeke mu èkèleeziyà *wetu* mùshindù awu, mùshindù ewu, kùdì bàmwè bàà ku bàna bèètù bàà balùme anyì bàà bakàjì mu èkèleeziyà emu bàdi bààkula mu myakulu, mpindyewu, balami paanyimà pàà èkèleeziyà, kasumbù kàà balombodi ngeela meeji ne bìvwa bikèngela bwà kutwilangana naabo pàmwè, ne kwamba ne: “Lekèlaayi nnuleedileku cìdi cyamba pa mukàbà wà mèyi, ànu mu tusunsa tukesè cyanààna, nudi numòna’s.” Nwamònu’s, nudi ànu. . . Anyì—anyì, mpaasàtà, ùdi wàmba ne: “Ndi—ndi mutwishiiibwe ne mpaasàtà mmuswè kuyiikilangana

neenù. Nudiku mwà kusangila neetù mwaba ewu mu birò emu katanci kakesè, wamònu's, mwanètù." Dìbà adi, pashiishe udi ubwela muntwamu ne wàkula nendè bìmpè menemene. Nwamònu anyi? Kàdi kwamba ne . . .

³⁷⁷ Kàdi, mpindyewu, bôbò bapàtuke bônso mu bulongame ne batacisha mpaasàtà wenù, nwamònu's, bôbò—bôbò biikale bàtácisha mpaasàtà wenù, dìbà adi bìvwa bikèngela bwà nwènù bakùlù nùlwe kudiye nwambè ne: "Anji indilabi tǔng." Kàdi mpaasàtà yêyè munùlêje bwà nwènù kubìimanyika, dìbà adi mmumane kubàkula nyumà udi mu cintu aci, bwà ne ùdi . . . bwà ne bàdi munkaci mwà kukosoloja nyumà wa disangisha, nudi numòna's.

³⁷⁸ Nàнку mpaasàtà yêyè mwimanyike ne kaneemu kwònsò ne mwinyike mutù, nwènù kanwàmbi cintu nànsha cimwè to; ntàngidilàayi ànu mpaasàtà. Kàdi nwènù tàngilàayi mpaasàtà wenù. Yêyè munùleeje ne bìvwa bikèngela bwà nwènù kuciimanyika, dìbà adi ndàayi ne dinanga dyà bwena Kilistò, nwamba ne: "Mwanètù wa balùme, mwanètù wa bakàji," nànsha yêyè mufwànyine kwikala nganyì, "ndi ngeela meeji ne udi pambèlu pàà bulongame, bwalu udi munkaci mwà kutácisha mupròfetà, nudi numòna's. Yêyè ùdi ne mukenji wà kùdi Nzambì. Pàdiye ùjikija diyiisha dyèndè, pa dìbà adi netùmonè bwalu bwàci pashiishe." Nwamònu's, piikalàci cimutácisha.

³⁷⁹ Kàdi piikalayè mmuntu kampànda wa pambèlu, nènku mpaasàtà udi wìmana ne windila katanci kakesè ne kaneemu, dìbà adi yêyè . . . pàmwàpa yêyè neàtungunuke ànu buludi, nudi numòna's. Pa nàнку . . . Nènku bu nwènù mwà kumòna, misangu makumi citèemà pa lukàmà mùshindù awu, mandamuna, bitu misangu yònsò ànu kuteela Mufùndu kampànda anyi cintu bu nàнку awu, cidì pàmwàpa ciikale cyà musunya nseke yònsò yìbìdi. Nudi bamanye cìndi njinga kwamba mùshindù awu. Nwamònu anyi? Èyo.

122. Bantu basambùke pa umwe mbanyishìibwe bwà kwamba mukenji mu myakulu kakùyi dyandamuna anyi?

³⁸⁰ To. Bìvwa bikèngela bwà kwikalabo bààkula ku umwe ku umwe. Nwamònu anyi? Umwe ùfila . . . Umwe wàkula, ne pashiishe bàfila dyandamuna. Nwamònu anyi? Ne pashiishe mukwàbò yêyè wàkula, dyandamuna dilonda; bwalu cyanàànà, mwandamunyi awu kàkumanya cidìye munkaci mwà kwènza aci to bwalu kùdi mikenji yìbìdi anyi yìsàtù mimùkupila musangu ùmwè, nudi numòna's, ne aci ncifwànyine kumupèesha cibwejàkàjì. Ne Nzambì kì mmufidi wa cibwejàkàjì to, nudi numòna's. Pa nàнку umwe àkule yêyè, ne mukwàbò àndàmunè. Nwamònu anyi? Ne pashiishe . . . Filaayi mikenji yìsàtù, kàdi mukenji wònsò wàndamunyiibwè's.

³⁸¹ Dìbà adi netwikalè ne...Byenze bu Mwanèètù Ruddell mwà kwakula ne Mwanèètù Neville mwà kufila dyandamuna, Mwanèètù Fred mmushààle ànu mupùwe. Nwamònu's, bwà kupeta dyandamuna adi. Dyàmbedi, bikèngela byanji kulumbulwishiibwa dyàmbedi, bwà kumòna ne ncyà kùdi Nzambi anyi to, kumpàla kwà byònsò. Nwamònu anyi? Nènku's mbìmpè. Mpindyewu, Mwanèètù Ruddell yèyè wàkula, Mwanèètù Beeler wàkula, Mwaneetu Neville wàkula, mwandamunyi mukwàte ne byà luse awu ùdi ne mikenji yisàtù pa cibànzà; ncinỳi—ncinỳi, mmunyi mwàmanyaye kwà kwela dìnù ne kwà kwela dikàla's? Nwamònu anyi? Mulekelaayi. Fila mukenji ne pashiishe shààl mupùwe, indila wèwè ànu cyanàànà. Lekela cintu kampànda cisokolodiibwe kùdi ewu udi musòmbe ku luseke lwèndè aku awu's; yèyè awu àshaale mupùwe, musòmbe ànu vii. Nwamònu anyi? Nènku pashiishe dyandamuna dilwe.

³⁸² Pashiishe, panùdi nwenza nàнку, bifùndaayi pa mabeji dìbà adi, numonè cidi bajinguludi bàmba. Nwamònu anyi? Bòbò bamba ne: "Èè, ncyà—ncyà kùdi Nzambi." Èyo, kudi mukenji kampànda, nwamònu's, ùfùndaayi pa dibèji. Pashiishe anji indilaayi kakesè. Nènku katancì aka, èè, dìbà adi Nyumà ùdi ùmwikila, yèyè neàkule. Pashiishe mwandamunyi ùdi windila ndambù, bwà kumòna cìkalà Nyumà Mwìmpè mwà kwamba. S'ki Yèyè ewu ùpàtuka bwà mukenji awu, nudi numòna's. Nènku dìbà adi yèyè neàcìfùnde pa dibèji, nwamònu's. Nènku ciikaleku kùdi bantu bàsàtù muntu ku muntu.

123. Mwanèètù Branham, tudi bamanye ne wèwè udi mùsànjeelà mutùma kùdi Nzambi bwà cikondo eci cyà èkèleeziyà. Bimanyinu bimwèbimwè byàkalonda Yesù abi tudi tubimòna bikulonda, ne tudi...tuumvwa bwà cinyi bānga bàdi batàmbè kukumanya bìmpè bàdi beela meeji ne wèwè udi Maasiyà. Udiku mwà kuumvwija dishiilangana didi pankaci pàà malanda èbè ne Nzambi ne malanda àdi pankaci pa Kilistò ne Nzambi anyi?

³⁸³ Èè, ndi mumanye, bānà bèètù, aci ncilelèlè. Nwamònu's, kàdi twànji kwindilaayibi tūng, ndi ne cintu kampànda cìfùnda pa bwalu abu kaaba aka, ànu bwà katancì kakesè cyanàànà. Nwamònu's, misangu yàbūngi batu bacyumvwa ànu bibi. Nwamònu anyi? Kàdi, mpindyewu, mu muntu musangu kampànda...Nènku ndi muswe bwà bāmwè bàà kunùdi nubuululaayi pāmwè naanyì mu Luuka, nshapità mwi3 ku mvensà wa 15. Panùdi nwenza nubuulula apu, ndi mufwànyine kunwambila...Panùdi nucipeta apu, ne n'Luuka 3, cidi...ncifwànyine...cidi mu...Lekelaayi mèmè ànu...Ncyàkukànga ciibi to, bwalu kamwèna muntu nànsha umwe kuntwaku to. Lekelaayi—ndekelaayi ànu nnufikishileci, bānà bèètù. Nukàadi bacyumvumvwe, cidi cyenda cinyunguluka nseke yònsò. Kàdi lekelaayi nnwāmbilè, nwamònu's, cidi ne

cyà kwenzeka mùshindù awu. Bidi ne cyà kwenzeka mùshindù awu. Bu kabiyi nànkú to mvwa mwà kunyingalala bwà mukenji wànyì.

³⁸⁴ Tèèlejaayi, bânà bèètù, ndi nncupisha kumpàla kwà Kilistò bwà nwènù—nwènù—nwènù kushàala bapùwe mu citùpà eci, kàdi bu nwènù bàà nyumà nùnkú's nudi buumvwe's. Nwamònu anyi? Kanwenaayiku bamanye cintu ciine cyà kumpàla cyàkambàYe ku musùlù kwàka aci anyi? Kanwenaayiku bavùlùke cyàkambàYe anyi? “Ànu mùvwà Yone Mubàtiji mutùmìibwe bwà kudyànjidila dilwa dyà kumpàlà dyà Kilistò, Mukenji wèbè. . .” Mukenji Ngwìkalà mwà kudyànjidila Dilwa Diibìdi dyà Kilistò. Ki cyàkamba Mwanjèlò wa Mukalenge ncyòci aci.

³⁸⁵ Mpindyewu, mònaayi mpindyewu. Mpindyewu ne: “Ànu mùvwà Yone Mubàtiji. . .” Mpindyewu, nwènù bònsò nukàadi bùmfwè aci. Nukaadi bacìbalè mu mikàndà, ne bumfwè bantu bàvwa biimane mwaba awu baCitéèleja abu's, ne bikwàbò byònsò abi, pàakambà Mwanjèlò awu Yèyè mwine mukenji awu ne: “Ànu mùvwà Yone Mubàtiji mutùmìibwe bwà kudyànjidila dilwa dyà kumpàlà dyà Kilistò, wèwè udi mutùmìibwe ne Mukenji ewu, wàdyànjidilà Dilwa Diibìdi dyà Kilistò.” Mpindyewu, “Mukenji ewu.”

³⁸⁶ Mpindyewu, bu nwènù mwà kumòna, ne mèmè. . .Mwàna mutekète Willie awu mmutèèke dìnà dyànyì mwìnshì mwà mùtootò ùdi pàapa wàwa, nènku ki bwà cinyi ndi mucisambuke, nudi numòna's, bwalu mèmè—mèmè ncyèna ngeela meeji ne. . . Mpindyewu, nêngìikalè ne meeji matòòke ne mwanyì mwònsò, Ncyèna ngeela meeji ne ndi mufwànyine kwikala ne cintu kampànda cyà dyenza ne mùsànjeela awu to, nwamònu's. Ncyà bushùwà. Ndi ngiitabuuja ne pàmwàpa ndi mutùmìibwe bwà citùpà kampànda mu Èkèleeziyà Wendè, bwà kwambulwisha bwà kubandisha Mukenji awu kuwùfikisha pa kaaba kavwàwu mwà kwikala pàalwà mudyànjidi ewu, bwà kulwàye.

³⁸⁷ Kàdi ndi ngiitabuuja ne, mèmè mwikale cìndì eci, ndi. . . Ndi ngiitabuuja ne ndi ne Mukenji wà ditùkù. Ndi ngiitabuuja ne eci ki Bukènkè bwà ditùkù edi, ne ndi ngiitabuuja ne cidi munkaci mwà kufunkuna cikondo cilwàlwa aci, nudi numòna's, mèmè ndi ngiitabuuja ne Mukenji wàkambàye kwìnshì kwàka ne: “Mukenji wùdì naawu.” Mpindyewu, bu nwènù mwà kumòna Mùtootò wàkajuuka kuntu kwàka awu, wùvwa. . .

³⁸⁸ Ngànji ncyènzè. . .Ndi mumanye ne ndi—ndi munkaci mwà kulwijakajangana ne dībà bikolè mwaba ewu, kàdi ndi ne ndambù wa mikwabo nkonko eyi, milenga yèbè yà wòò. Ncyèna muswe. . .Mpa—mpaanyimà pàà dībà dikumi mpindyewu, pa nànkú, ne ndi mumanye ne nudi ne dijinga dyà kwalukila kumbèlu. Nwamònu anyi? Kàdi tèèlejaayi mwaba ewu. Lekelaayi nnuleejeku cintu kampànda. Nudiku mwà

kumpàku mèmè ànu—ànu ndambù mukesè wa tusunsa twà pamutù anyi? Èyo, èyo.

³⁸⁹ Mpindyewu tàngilàayi, mpindyewu lekelaayi ngàmbèku cintu kampànda. Mpindyewu, nwènù bânà bèètù ikalaayi balame cyôci eci munkaci mwènù. Nwamònu anyi? Mpindyewu, lamaayi eci munkaci mwènù. Bìdi bìkèngela bwà mèmè kunulongolola buludi ku cyôci eci bwalu wèwè udi mpaasàtà wanyi. . . nudi bampaasàtà bàanyi ne bikwàbò, nudi numòna's, nènku bìdi bìkèngela bwà mèmè—mèmè kufika ku dyanza cyôci eci. Ne nwènù nudi bânà bèètù bàdi bàkwàta naanyi mudimu mu Mukenji ewu. Nwamònu anyi?

³⁹⁰ Mpindyewu, bwà pa bìdi bìntàgila mèmè, bu muntu, ndi ànu bu munùdi amu ne mubiipe menemene kunùtamba nwènù. Ndi—ndi—ndi. . . Bààbùngi bàà kunùdi bónsò mbàkolèleku pa nshindameenu wa bwena Kilstò ne bikwàbò. “Mèmè ki mutambe bunène wa bangènzàmpèkààtù,” bu mwakambiibwabi musangu kampànda ne, “munkaci mwènù.” Nsòmbelu wa mutàmbe kupwekela, ngeela meeji, ukààdikù mumwèneshiibwe, bu mwena bupidyà ne mwena mpatà, ùvwa mmèmè.

³⁹¹ Kàdi kacya ànu ku bwànà ntu misangu yònsò mumanye ne kuvwaku Nzambì kampànda, ne mumanye ne kùvwa cintu kampànda cyenzèke mu nsòmbelu wanyi. Nènku aci's—aci's ncítambe lukonko kanà lwònsò elu, mwanèètù wa balùme. Nwamònu anyi? Kàdi lekèlaayi ngambe eci, ne nekùlwe—nekùlwe Mukenji kampànda, ne nekùlwe mùsànjeela. Ndi ngiitabuuja ne yèyè mwà kwikala muntu nei—neikale muntu kampànda paanyimà pàanyi. Nwamònu anyi? Neciikale. . . Kàdi Mukenji wùndi nyiisha ewu m'Mukenji mulelèlè wa ditùkù edi, ne wòwò m'Mukenji wà ndekeelu. Nudi numòna cìndi ngenza aci anyi, bânà bèètù? Ndi nnutèeka bwònsò kaaba kàmwè kàndi mèmè aku, bwalu nudimù menemene ànu mùndimù emu. Nudi baamisànjeela bàà Mukenji ùmwèùmwe ewu.

³⁹² Tàngilàayi kuneeku, ndi ne cifwànyikijilu. Ndi—ndi ngeela meeji ne ndikù mwa kucyenze bilenga menemene ku cifwànyikijilu. Ngǎnji ànu mpèngelekeku ciibi eci bwà katanci kakesè. *Ewu* n'Yesù, ne *wàwa* n'Yesù; èè, nènteekè *ewu* apa nùku, Getsèmànè, ne ewu *ewu* ne *wàwa*. Mpindyewu, kwena mwà. . . ncìvwa nànsha mwambe eci kumpàla kwà èkéleeziyà pambèlu pààpa to. Mpindyewu, vùlukàayi ne, mbukènkè bwà mùshindù kaayi (mùtootò) bwàkalombola muntu uvwa ukeba lungenyi awu, “*bwà kutulombola ku Bukènkè Bwèbè bupwàngàne*”?

³⁹³ Mpindyewu nkaadi njikija mwaba ewu mu katanci kakesè emu kàdi nwambileku cintu kampànda. Tujomonàayi cintu aci mu. . . cìdì Willie mwenze kuulu kwàka aci, ne pashiishe twambe ne cìmpè. Twàmbèbi ànu ne ncyà bushùwà. Ncyèna mwà kwamba nànkù to, bânà bèètù. Awu's mmuntu mudyambi's. Aci,

ncivwa mufwànyine. . . Nànsha bu mémè nciitabuuja, ncyèna mufwànyine kucyàmba to. Nwamònu anyi? Muntu mukwàbò yèyè ùcyàmba, awu nyèyè.

³⁹⁴ Kàdi, apa, ànu mùvwàbò bankonke, bàmwè bàà ku bàna bàà balùme aba, ní bàdi mwà kufila majaadiki à bimwè byà ku bintu bidì byenzèke. Ncitu muswè kubànda mu cyambilu bwà kufila bujaadiki bwà cintu kampànda cidì cyenzèke mu disangisha to. Mulongolodi wa ndongamu anyi muntu mukwàbò àcyenze, muntu mukwàbò ngudi ucyènza. Mémè ncitu muswè kwenza nànkù to.

³⁹⁵ [Mwanèètù wa balùme kampànda ùdi wàmba ne: “Bààkalwa mene kùdì Yone ne kwamba ne: ‘Wèwè ki Kilistò awu anyi?’”—Muf.] Èyo, ki cyòci aci, cìndì nteeta bwà kufika ku cyòci. [“‘Wèwè ki Mupròfetà awu anyi?’”] Kucivilayè. [“Kí mwambe ni ngewu anyi ngewu to, wàkamba ne: ‘Mémè ndi ànu ewu udi wela lubila mu cipèèlà.’”] “Dìyì dyà ewu udi wela lubila mu cipèèlà.” Wàkaditèèka pa kaaba kèndè yèyè mwine.

³⁹⁶ [Mwanèètù mukwàbò wa balùme ùdi wàmba ne: “Bààkamukonka ní ùvwa Mupròfetà awu, wàkamba ne ‘Kí mmémè nànsha.’”—Muf.] Èyo. Mpindyewu. . . Bwalu Mupròfetà awu ngewu uvwa Mòsà mwakule bwèndè awu. Nwamònu’s, ki Mupròfetà nyèyè awu, nwamònu’s. Nwamònu anyi? Kàdi yèyè ùvwa mumanye ne yèyè awu ùvwa nganyì, nwamònu’s. Kàdi yèyè wàkamba menemene, mpindyewu, ne. . . Wàkabàmbila bulelèlà, nwamònu’s, nènku kwambaye ne: “Mémè ndi dìyì dyà ewu. . .” Ùvwa n’yèyè. Yèyè—yèyè kwamba civwàye. Nwamònu anyi? Kàdi yèyè ùvwa. . .

³⁹⁷ Tùngùnuka. [Mwanèètù wa balùme kampànda ùdi wàmba ne: “Pààkalwa Kilistò musangu awu, wènda ùlonda Yone, bààkalwa kùdìYe, bààkamba ne: “Twètù tudi balongèshìibwe bwà kwitabuuja ne Eliyà ùvwa ne cyà kulwa kumpàla kwà Maasiyà.’ Yèyè ne: ‘Bu nwènù mwà kucyàkidila.’”—Muf.] Ùvwa nyèyè. Ncyà bushùwà. Ncyà bushùwà. Ki Yone kutùngùnukaye ne kwamba ne: “Mémè ncyènà cintu to! Mémè ncyèna cintu to! Ncyènà mukùmbànyine mwà kusùùlula nshinga wa cisàbaata Cyèndè to!”

³⁹⁸ Kàdi bishi bwà pààkamba Yesù bwèndè yèyè? Yèyè ne: “Nuvwa bapàtuke bwà kuya kamòna nganyì?” Èyo. Èyo. “Nuvwa baye kamòna dilèngè dikùpa eku ne eku kùdì lupepèlè anyi? Anyi cinùvwa baye kamòna ncinyì, muntu kampànda muvwàle bilàmbà bimpè ne bintu byà mushinga mukolè ne bikwàbò anyi?” Yèyè ne: “Bàdi mu nzùbu yà bakalenge. Kàdi nuvwa baye kamòna mupròfetà anyi? Mémè ndi ngamba ne èyo, mutàmbe ne mupròfetà.” Ùvwa mutàmbe ne mupròfetà, ùvwa mùsànjeela wa cipungidi. Ki civwàye ncyòci aci. Ùvwa mutàmbe ne mupròfetà. Yèyè wàkamba ne: “Kacya kakùtukù kwanji

kwikala muntu nànsha umwe mulela kùdì mukàjì mwikale munène bu yèyè to too ne mpindyewu.” Nwamònu anyì?

399 Ki civwàye, nwamònu’s, yèyè ùvwa mùsànjeela wa cipungidi. Yèyè nguvwa mumuleeje ku bantu ne mwambe ne: “Ewu n’Yèyè.” Bapròfetà bakwàbò bònso bàakakula *bwà* bwalu Bwèndè, kàdi Yone wàkamba ne “Ewu’s *ki* Yèyè.” Nwamònu anyì?

400 Mpindyewu tàngilàayi. Mpindyewu mònaayi. Beena meeji bàakalonda mùtootò. Mémè nèncyàngàtùlùlè mu mùshindù kampànda wà mushàadile, nwamònu’s. Beena meeji bàakalonda mùtootò, bàkonka ne: “Mfùmù wa Beena Yuda Udi mulediibwe awu ùdi penyì?” Nukàadi bumvwè musambu awu. “Tudi bamòne mùtootò Wèndè ku esètè ne tudi balwè bwà kuMukuukwila.” Nukàadi bumvwè aci, bacibalè mu Mifundu. Èyo.

401 “Batàngile ku wesètè, batùngunuke ànu ne kwenda kuya, tùlombole ku Bukènkè Bwèbè bupwàngàne.” Nwamònu’s, mùtootò ùvwa wènda ulombola ku Bukènkè bupwàngàne, bwalu mùtootò ùvwa uleeja ànu Bukènkè. Ki mwaba utùdi bapetèle eci kaaba aka ditùkù adi. Nwamònu anyì? Mbanganyì bàvwàpu mu dyàlumingu bwà kumòna aci? Nudi numòna’s, ànu ncifùminaku ku diyiisha pa bwalu abu. Butùmbì bwà Shekinah bùvwa buleejiibwe mu mùtootò, ne mùtootò wùdi ùBùleeja. Ki Mwanjèlò wa Mukalenge ewu mwimane pa cibumbà cyà ku cyambilu apa mwikale ùCìleeja paanyimà pàapa, mupatukile mu Butùmbì bwà Shekinah. Ànu cintu cimwècimwè aci menemene. S’ki cyòci aci cijaalame mwaba awu menemene. Citàngile ku cilelèlè aci, citàngile pambèlu pàapa ne Cyòci ciikale cileejiiibwe ànu ku luseke mùshindù awu. Nwamònu anyì?

402 Mpindyewu mònaayi eci, mpindyewu, mùtootò awu wàkajuukila ku esètè. Ncyà bushùwà anyì? Ùvwa mùtootò munène. Èyo. Kàdi nganyì uvwa mùtootò wà pa buloba wà cyà bushùwà mu cikondo cyà dilwa dyà Yesù? Mòna’s, Yone. Yèyè’s ke wakabàlombola too ne ku Bukènkè bupwàngàne abu. Ncyà bushùwà anyì? Aci’s civwa ku esètè ku dimwènèka dyà kumpàla dyà Yesù. Kàdi, mpindyewu, kùdi tuumitòotò tukesè twàbùngì tùdi tucyamakana too ne mùditu tukafika too ne ku mùtootò wà dilòlò.

403 Ne mùtootò wa dilòlò wùtu wùkenkesha ku dilòlò. Mùtootò wà mu dindà wùtu wùkenkesha mu dindà. Nènkù bùbidì bwàyi mmitòotò yà bunène bùmwe ne mmitòotò yà mùshindù wà mwomùmwe. Mpindyewu tèeka yibidì ne yibidì kaaba kàmwe ne newùcyùmwe, nwamònu’s. Nwamònu’s, s’ki bwalu mbwòbù abu. Pa nànkù kabyena. . . Mùtootò kí m’Maasiyà to, yèyè ùdi ùleeja ànu Maasiyà.

404 Mpindyewu, mùtootò kawùtu ùleeja bukènkè bwàwù wòwù mwine to. Mùtootò wùtu wùleeja bukènkè bwà dībà. Ncyà bushùwà anyì? [Mwanèètù wa balùme kampànda ùdi wamba ne: “To.”—Muf.] Huh? [“Mu mùshindù kampànda. Ngondo ngutu

wènza nàнку; mìtootò yìtu yìleeja bukênkè bwàyì sungasunga.”] Èyo. Èyo, ngondo, èyo, ùle- . . . Ndi muswè kwamba ne ngondo ùtu ùleeja bukênkè ebu. Èyowà’s, Uh-hum. Mpindyewu, bu—bu mùtootò mwà kuleeja bukênkè bwàwù, dîbà adi’s bìwwa bikèngela bwà bukênkè bwàwù abu bùfùmine kùdì . . . kùdì Nzambì, bwalu ndibwe dyà mashikà dyà mùshindù kampànda. Kì mmwòmò anyì? [Mwanèètù wa balùme awu ùdi wàmba ne: “Dîbà.”] Huh? Ndîbà dyòdi diine, dipàtuke mu dîbà. [“Mèbà awu àdi kule menemene ne dîbà dyètù edi.”] Èyowà. Nènku bôbò . . . Tudi bayiile ne mèbà awu mmafùmine ku dîbà dinène adi. Dîbà didi diimansha missile eyi ne yôyi mmissile mikesè yà yôsha ànu mùdi dîbà emu. Pa nàнку mmèbà makesè bwètù twètù’s. Ncyà bushùwà anyì? Makênkè makesè. [“Àmwè àdi . . . àbùngì aa kùdìwu matàmbe ne dyètù dîbà edi ku bunène.”] Mèmè ndi muswè kwamba ne bwètù *twètù*, bwètù twètù, nwamònu’s. Tudi munkaci mwà kwakula bwètù twètù biine mwab’ewu. Èyo.

⁴⁰⁵ Mpindyewu, piikalàwu mmèbà kutùdi twètù, anyì mafidi à bukênkè, àdi citùpà cyà mufidi munène wa bukênkè awu. Nwamònu anyì? Dîbà dinène didi ditùpa bukênkè bunène, bukênkè bupwàngàne. Mèbà makesè, anyì mìtootò mikesè, yitùdi mwà kumòna mu mibidi, àdi mwà kwikala kule ntàntà ne—ne dîbà didi dikenka edi’s, kàdi cidìwu atuleeja mbukênkè butàmbe bukesè. Kàdi àdi ànu munkaci mwà kufidila bukênkè bujaadiki. Ncyà bushùwà anyì? Dîbà adi pàdi dîbà dinène dipatuka, mèbà makesè àdi àbwicidila. Ncyà bushùwà anyì? Wòwò ki—ndîbà kutùdi twètù to, àdi maleeji ànu mùdi dîbà. Nudi bumvwe cìndi muswè kwamba aci anyì?

⁴⁰⁶ Mpindyewu, didi ditàmbe bunène munkaci mwàwù (mu dindà) didi dikobola bwà dilwa dyà dîbà, dibwela dyà dîbà ne dilwa dyà dîbà, kùdi mùtootò wa mu dindà ne mùtootò wa dilòòlò. Ncyà bushùwà anyì? Mìtootò yìbidi yà mitàmbe bunène, mmùtootò wa ku esètè ne mùtootò wa ku wesètè.

⁴⁰⁷ Mpindyewu, mpindyewu nudi bamòne mwaba ùdi bwalu anyì? Èliyà nguvwa mùsànjeela bwà kusekelela, kukòbola dilwa dyà mùtootò wa ku esètè, ne kudyanjila kwamba ne nekwikale mukòbodi wa mù—mùtootò wa ku wesètè, anyì dilwa dyà cyàkàbìdi dyà ditùkù dipyadipyà paanyimà pàà ditùkù edi dimane kupita. Mpindyewu nudi numòna cidì bwalu anyì?

⁴⁰⁸ Ku esètè: “Nekwikalè bukênkè mu . . .” Nwamònu’s, ànu kumpàla menemene kwà Dîbà kukòbodiibwadi pa buloba, mùtootò wa mu dindà wùdi ùfila bujaadiki ne “Dîbà didi dilwa.” Ncyà bushùwà anyì? Nwamònu’s, aci’s cidì citwàla mùtootò wa mu dindà. Èè, dîbà adi mùtootò wa mu dindà ne mùtootò wa dilòòlò yìdi mìtootò yà mùshindù wà mwomùmwè, ne kùdi tuumitootò tukesè tucyàmakàne ku nseke yònsò eku. Kanwenaayiku numòna cìndi muswè kwamba aci anyì? Baamisànjeela abu.

409 Èè, dîbà adi, Yèyè ùvwa ùbadiibwa bu Alpha ne Omega, Cibangidilu ne Ndekeelu, dibwe dyà Jasje ne Sardoine. Nudi bumvwè cîndi muswè kwamba aci anyi? Mpindyewu, dilwa dyà—dyà Kilistò dikaadi dyènda diseemena pabwîpî menemene, dîbà adi Mukenji ùvwà Eliyà ne cyà kuyiisha mu matùkù à ndekeelu, bu maalu-malonda mwà kwenzuluka. . . Ànu mwàkakòbola mùtootò wà dîndà dilwa kuntu kwàka amu, mùtootò wa dilòlò ùdi ùkòbola dilwa dyà ditùkù dipyadìpyà, dîngà ditùkù. Nànkù edi ndilwa dyà dîbà didì dikòbola di—diya dyà—dyà dîbà ditùvwà naadi ne dilwa dyà dîbà dipyadìpyà, nwamònu's, cikondo cipyacìpyà, cikondo cipyacìpyà cìdì cilwa.

410 Mpindyewu, tèelejàayi: Pashiishe, pìkalàbi ne Yone wàkatwàla mukenji wèndè ne wàkakòbola dilwa dyà kumpàla dyà Kilistò, ne Eliyà ùdi ùlwa mu ditùkù dyà ndekeelu, mupròfetà wàkamba ne: “Nekwikalè Bukènkè ku ìbaamulòlò.” Mu ngaakwilù mukwàbò, nekwikalè Bukènkè ku ìbaamulòlò.

411 Bukènkè bwà dilòlò, bukènkè bwà dilòlò butàmbe bunène butùdì naabu mmùtootò wà dilòlò, bukènkè bwà butàmbe bunène butùdì naabu. Èè, dîbà adi, bùvwa ne cyà kukòbola mukenji ùmwèùm wè wà bwena ùvwàku bu mùtootò mukwàbò awu. Ùdi munkacì mwà kukòbola dîbà, wàkula bwà dîbà.

412 Èè, mpindyewu tudi mu dîbà dyà dilòlò, Makènkè à dilòlò àdi mwab'ewu. Eci cikondo cikaadi cijikè. Nudi bumvwè cîndi muswè kwamba aci anyi? Ditùkù edi dikaadi dimane kupita, ne nekwènzeke dikòbola dyà Ditùkù dikwàbò dilwalwà.

413 Bwalu, nwamònu's, ncyà bushùwà ne. . . Bu ne muntu kampànda ùvwa ku wesètè ne mutàngila paanyimà ku mùtootò awu, nùnkù's wòwò mmufwànyine kusanganyibwa ku esètè. Ne pashiishe, nudi numòna's, “tudi bamòne mùtootò Wèndè ku esètè,” kàdi mu bushùwà bwà bwalu. . . bàvwa—bàvwa ku esètè batàngile ku wesètè batàngile ku mùtootò awu. ²Ncyà bushùwà anyi? Beena meeji abu bàvwa basanganyibwa ku wesete. . . ku esete batàngile paanyimà ku mùtòtò wà ku wesete. Nudi buumvwè cîndi muswe kwamba aci anyi? Kàdi ùvwa mmùtootò wa ku esètè kùdi bàvwa ku wesètè.

414 Nwamònu's, ànu bu mutùdì bafwànyine kwamba. . . Ntu misangu yònsò ngàmbe ne: “Kwinshi ke kuulu.” Mmunyi mùdi mwà kumanya ne aci kî ncyà bushùwà? Tudi biimàne mu Cyendèlèlè, pa nànkù Pòle Sud ùdi mwà kwikala kuulu ne Pòle Nord ùdi mwà kwikala kwinshi. Katwèna bamanye to. Nwamònu's, njila wa kuulu ùdi kwinshi. Nwamònu anyi? Tudi. . . Netùshiyè eci; paanyimà pàà cyòci eci tudi tubwela mu Cyendèlèlè. Nkusekelela, kukòbola dilwa dyà Cyendèlèlè, ditùkù dishiilàngàne, cikondo cishiilàngàne, ne byònsò pàmwè.

415 Mpindyewu tudi ìbaamulòlò. Tudi twitabuuja nànkù. Tudi twitabuuja ne dilwa dyà Mukalenge dikaadi pabwîpî. Èyo. Mpindyewu, byòbi nànkù, dîbà adi bidi bikèngela kwikalè

Bukênkè bwà dilòòlò. Nènku Bukênkè bwà dilòòlò, bilondèshile Maalàki 4, bùvwa ne cyà “kupingaja myoyi yà bânà kùdi baataatù,” bààlukila ku cibangidilu.

416 Kàdi pààkalwàye bwà musangu wà kumpàla, ùvwa wàluja myoyi yà baataatù kùdi bânà. Bânà bàvwa aba bàvwàye mukungwije mu nyungulwilu wendè abu’s. Ùvwa ne cyà kulwa ne bânà. . . myoyi yà baataatù (baataatù bàà kale, bàà ngiitabùùjilù wa cyena kale abu) ùbàpingaja ku bukênkè bùvwàye munkaci mwà kukòbola mwaba ewu ebu’s.

417 Kàdi pààlwàye cyàkàbidì, neàcìkùdimùnè (nuvwaku bamòne ne, kumpàla kwà buloba kubùtudiibwabu ne: “ditùkù dinène ne didì dikwàcisha bwòwà dyà Mukalenge”) ne “kupingaja myoyi yà bânà kùdi baataatù,” wà dilòòlò—mùtootò wà dilòòlò ùvwa mùtootò wà mu dindà mu cikondo aci. Amen.

418 Ndi ntèkemena—ndi ntèkemena ne nèncilongòlòlè, nwamònu’s. Mùtootò wà dilòòlò ùvwa mùtootò wà mu dindà, bwalu wòwò awu mmùtootò ùmwèùmwe awu. Twètù tudi ku wesètè, batàngile ku esètè. Bwòbò bàvwa ku esètè, batàngile ku wesètè. S’mmùtootò ùmwèùmwe awu menemene. Nudi bùmvwè cìndi muswè kwamba aci anyi? Mbilondèshile mwaba wùdi usanganyibwa, nwamònu’s, nànsha ciikàlè mùtootò wa ku esètè anyi mùtootò wà ku wesètè. Nudi bumvwè cìndi muswè kwamba aci anyi? Èyo.

419 Mpindyewu, cidi citwàla. . . ewu ùtwala diitabuuja dyà baataatù kùdi bânà; mu eci cikondo “ndiitabuuja dyà bânà dyàlukila kùdi baataatù.” Nudi bakanyungùluke, ne baalùkile kàbidì. Kanwèna bamòne cinùdi baswè kwamba anyi? Nwamònu cìndi muswè kwamba anyi? Mmùtootò ùmwèùmwe awu dībà dyònsò. Cintu cimwècimwè aci, Mukenji ùmwèùmwe awu, cintu cimwècimwè aci cyalùkile cyàkàbidì. Cyajiki.

420 Mpindyewu mmùshindù kaayi unùdi numanya njila unùyaaya? Ndi ngeela meeji ne dībà dīlwalwa dīikalàbo menemene mwà kujandula ne buloba kabwèna nànsha bùyunguluka to. Mèmè ndi ngiitabuuja aci ne mwoyi wànyi wònsò. Ncyèna ngiitabuuja. . . nànsha bóbò bacijaadika ku maalu à mamanya anyi ní ncinyi cikwàbò cyònsò to. Bàvwa benze bijaadiki byàbùngì ne maalu à mamanya byàkakèngela bwà kuumushabò. Nzambi wàkamba ne buloba bwàkiimana. . . dībà. Ndi muswè kwamba ne dībà dyàkiimana pamutù pàà buloba. Nwamònu’s, dībà. Ncyèna ngiitabuuja menemene ne dībà. . . mèmè—mèmè—mèmè ncyèna ngiitabuuja ne dībà didi dyènza cidìbo bàmba ne didi dyanza aci to. Ndi mumanye ne ngondo ùtu utentemuka, ne ndi ngiitabuuja ne—ne dībà didi pààdi ditentemuka. Nwamònu anyi?

421 Kàdi bàmwè bàà kùdìbo bàdi bàmba ne: “Yèyè wàkatàngila dipanga dyà Yoshùwà, nwamònu’s, ne” wàmba

ne: “Wàkiimanyika di...mucyàmbe...” Èè, wàkamba ne: “Wàkiimanyika buloba.”

422 Mémè kwamba ne: “Kàdi’s uvwa mungambile ne: ‘Buloba bwòbò—bwòbò budidinge ànu bwimane, mbufwànyine kulaluka kuya ànu bu mùdi mùtootò wà mulanjilanji mu cibwàshibwàshì.’ Nwamònu anyi?” Mémè ne: “Dìbà adi, cyàkenzekà pashìishe ncinyi?”

423 Mvwa nyiikilangana ne Mukalenge Thiess kwinshì eku, mulongeshi wa Bible mu cilongelu citumbùke; nudi bamanye ne yèyè awu ùvwa nganyi’s, kàdi wàkangambila cyòci aci. Mémè ne: “Mémè ndi ngùtabuuja cìdi Bible mwambe, cyà ne buloba bwàkiimana aci...” Mémè ne: “Ndi muswe kwamba ne: ‘dìbà dyàkiimana.’ Yoshùwà kwambilaye dìbà ne: ‘Imana kaaba kàmwè!’ ki kwimanadi mwaba awu.”

424 Yèyè ne: “Èè, Yèyè’s wàkiimanyika ànu buloba, Wàkamòna dipanga dyà Yoshùwà.”

Mémè ne: “Udi wenza cintu cimwècimwè aci ku meeji èbè, dìbà adi’s.” Nwamònu anyi?

425 [Mwanèètù wa balùme kampànda ùdi wàmba ne: “Mémè ndi ngùtabuuja ne bàdi mwà kujaadika ku maalu à mamanya ntanta wàkiimana dìbà adi—adi.”—Muf.] Èyowà’s, s’ki bòbò... Ngaakacyùmvwa, mémè pàanyi. Èyo, mudibo bàmba... Mvwa muumvwe mulongi kampànda wa mabulunga a muulu mwaba ewu kukaadi cikondo kampànda mwikale wakula pa cyòci aci, bwà ne bòbò bàvwa mwà kucijaadika. Ne mu cikondo cimwècimwè cìvwàbò...ke cintu kampànda kwenzekaci mu lupepèlè cìvwàbò mwà kumòna mwaba ùvwa cintu kampànda cyenzeke mu Dyulu ne cyàkakàngula Mbù Mukunze musangu awu ne bikwàbò. Bàakajaadika byònsò abi. Èè, balùmyànà, ki mémè udi unwàmbila awu’s, mitootò yifumina kule mwaba kampànda wà pàtupù yakenza cintu kampànda cyà mùshindù awu mu cikondo aci. Kàdi nànsha nànkù, aci ncitàmbe kwikala cyà ndòndò kutùdi.

426 Pa nànkù, mpindyewu, cìdi cyenza ne Mukenji ewu... bìkèngela bwà Mukenji ewu bawùtàbalèlè mu kaneemu aka, bwì kujaadika ne bìdi nànkù. Mpindyewu, tudi bamanye, bàna bèètù, ne muntu kèna mwà kwikala Nzambi to. Muntu, kàdi pèndè’s n’nzambì, muntu ne muntu wa kunùdi ùdi nzambì. Ùvwa mwenjìibwe bwà kwikala nzambì kampànda, kàdi kí mpaùdi mu ewu mwoyi ewu to. Nwamònu anyi? Yesù ùvwa muntu ànu mutùdi pèètù emu, kàdi Nzambì ùvwa munda Mwèndè. Kaabujima kàà Nzambì kàvwa munda Mwèndè; twètù tudi ne Nyumà mu cipiminu kampànda.

427 Kàdi bu mùdibi ne Bukènkè ebu mbulwè, ne pìikalàBu Mbukènkè bulelèlè bùdi ne cyà kukòbola Mukenji wàkakòbola Yone Mubatiiji awu, bu mwàkambaYe ne ki cyàkenzayè ku musùlù kwaka...Kàdi anji tàngilàayi, mmunyi mùvwàbi

bifwànyine kwikala—mmunyi mùvwàbi bifwànyine kwikala cingà cintu? Ntàngilaayi mémè, nwamònu's, nciyi nànsha ne kàlaasà kiine kashààdile kèètù aka kalonga's. PààkangambilaYè bintu bìvwà mwà kwenzeka abi, nànsha cimwè cyà ku byòbì abi kacitukù cipangile to. Nànsha cimwè cyà ku byòbì abi kacitukù cipangile to. Tàngilàayi cidiYe mwenze's. Tàngilàayi, Yèyè ùdi mene ne . . .

428 Ki mémè kwambila bânà bèètù, kale wàwa kukaadi bidimu, ncyèna mumanye ne nganyi udi mufwànyine kwikala mutambe kutukulumpila munkaci mwètù emu to, kàdi kubàmbila bwà bintu ebi, bwà kumòna kwà Bukènkè ebu ne diikala dyàBò, ne bikwàbò byònsò. Mpindyewu fòtò ùdi ùleja ne cìwva cilelèlà. Bintu byònsò bishìlèshìlàngàne ebi bìdi bijaadika ne mbulelèlà. Kí mmwòmò anyi? Èè, díbà adi, pìikalàbi ne aci ncilelèlà. . . Nènku m'Bukènkè's.

429 Mpindyewu, bangàayi lwà pa ìnaayi. . . [Katùpà kàà mukàbà wà mèyi munda mutupù—Muf.] . . lwà kuulu ku mvensa wa 35 aku, anyi ndi muswè kwamba ne . . . Tùbangilàayi lwà ku mvensa wa 14, mwanèètù. Udi mumubuulule nganyi? Èyo. Bangilaayi lwà ku mvensa wa 14 wa nshapità mwi3 wa Luuka Munsantu mwaba awu. [Mwanèètù wa balùme kampànda ùdi ùbala Luuka 3.14-16.]

[Ke mäsàlaayi mwómùmwè kumukonkawù, àmba ne: Kàdi citwènza ncinyi? Ke yèyè kubàmbila ne: Kanùnyèngi cintu cyà muntu ku bukolè, anyi kanùshiminyinyi muntu bwalu; ne sànkāayi ne difutu dyènu.]

[Nènku bu mùvwà bantu bònsò bindile ne myoyi kuulukuulu, ne bantu bònsò badikonka mu myoyi yàbò bwà Yone, bwà ne yèyè ùwva Kilistò awu, anyi to;]

[Yone wàkandamuna, ùbambila bònsò ne: Ncyà bushùwà ne ndi nñubàtiiza ne màyi; kàdi ewu udi ne bukolè buntàmbe ùlwalwa, ne mwena nshinga wa cisàbaata ùndi nciyi mukumbane mwà kusulula to: neànubàtiizè ne Nyumà Mwimpè ne kapyà,]

430 Èyo. Cìwva ncinyi aci? Bantu bàwva mu dindila dyà ne myoyi yizùka bikolè mùshindù awu bwà Maasiyà kumwenekaye, pààkamònabo mudimu munène wa bwambi mulaabìbwè ewu, wà muntu ùpàtukila mu cipèèlà mwikale wènza kampanye kèndè ne wàlukila mu cipèèlà, bantu bààbùngi, bàvwà balondi bèndè mene, bàakamba ne: “Yèyè ki Maasiyà awu.” Bàwva bacitèkèmene ne myoyi kuulukuulu, nwamònu's.

431 Nènku pìikalàbi ne eci ki Mukenji mulelèlà wà Nzambì ùdi ùdyànjidila Dilwa adi, wà Yone Mubàtiiji, ùmwèumwè awu's. . . bu cintu cimwècimwè aci, Mukenji wà Eliyà, newikale ne cyà kwediibwa meeji mu mùshindù ùmwèumwè awu. Nwamònu anyi? Pa nànkù aci ke cidi cyàndamuna lukonko, ngeela meeji,

menemene. Nwamònu anyi? Bikèngela kucyèlabo meeji mu mùshindù ùmwèùmwè awu. Nwamònu anyi?

432 [Mwanèètù wa balùme kampànda ùdi ùkonka ne: “Kùdiku cintu kampànda citùdì bambùle bujitu bwà kwenza bwà kuteeta kukwàcishakù muntu kanà yònsò udi mufwànyine—mufwànyine kusanganyiibwa mu—ndululu wa nàнку awu anyi? Anyi citùdì bafwànyine kwenza ncinyi?”—Muf.] Ki nkufwànyineku kwikala cintu nànsa cimwè to, kakwèna cintu nànsa cimwè cyùdì mwà kwenza to. [“Meeji moonèke . . . Aci ncifwànyine kudyunda mu meeji moonèke anyi?”] Èè, ncifwànyine kulwa mu meeji moonèke bu cyòci mwà kulwa ku eci nùku: bu muntu awu, mwena bùvwàbò bàmba abu awu, mwà kufila bujaadiki ne yèyè nguvwa Maasiyà awu, díbà adi tudi bamanye ne ùvwa mwà kwikala kilistò wa mashimi. Nwamònu anyi?

433 Nwamònu’s, pàcìdì ànu muntu awu yèyè mwine mufwànyine kushààla mulame kaaba kèndè, nwamònu’s. Ànu mwàkambilàbo Yone, Yone kààkadi . . . Kakwena bwalu nànsa bùmwè bumwamba ne yèyè wàkamba cintu nànsa cimwè pa bwalu bwàbò to. Bàvwa—bàvwa—bàvwa cisàmbà, beena—beena Kilistò balenga bàà dikema bàvwà . . . anyi beena kwitabuuja bàvwà biitabuuja Yone.

434 Kwambabò ne: “Muntu ewu mu bulelèlè mmupròfetà wa Nzambì, kakwènakù mpatà to.” Bòbò ne: “Udi—udi—udi—kwèna Mupròfetà awu anyi?”

Yèyè ne: “To.”

435 Yèyè ne: “Mòna’s, udi—udi—kwèna Maasiyà awu anyi?” Nwamònu’s, bòbò—bòbò bàvwa beela meeji ne ncìvwayè bulelèlè. Nwamònu anyi?

Yèyè ne: “To.” Nwamònu anyi?

“Kí—kí—kí ngwèwè anyi? Udi—udi nganyi?”

Yèyè ne: “Mémè ndi díyì dyà ewu udi wela lubila mu cipèlèlè.”

436 Ne pashìishe Bible mmwàmbe ne: “Bantu bàdi mu dindila ne myoyi yìzùkà.” Bàvwa mbànganyi biine abu? BaMuumvu, Bamutèèleji, bamulondi, bàna bààbò. Nwamònu anyi? Mpindyewu, kabàvwa baswè kumutàpa ku mwoyi to, kabàvwa bàteeta bwà kumutàpa ku mwoyi to. Kàdi, nwamònu’s, bòbò—bòbò bàvwa bulelèlè bèèla meeji munda mwà myoyi yàbò ne yèyè nguvwa Maasiyà awu.

437 Èè, mpindyewu, maalu-malonda àdi ne cyà kwenzuluka mu mpùngà wònsò. Tudi bamanye aci. Adi ne cyà kwenzuluka.

438 Ànu bu munùdi nwangata mu Maatàayi 3 amu, mbambe ne: “Bwà kumònabi mwà kuula, kùdì cyàkambàbo kùdì mupròfetà ne: ‘Ndi mubiikile Mwànàanyii wa balùme mu Ejiipìtu.’” Mpindyewu, aci kacìvwa . . . Cìvwa cyàkula bwà Yesù, Mwànà awu; kàdi kooshàayi dísu mu mifundu ya kwinshi; ùvwa

n'Yakòbò, mwànà awu, kàbidi. Nwamònu anyi? Nwamònu anyi? Byònsò bidi ne dyumvwija pàbidi.

439 Pa nàнку mpindyewu bu. . . bu—bu cintu aci kaciyi cijuuke, mvwa mufwànyine kutungunuka ànu ne kwamba ne cicivwa mu matùkù àcìlwalwà, bwalu ndi mumanye ne Mukenji ewu mmufùmìne kùdì Nzambì ne wòwò ngùdì mùdyanjididi wa Kilistò, nènku n'Nyumà ne bukolè bwà Eliyà bwalu bìdi ne cyà kwalujulula myoyi yà bânà. Cintu cyònsò nkòng cidi cicijaadika, pa nàнку cidi ne cyà kwangata mmwenekelu wa cintu bu nàнку bwà kwikalaci munkaci mwà bantu balelèlè, bàdi—bàdi bìitabuuja kakùyì mpatà nànsha mikesè to ne bàdi bânà bèènu ne balunda bèènu.

440 Mpindyewu, mvwa ne. . . Ndi ne ngàngàbukà kaaba aka mene mu cimenga emu. Ndi mwà kunwàmbila bwà ngàngàbukà kampànda. . . ncyàkunwàmbila ne nganyi to, mmulunda wanyì wàkangeela mabòko, ne kwamba ne: “Billy, mbifwànyine kwikala bipeepèlè bwà mèmè kukwàmbila ne: ‘wèwè udi Maasiyà wa Nzambì wa ditùkù dyà ndekeelu.’” Nwamònu anyi?

Mèmè ne: “Ngàngàbukà wa yààya, kwenjiku nàнку to.”

441 Yèyè ne: “Èè, ncyèna mumòna muntu nànsha umwe pa buloba ukaadikù mupete cintu ne mwambè bintu ne mwenze bintu byùdì wenza ebi nànsha, Billy.” Ncimwambulwishe byàbùngì, nwamònu's. Yèyè ne: “Ntu nya ku èkèleeziyà eyi ne mmòna bayiishi aba ne bikwàbò,” yèyè ne: “wèwè udi mushiilàngàne naabo kàdi mèmè ndi mumanye ne kwèna ne kàlaasà kàànsongo kalonga to.” Nwamònu anyi? “Ne ndi mumanye ne wèwè kwèna mumanyi wa maalu à nsòmbelu to, bwalu udi. . . maalu à mu nsòmbelu kààdyàkwenza bintu abi to.” Nwamònu anyi?

Ki mèmè ne: “Aci's ncyà bushùwà, Ngàngàbukà.”

442 Kabyèna bikèngela ànu kwakula nèndè to bwalu yèyè kì mmumanyè mene nànsha, kwèna mwà kufika nèndè ku kiipàcilà kàà kumpàla nànsha, nwamònu's, bwalu kì mmumanye cyà dzenza to. Kàdi ki bwalu mbwàbù, nudi numòna's.

443 Ndi mumanye mukàji wa bafiike udi musòmbèle mu njila wa pabwìpi naanyi, ne ùtu wenzela muntu mukwàbò ùndì mumanye mudimu, ki mukàji wa muntu ewu kubiikilaye, wàmba ne: “Mukàji awu kakùyì mpatà to mmufwànyine kukukuukwila bu nzambi, bwalu ùvwa munkaci mwà kupunga ne lufù ne kansèrè ki wèwè kutentekela mukàji awu byanza ne kwamba ne ùvwa. . .” Mukàji udiye ukwacila mudimu awu, bàyèndè ne ngàngàbukà kampànda ewu (kì nngàngàbukà ùmvwà ngamba awu to, mukwàbò ngàngàbukà) ùtu unàya ndundu wa tubwengà ne bikwàbò pamwè nèndè, nènku ùkaavwa mumwèlè làà. Nènku yèyè awu ùvwa mukàji dìbooyi dyà nyànèndè, kàdi ùvwa mumwèlè làà bwà kufwàye, kàdi wàkondopiibwa kakùyì mpatà nànsha. Ne ngàngàbukà kàvwa nànsha mwà kupeta

kashoonyi kààdi, kàà kanséré aku to. Nènku, nwamònu's, s'ùvwa mufwànyine kwamba. . .

444 Mpindyewu, bôbô kí mbaswè kucyàmba bu mûndi ngeela meeji ne bàdi bàcyàmbilamu anyi mutùdi tucyàngacila amu to. Nwamònu anyi? Bàdi bàmba ne bàdi—bàdi. . . Bàdi bàmba ne bàdi biitabuuja ne Nzambi ùdi neetù, munda mwètù, ùkwàcila mudimu mu twètù; aci kí ne muntunkààya ùdi Nzambi to, nudi numònà's. Mpindyewu, bàvwa bamanye ne Yone ùvwa ànu muntu wetù ewu.

445 Ki mùvwa kàbìdi Yesù ànu muntu wetù ewu. Yesù ùvwa ànu muntu wetù ewu, Ùvwa mulediibwe ànu kùdi mukàjì, ùvwa ne cyà kufwà. Ncyà bushùwà anyi? Ùvwa muntu, byàkakèngela bwà kudyàye ne kunwàye, ne kumvwa nzala, kudilayè mwadi, ne kumvwa nyòòtà, ne bikwàbò byònsò, ànu muntu wetù ewu bu munùdi amu ne bu mûndi emu. Kàdi Nyumà wa Nzambi ùvwa munda Mwendè mu kaabujima, kàyì mupima to. Ùvwa wa bukolè bwònsò mu bukolè.

446 Mwaba awu, Eliyà ùvwa ànu citùpà cyà Nyumà awu; pàmwàpa mulaaba maanyi kumutù kwà bânà baabò ndambu, kàdi yèyè ùvwa ànu citùpà cyà Nyumà. Kàdi bantu bàvwa bindile Maasiyà. Nènku bààkamòna citùpà eci kumutù kwà bânà bààbò, kwambabo ne: “Kaa, ekèlekèle, eci's cidi ne cyà kwikala Yèyè's!”

447 Kàdi pààkabangaYe kuteema, kaabukènkè kakesè kàà Yone kujimaku. Nwamònu anyi?

448 Nènku makènkè makesè aa neàjime pààlwàYe, bwà Kilistò mulaaba maanyi munène wa mu Dyulu awu kufùmina ku esètè too ne ku wesètè. Nènku. . . ne. . . Nwamònu anyi? Kàdi Yèyè kààkwikala pa buloba mpindyewu to, Maasiyà awu kààkwikala pa buloba to too ne pìikalà Bukalenge bwà bidimu cinunu butwàdije. Nwamònu anyi? Nwamònu anyi? Bwalu Èkèleeziyà: “netwàngaciibwè muulu pàmwè bwà kutuutakeena ne Mukalenge mu mpeepèlè.” Yèyè kèna ulwa pa buloba to. Udi ùbàkala Mukàj'Èndè-musela uya.

449 Ùdi wangata cibandilu, nudi bamanye's, bu mùdi. . . Cìvwà ndinaya kaayi adi's, Leo, muvwa muntu awu wèyemeja cibandilu ku luseke lwà nzùbu aku? Romeo ne Juliet. Ncyà bushùwà, wèyemeja cibandilu kwibayè mukàjèndè kuya nèndè.

450 Mpindyewu Yèyè ùdi upwekela ànu ku cibandilu cyà Yakòbò aku, wàmba ne: “Pssii, Munanga wanyi, lwàku apa.” Nwamònu's, netùbande bwà kutuutakeena Nèndè.

451 [Mwanèètù wa balùme kampànda ùdi wèla lukonko ne: “Mwanèètù Branham, eci ncifwànyine kwikala cikumbanangane ne cyòci aci díbà adi anyi? Bantu aba bààkalwa kùdi Yone Mubàtiji ne bàvwa bajinga kumubiikila ne m'Maasiyà. Kàdi's mvwa mukuumvwe musangu kampànda wamba ne mwena Yuda ùdi wèla meeji ne Maasiyà ùvwa

Nzambì.”—Muf.] Wamba ne? [“Ndi ngamba ne, bantu aba bàakalwa kùdi Yone Mubàtiji, bèèla meeji ne yèyè nguvwa Maasiyà awu, Kilistò awu. Mvwa mukumvwe wamba musangu kampànda ne Maasiyà awu ùvwa ne cyà kwikala Nzambì, bwà beena Yuda.”] Èyowà’s, mukalenge. Ncyà bushùwà, “laabi.”

⁴⁵² [Mwanèètù wa balùme kampànda ùdi wamba ne: “Èè, Yone kubatandishaye, wamba ne kàvwa Kilistò awu ‘to,’ ne Kilistò awu ùvwa ùlwa.”—Muf.] Ncyà bushùwà. [“Kàdi kî ncyà bushùwà ne bayiidi bàakabiikila Yesù ne ‘Mukalenge’ anyi? Ki Yesù kutwàye ku cyôci aci, wamba ne: ‘Nwènù nudi nuMbiikila ne ‘Mukalenge,’ ne ki cîNdi.’”] Èyowà. [“Mu—mu Yone 13, mwàkwoweshàYe...?...”] Èyo, Yèyè’s ùvwa mufwànyine kuciitaba. [“Bu mùdiye Mukalenge, èyowà, Yèyè wàkaciitaba.”] Yèyè wàkaciitaba. [“Wàkaciitaba.”] Uh-huh. Kàdi, nwamònu’s, Yesù mwikale *Mukalenge*, pàakaMukonkàbo ne ki cìvwaYe anyi, Wàkamba ne: “Èyowà’s, mukalenge. Mèmè ndi Mukalenge ne Mfùmù webè. Wèwè udi uMbiikila nàнку awu, ne udi wamba bimpè, bwalu ke cîNdi.” Kàdi... [“Kàdi kakwènàkù muntu mukwàbò nànsha umwe udi mufwànyine kwikala, aci...”] mufwànyine kwamba aci to. To.

⁴⁵³ Byenze bu ne cìdi... Bu muntu kampànda mwà kwamba ne mèmè mvwa nzambì, èè, lekèlaayi nwwambile mu Dîna dyà Mukalenge Yesù ne “Aci nntùpàkànyì!” Nwamònu anyi? Mèmè ndi ngènzàmpèkààtù musungila ku ngàsà, mwikàle ne Mukenji wà kùdi Nzambì. Nwamònu anyi? Nwamònu anyi?

124. Èkèleeziyà wa pa kaaba udi ne cyà kutabaleela bèndè anyi kènà ne cyà kutabaleela bèndè, bwà majitu à bèndè—bèndè bà pa kaaba (bèndè yèyè mwine) kumpàla kwà kwambulaye majitu à majinga à beenyi mu matunga à ku baabèndè anyi? Kàdi nànsha nàнку, paanyimà pàà yèyè... èndè... Paanyimà pàà yèyè mumane kukumbaja majinga èndè, mbikùmbanangane ne Mifundu bwà èkèleeziyà wa pa kaaba kwambulwishayè mu mudimu wà bwambi bilondèshile makànda àdiyè naawu anyi?

⁴⁵⁴ Èyowà. Cyà bushùwà. Budimi bùtu bùbangila kumbelu, nudi numòna’s. Tudi—tudi—tudi tutàbaleela majinga à bètù twètù biine kaaba aka, bwalu tudi bafwànyine kwikala ne... ewu ng’èkèleeziyà wa Nzambì, anyi mene, èkèleeziyà wenù mukèsè awu, èkèleeziyà wa Nzambì. Mpindyewu, panwikalà kanùyi nànsha mwà kufuta mpaasàtà wenù to, kanùyi nànsha mwà kupeta mikànda yà misambu ne bikwàbò to, kabìvwa bìkèngela bwà nwènù kwikala nuyituma mungà mwaba to. Nwamònu anyi? Kàdi dîbà adi panùkàadi bamanè kufuta mabànzà wònso à èkèleeziyà, ne bikwàbò byònsò, mabànzà ènù wònso mafuta ne bikwàbò byònsò, bilongolola ne biikale pabwìpi ne byènda bimpè, dîbà adi nudi mwà kwambulwisha mwanèètù mukwàbò awu udi ukèngela dyambulwisha dikèsè kuntu kwàka awu, nudi numòna’s. Kupetaku ndambù wa... .

⁴⁵⁵ Ndi ngeela meeji, dîbà dîdî. . . panwikala nufuta mabànzà à èkèleeziyà wenù mvwa njinga kwikala ne ndambù wa mfranga mitèèka ku luseke bu mulàmbù wà mudimu wà bwambi bu bantu mwà kudyùmvwa basàkìibwe bwà kufila ku mudimu wà bwambi. Bwalu bantu bààbùngì mbaswè kufila ku mudimu wà bwambi pàdìbo kabàyi baswè kufila mu èkèleeziyà yàbò yà pa kaaba ne bikwàbò nànsha. Pa nàнку pìikalàbo kabàyi bàfila ku midimu yà bwambi to, bàdi bakàyi tuula ku cìnga cintu. Ki bwà cinyi ndi muswè kwamba ànu bwà kwikala ne kashèètà kàà mudimu wà bwambi, ne ndi mufwànyine. . . Ke mùshindù ùtùdi tuteeta kwenza.

125. Luuka 1.17, swàku umvwijeku dilwa dyà Yone mu “nyumà wa Eliyà.”

⁴⁵⁶ Èè, ngeela meeji ne tudi ne Luuka—Luuka 1.17, uh-huh, ùlwa mu “nyumà wa Eliyà.”

⁴⁵⁷ [Mwanèètù wa balùme kampànda ùdi ùkonka ne: “Ke mwaba ùdi biitabi bà dibwelulula dyà nyumà wa muntu munda mwà mukwàbò bàpetela dilongesha dyàbò awu anyi?”—Muf.] Mfwileku luse? [“Ke mwaba ùdi bantu bàdi bitabuuya dibwelulula dyà nyumà wa muntu mu mubidi batwàdijile dilongesha dyàbò dikwàtakaja adi ànyi?”] Pàmwè apa’s. [“Nwamònu’s, bàdi biitabuuya ne yèyè wàkaalukila mu. . .”] Èyowà. [“. . .yèyè wàkaalukila ne mubidi mukwàbò] Èyowà, nwamònu’s, ncyà bushùwà ne nyumà kàtùkù ùfwa to. Aci’s ncilelèlà. Nzambì ùtu wàngata muntu Wendè kàdi kàtu wàngata Nyumà Wendè nànsha. [“Bàdi bàmba ne: ‘Wèwè mwikale wa maalù mîmpè newàlukile mu—mu muntu kampànda mwîmpè.’”] Èyowà. Èyowà. [“Pawikala wa maalù mabi s’udi mwà kwalukila mu mbwa.”] Èyo, bàdi ne. . . Èyo.

⁴⁵⁸ Èè, mpindyewu, bu mu—mu—mu Inde mwàmwa, mùvwa mmu cisumbù cyà bantu mutwàkatuutakeena naabò mùshindù ewu, ne mbafwànyine—mbafwànyine kukòmba panshì ne lukòmbò lwà tumponji; kudyata nànsha tunkenene anyi cintu kampànda, udi mufwànyine kwikala mudyate cilongo cyèbè kampànda anyi cintu kampànda. Nudi numòna’s, bòbò kî mbafwànyinekù kucyenza to. Kàdi, nudi numòna’s, aci’s—aci’s mbumpàngaanù. Nwamònu anyi? Aci’s mbumpàngaanù. Aci’s ncilelèlà.

126. Pòlò wàkambila ba. . . Pòlò wàkamba bwà “Kukèba ne mwoyi mujimà mapà matàmbe bwîmpè, nànsha nàнку ndi nnùleeja njila mutàmbe bwîmpè.” Bu wèwè mwà kuswà umvwijaku cìdi “njila mutàmbe bwîmpè” aci.

⁴⁵⁹ Dinanga, Kolintò wa Kumpàla 13, nwamònu’s. “Kebaayi. . .” Angataayi wa Kumpàla. . . Mpindyewu angàtà Kolintò wa Kumpàla 13 mwaba awu, mwanèètù. Kolintò wa Kumpàla, nshapìtà wa 13, nènku mpindyewu tubalàayi ànu mvensa yisàtù anyi yinaayi yà ndekeelu yà cyòci aci. Kolintò wa

Kumpàla 13, cyà ndekeelu . . . lwà ku mvensa yisatu yà ndekeelu yà nshapità—yà nshapi— . . . [Mwanèètù wa balùme kampànda ùdi ùbala Kolintò wa Kumpàla 13.11-13—Muf.]

[Pàncivwà mwànà, mvwa ngààkula bu mwànà, mvwa ngùumvwa bu mwànà, mvwa ngeela meeji bu mwànà, kàdi pangààkalwà muntu mukolè, ngàkatèèka bintu byà bwànà ku luseke.]

[Bwalu mpindyewu tudi tutàngidila mu lumwènù, bibwicidile; kàdi dībà adi neciikale mpàla ne mpàla: mpindyewu ndi mumanye citùpà; kàdi dībà adi nemmànye too ne mùndi mèmè . . . kàbidì ne mùndi mumanyìbwe.]

[Nènku mpindyewu bisatu ebi bìdi bishààla, diitabuujà, ditekemena, luse; kàdi cinène cidi cibitàmbe byònsò nduse.]

Uh-huh, luse, nwamònu anyi?

127. Mmunyi mùdi mwanèètù wa balùme kampànda ne cyà kupiishiiibwa mwena butekètè bwà ùdipèèsha kaaba mu èkèleeziyà kabàyi bamulombe bwà kwenzayi nànkù?

Kaa, ekèlekèle! Èè, mutwàlaayiku's, ngeela meeji. Nwamònu anyi?

Mmunyi mùdi mwanèètù wa balùme kampànda mwà kupiishiiibwa . . . (Kabivwa bikèngela bwà kumupiisha to!) . . . **mwena—mwena butekètè bwà kudyàngacila kaaba mu èkèleeziyà kabàyi bamulombe bwà kwenzaye nànkù awu?**

⁴⁶⁰ Cileejilu, bu yèyè mwà kuswà bwà—bwà kwikala mulami. Nwamònu anyi? Kàdi kàyì mulòmbiibwe bwà kwenzaye nànkù to, nànsha nànkù muswè kwikala mulami nànsha byà munyi, nwamònu's. Èè, muntu yèyè nànkù awu, nudi bamanye ne kudi kaacintu kampànda kakesè, nudi bamanye's, katekète mwaba kampànda, nànsha byà munyi, nènku dībà adi's mvwa ànu mufwànyine kuyiikilanganaku nendè mu dinanga.

⁴⁶¹ Nènku, mu bushùwà bwà bwalu, kwenaku uswa bwà—bwà kwenza cintu cyà mùshindù awu paùdi kùyì mumanye menemene to. Tèèkaayi wenù muntu udi mutàmbe bwìmpè mu kasùmbù kènù aku's, nwamònu's, mùshindù awu. Mwanèètù, kubwejiku cintu nànsha cimwè muntwamu cidi . . . Anji teetà muntu awu, dyàmbedi. Mulami ùdi mwambule bujitu bupite bwà mpaasàtà. Bidi bikèngela ikale kàyì ne cyà dimubanda naaci to, ke mùdi mulami nànkù's. Nwamònu anyi?

128. Ku mudimu wà mèèsà à Mukalenge, muntu kampànda wàkalwa ku cyoshelu bwà kusambila. Mwanèètù Branham ùvwa mwimane paanyimà pà—pà bintu byà mèèsà à Mukalenga pàvwàbi byènda bìfidiibwa apu, kwambaye ne yèyè “kàvwa mwa kubishiya bwà kukasambilaye ne

muntu uvwa ku cyoshelu awu to.” Bu wêwè mwà kuswa umvwijaku.

⁴⁶² Ngaakatùma mukwàcishi awu, nudi numòna’s, Mwanèètù Neville. Ndi mvùluka dilòlò òwàci cyenzèke adi. Ndi ne cyà kushàala pabwipi ne mèèsà à Mukalenge awu, nwamònu’s, nànsha mene pàdì . . . Tàngilàayi kuneeku. Mpindyewu, ncyèna ne dîbà dyà kubwela mu cyôci eci to. Muntu kampànda musòmbe kaaba aka uvwa mukonke, mu bushùwà bwà bwalu. S’ki bwalu mbòbù ebu’s, mwanèètù wa balùme. Paùdì—paùdì ne mèèsà à Mukalenge, adi cifwànyikijilu cyà mubidi wà Yesù Kilistò. Ncifwànyine kwikala . . . Bivwa bikèngela kwikalaci cilama dîbà dyònsò.

⁴⁶³ Tàngilàayi, pàakambilà Eliyà—Gehàzi ne: “Angàta mulangala wanyi” (yèyè wàkabènesha mulangala awu), e kwambaye ne: “tùngùnuka ne njila webè. Nènku muntu yèyè mukwakwische, kùmwandàmùnyì to. Muntu yèyè mukwele mwoyi, kumupingàjidi to. Tùngùnuka, ne ukatentèkè mulangala awu pa mwànà wa mu dibòko awu.” Mmwômò anyi? “Shàalaayi ne mulangala awu!” Nwamònu anyi? Nènku ki cîmvwà ngenza ncyôci aci.

⁴⁶⁴ Mpindyewu, bu ne kakùvwa mpaasàtà mukwàcishi mwab’ewu to, mwimàne kwàka . . . Mvwa mfùmina ku diyiiisha. Ndi mvùluka ne cívwa ndîbà kaayi. Nènku mêmè . . . bu ne bòbò . . . Bu ne mwanèètù Neville kàvwa mwimane mwab’ewu to, anyi muntu kampànda bwà kukwàcishakù muntu awu ku cyoshelu . . . Mvwa mfùminaku ku diyiiisha, pa nàнку mvwa mwimane ku mèèsà à Mukalenge. Nènku pàkaavwàbo pabwipi ne kwangata mèèsà à Mukalenge apu, nènku nkàvwa mudilongolole bwà—bwà kufila mèèsà à Mukalenge. Mwanèètù Neville ùvwa ànu kacya wimana ku luseke aku, ne mêmè mvwa munkaci mwà kufila mèèsà à Mukalenge. Mpindyewu, Mwanèètù Neville ùvwa mwimane mwaba awu.

⁴⁶⁵ Kàdi bu ne bàvwa balwè ku cyoshelu ne Mwanèètù Neville mucii kale ànu mu diyiiisha dyèndè, ne mwikale munkaci mwà kuyiisha? Mvwa mwà kuya ku cyoshelu ne muntu awu, bu yèyè mwà kujuuka mu disangisha pàvwàye munkaci mwà kuyiisha apu, mubànde ku cyoshelu. Mvwa mwà kwikala mumòne ne mwanèètù wa balùme awu ùvwa . . . ne ùvwa ne dilaabiibwa dyà Nyumà. Ùvwa munkaci mwà kukwàta mudimu wèndè. Ùvwa mwambi mu . . . ùvwa mu njila wa mudimu, mwambi mu njila wa mudimu.

⁴⁶⁶ Nènku kabìvwa bikèngela bwà wêwè kubàlekela bàakula mu myakulu, bimanyika, anyi mu mùshindù kampànda, mwambi mu njila wa mudimu to. Nànsha nàнку, piikalàbi ne Nyumà Mwîmpè ngudi wakula ne muntu kampànda ne yèyè kunyeemena ku cyoshelu bwà kusùngidiibwa, mwambi atungunuke ne kukwata mudimu wèndè; mpaasàtà, mulami,

mukwàcishi, kwòkò kwikale mukwàcishi anyi mwambi kanà yònsò ewu, aye kùdi muntu awu pa lùkàsà. Nènku kutacishiku mwambi awu mu njila wa mudimu wèndè to. Nwamònu anyi?

⁴⁶⁷ Nènku mvwa mwimane paanyimà pàà ntooyi munkaci mwà mudimu wànyì, mwikale mfilà mèèsà à Mukalenge. Ne mukwàcishi wanyì, Mwanèètù Neville, ùvwa mwimane ku luseke lwànyì. Ki muntu kampànda kulwaye lubilu ku cyoshelu, mèmè kwamba ne: “Pweka, nda kudiye aku, Mwanèètù Neville.” Ki Mwanèètù Neville kuyaye kùdiye. Ki bwà cinyi ncivwa muyè to.

⁴⁶⁸ Mpindyewu, bu ne kakùvwakù mukwàcishi apa to, anyi ní nganyì mukwàbò uvwa mwà kuya kùdi muntu awu to, Mvwa mufwànyìne kwikala mwele cidya ne mwimanyike mèèsà à Mukalenge, ne mupweke ne—ne mukamòne musùùkà ùvwa musùngidiibwe awu. Nudi numòna’s? Kàdi bu mudibi ne kuvwa muntu kampànda wa kutuma, aci’s civwa cifwànyìne kunguumusha meeji ku mudimu wànyì ùmvwà ngenza’s, nwamònu’s, kaaba kàmvwà mfidila mèèsà à Mukalenge.

129. Cyònsò cidi muntu mwà kwenza . . . Ncinyi cyònsò cidi muntu mwà kwenza bu mwena mudimu wa budiswile mu dikwàta dyà mudimu ne muntu udi munkaci mwà kukeba Nyumà Mwimpè, kàdi kushààla mu Mifundu?

⁴⁶⁹ Èyo. Tùngùnuka wèwè ànu ne kumutèèlela Dìyì, ki cintu cimpè cyà dyenza aci. Dìyì didi ne Bukènkè. Amba wèwè ànu ne: “Mwanèètù, Yesù wàkaMulaya. Vùluka ne, mmulayi Wendè.”

⁴⁷⁰ Kùmunyukudi, kùmusakidi, anyi kùmunyungìshì, anyi cintu kampànda to. Kuteeci ànu bwà—bwà . . . to, kudidìngi kuteeta kumupeeshaYe to, bwalu kwèna mwa kumupèesha to. Nwamònu anyi? Nwamònu anyi? Wèwè . . . Nzambi neàmupèesheYi. Tùngùnuka wèwè ànu ne kutèèla milayi. Nwamònu anyi? Shààla mwimane mwaba awu utèèla mulayi. “Nzambi wa mu Dyulu, ndi nsambidila mwanèètù wa balùme. Mulayi Wèbè ngwà ne Wèwè neùmupèeshè Nyumà Mwimpè.”

⁴⁷¹ Dìbà adi paùdi uteeta bwà kumukolesha ku mwoyi. . . Yèyè ùdi wamba ne: “Kaa, mwanèètù, mpaasàtà, mwanèètù,” nànsha ewu udi ku luseke lwèndè mwikale nganyì, “ndi—ndi muswè Nyumà Mwimpè.”

⁴⁷² “Mwanèètù, Mmulayi. Nzambi ngudi mwenze mulayi. Udi witabuuja ne Yèyè ngwakalaya anyi? Mpindyewu, kùCyediku mpatà to. Wèwè mwitabùùjè mulayi, Nyumà Mwimpè neàlwe kùdi mu dìbà kanà dyònsò mpindyewu. Ikala muMwindile ne myoyi kuulukuulu. Lekelela byònsò byùdi naabi kùdiYe, wamba ne: ‘Mukalenge, ndi mwimane pa mulayi Wèbè.’”

⁴⁷³ Mpindyewu, tùngùnuka ne ditèèla. Mpindyewu, enzela cyèbè—cyèbè—cyèbè—cyèbè cyena bwalu, wamònu’s, mufikishe ku diman. . . Tùngùnuka ne ditèèla. Mpindyewu amba ne: “Ambila Nzambi. Mpindyewu, ukàadi munyingàlale anyi?”

“Èyo.”

474 “Mpindyewu amba ne: ‘Mukalenge, Wèwè wàkamba ne bu mèmè mwà kunyingalala Wèwè uvwa mwakàne bwà kumfwila luse. Wèwè udi wamba ne mèmè munyingalàle ne mubàtìjìibwe mu Dinà dyà Yesù Kilistò bwà dilekelediibwa dyà mpèkaatù yànyì, Ndi mufwànyine kupeta Nyumà Mwîmpè. Mpindyewu, Mukalenge, ngénjì nàнку. Ngénjì nàнку, Mukalenge. Ngénjì cyôci eci. Ndi mwindile, Mukalenge. Wèwè ngwâkacilaya.’”

475 Nwamònu’s, ki mùshindù ngwòwò awu, tungunuka ànu ne kumukolesha ku mwoyi. Mulaminyine ànu pa Dîyi. PìikalaYe ne cyà kulwa Neâlwe dîbà adi.

130. Muiyishi anyi mwena Kilistò kanà yònsò ewu udi wenza bîmpè bwà kubènga kwitabuuja... To: Muiyishi anyi mwena Kilistò kanà yònsò ewu ùdi wènzà bîmpè pàdiye kàyì wítabuuja dikubiibwa dyà Cyendèlèlèlè anyi?

476 Mpindyewu, twànjì tumonàâyibi. Ndi ndifwànyikijila ne “...kwenza...” Mònaayi ní nudi nucibala mùshindù ùmwèùmwe wùndi mubalè ewu. Cibalàayi. [Mwanèètù wa balùme kampànda ùdi ùbala lukonko elu ne: “Muiyishi anyi mwena Kilistò kanà yònsò ewu ùdi wènzà bîmpè pàdiye kàyì wítabuuja dikubiibwa dyà Cyendèlèlèlè anyi?”—Muf.]

Mvwa ndyambidila ne mvwa mufwànyine kwikala mucibàle mu cyôci. Mpindyewu, èè, ndi... .

Muiyishi udi kàyì wítabuuja dikubiibwà dyà Cyendèlèlèlè ùdi wènzà bîmpè anyi?

477 Ndi mufwànyine kwitabuuja ne muiyishi awu uvwa wenza... pìikalaye kàyì mumanye kantu nànsha kàmwè pa bìdì bitàngila dikubiibwa dyà Cyendèlèlèlè to. Kàdi pìikalabi ne yèyè uvwa mucimanye ne mumanye ne m’Bulelèlè, kàdi pashìishe kàyì ùBùyìisha to, bìdì bimukèngela bwà adyumvwe yèyè mwine bundù’s; ncyà bushùwà, anyi mwena Kilistò kanà yònsò ewu. Mpindyewu, mwena Kilistò, mpindyewu, ndi mufwànyine kwambila—mwena Kilistò udi kàyì muumvwe aci bîmpè menemene... .

478 [Mwanèètù wa balùme kampànda ùdi ùkonka ne: “Aci kî ndilongesha dyà pa butòkà to, mmwòmò anyi, Mwanèètù Branham, bwà kuyiishibwadì bantu bàtù kacya kabàyiku...?”—Muf.] To, to, to. Mpindyewu, aku ke kùmvwà ndwa kuupuka. Èyowà. Nwamònu anyi? Nwamònu anyi?

479 Mpindyewu, nudi bavùlùke cîmvwà mwâmbe mu dyàlumingu dishààle anyi? Wèwè mwikàle muiyishi, petà cyambilu. Pawikala kuyi muiyishi to, ikala ne nsòmbelu wà dîyiisha dyèbè. Wamònu’s, ki mùshindù mutàmbe bwîmpè wà kucyènza ngwòwò awu, kwikala ne nsòmbelu wa dîyiisha dyèbè. Pawikala muiyishi, petà cyambilu, wamònu’s, ne uye kàyìisha. Pawikala kuyi nàнку to, ikala wèwè ànu ne nsòmbelu

wa diyiisha dyèbè, lekela nsòmbelu webè ikale cyambilu cyèbè. Nwamònu anyi? Ngeela meeji ne aci cidi dyandamuna ku byàbúngì, kî mmwômò anyi? Nwamònu anyi? Nwamònu anyi? Bwalu misangu yàbúngì tutu tujandula ne. . . Ne nwènù bânà bèètù nutu nwenza aci mu èkèleeziyà yènù.

⁴⁸⁰ Vùlukàayi ne, mwena kwitabuuja webè misangu mikwàbò ùtu ùteeta kuumvwija bintu ne kwenza bintu, mbitàmbe bwîmpè bwà nwènù kubàlongesha bwà kabènji nànkù to. Kàdi piikalà muntu kampànda muswè kumanya cintu kampànda, alwe kùdì umwe wa ku. . . ewu udi mulongèshìibwe bwà kucyènza. Nudi numòna anyi?

⁴⁸¹ Twàmbèbi ne, èè, mpindyewu, ànu mùdì muntu mufwànyine kwamba ne: “È, ndi ngamba. . . Bàdi bangambila ne, nwènù lwà mu èkèleeziyà wenù amu nudi nwitabuuja dikubiibwa dyà Cyendèlèlè.”

⁴⁸² Mpindyewu, bìdi bikèngela nutàngile. Nudi pàngäpa bafwànyine kabwela mu cimvundu cinène menemene cinùdì kacya kanùyì bânji kubwelamu to, nudi numona’s, ne kumuvwija mubiipe kutàmba dyàmbedi. Wèwè amba ne: “Nkwambile anyi, bu wèwè mwà kulwa bwà kukonka mpaasàtà wetù, wamònu’s. Wèwè—wèwè ndaaku ukayiikile nendè, wamònu’s. Tudi. . . Ncyà bushùwà, ndi mumanye ne mpaasàtà wetù ùtu witabuuja nànkù. Ndi nciitabuuja kàbìdì, kàdi ncyèna ne bukolè bwà kutwa nyama ku mikòlò to. . . Mèmè ncyèna muyiishi to. Ndi ànu nciitabuuja cyanàànà, ki cyònsò cìndì pàanyi mumanye. Ndi nciitabuuja bwalu ndi mumuvmvwe ucyùmvwijila bitòoke tòò mu Bible, ne kacivwa cyà kwela mpatà nànsha yà kànà kùndì.” Nwamònu anyi?

⁴⁸³ Kàdi mbitàmbidile bwîmpè bwà—mbitàmbidile bwîmpè bwà beena kwitabuuja kwakulabò ne mpaasàtà bwà bwalu abo. Nènku, mpaasàtà pèndè, ikala mutwishìibwe ne yèyè mmumanyè mwà kwandamuna, yèyè pèndè. Nènku nùcìlongàayi bìmpè byà menemene, bwalu misangu yàbúngì nebàkuswikilè muntwamu, nudi numòna’s. Ncinyi. . .

⁴⁸⁴ [Mwanèètù wa balùme mukwàbò ùdi wàmba ne: “Mwanèètù Branham?”—Muf.] Mfwilàku luse. [“Ndi ndyùmvwu mupiile kakesè, kàdi ndi—ndi mumanye dibìikila dyànyì ne ndi mushindike disungula dyànyì bushùwà.”] Uh-huh. [“Wèwè’s udi mwambe ànu ne ‘Pawikalà muyiishi, s’bivwa bikèngela wèwè kwikalà ne cyambilu.”] Èyowà’s, mukalenge. Ncyà bushùwà. [“Mèmè ncyèna muyiishi to, ndi mutangadiki.”] Èyowà’s mukalenge. [“Kàdi’s cyambilu cyà bantu bònsò ncyànyì mèmè.”] Ncyà bushùwà. [“Kàdi mpindyewu mene ndi ngenza mudimu, mudimu wa mubidi. Ki mmudimu mukolè to, kàdi ndi ngenza mudimu, ne ncyèna ne cyambilu to. Ne ndi ngiitabuuja ne cipungu cyà mudimu cìndì nsanganyiibwa eci mmu diswa dyà Mukalenge. Mmungambile bwà mèmè kucyènza, ku Diyì

ne bujaadiki bwà Nyumà. Ne ndi ngiitabuujà, pashiishe ne, byambilu ne bikangudiibwe.”] Bushùwà, aci ncyà bushùwà. [“Ncyà bushùwà anyi?”] Ncyà bushùwà, mwanèètù.

⁴⁸⁵ Mwanèètù, mpindyewu, bu wêwè mwà kwalukila apa ne kwangata mikàndà yà kale yà èkèleeziyà ayi, neusanganè ne ngakalombola èkèleeziyà ewu bidimu dikumi ne mwandamutekète, ne nyiisha ditùkù dyònsò, mwà nyiisha ditùkù dyònsò ne ngenza mudimu ditùkù dyònsò. Nwamònu anyi? [Mwanèètù wa balùme kampànda ùdi wàmba ne: “Wêwè wenza mudimu, s’ncimanyinu cìmpè cyà ne *udi* mubiikidiibwe’s.”—Muf.] Èyowà. Pòlò wakenza mudimu, kì mmwòmò anyi? Pòlò wakenza ntentà. [“Nkàvwa mwàmbe kutekeshiibwa mu mabòko bwalu, ànu bu mùvwà mwambe ne, pìikalàbi ne ndi muyiishi, mwà ne cyà kwikala ne cyambilu. Ndi...mwà mufwànyine kutekeshiibwa mu mabòko, kàdi ndi mumanyè ne Nzambì mmumbiikile bwà kupeta mudimu kampànda, bwà cipòlò kampànda.”] Bushùwà’s. Pòlò wàkaya e kwenza ntentà, kì mmwòmò anyi? Wàkakwàta mudimu ne byanza byèndè yéyè mwine bwà kiiyadi wà...Aci’s mmwòmò menemene. Bushùwà’s. [“Èyo, kaa, èè, ki mwaba wùndi mèmè mucipetèle ngwòwò awu, kùdi Pòlò.”] Hmm. Ncyà bushùwà. Nwamònu anyi? John Wesley wàkamba ne: “Buloba mpàrwasè wanyì.” Pa nàнку cyambilu cyèbè cidi ànu cyunzulula, mwanèètù. Batangadiki bàtu baya pa buloba bujimà. Kì mmwòmò anyi? “Ndaayi pa buloba bujimà.” Pa nàнку cyambilu cyèbè’s mbuloba bujimà. Èyowà’s, mukalenge.

Lukonko:

131. Mbyenzèjiiibwe, b-y-e-n-z-e-j-i-i-...Mbyenzèjiiibwe bwà mulami anyi mulubuludi kushàalayè mu dilongesha dyà èkèleeziyà wabò anyi? Èyowà’s. S’ncyà bushùwà. Mbikumbanangane ne mikenji bwà bôbò kusakidila anyi kumushila ku malongesha bwà mmwènenu wabò sungasunga anyi dibuulula anyi? To, mukalenge. To.

⁴⁸⁶ Mulami anyi mulubuludi bìvwa bikèngela ikale mu dipetangana dipwàngàne menemene ne—ne dilongesha dyà èkèleeziyà wabò. Bìvwa bikèngela kushàalabò mu bupwàngàne menemene ne dyumvwija dyà Mifùndù dyà èkèleeziyà wabò, bwalu, bôbò kabàyi benza nàнку to, bàdi munkaci mwà kulwishangana ne cintu ciine aci. Bàdi—bàdi munkaci mwà kudyènzela bibi nkàayabò. Nwamònu anyi? Nudi munkaci mwà kulwanga mvità... .

⁴⁸⁷ Cidi, mu ngaakwilu mukwàbò, bu mùdi—bu—bu mèmè mwà kwamba ne ndi munange famiye wanyì kàdi nteeta bwà kubàdiisha mulùngù. Nwamònu’s, ncintu cìmwècìmwè aci. Nwamònu’s, kanwèna mwà kwenza nàнку to, nwènu... .

⁴⁸⁸ Mu—mulubuludi anyi mulami mu kwangata kwà mudimu wèndè, anyi muntu kanà yònsò mukwaci wa mudimu mu

èkèleeziyà kampànda udi uleeja mpàla wa èkèleeziyà kampànda, nwamònu's, udi uleeja mpàla wa èkèleeziyà.

489 Ki bwà cinyi ngakàpàtuka mu èkèleeziyà wa ba-Baptistes, nwamònu's, bwà musangu wà nzànzànzà. Mvwa muntu amu mu cipòlò cikesè ne bàvwa—bàvwa bandòmbe bwà kujidila bakàjì kampànda bu bayiishi. Èè, ncyà bushùwà ne ncìvwa mufwànyine kushààlamu to. Mémè kwamba ne: “Mémè—mémè ndi mubenge bwà kucyènza.”

490 Ki mpaasàtà awu kumbazulayè. “Eci ncinyi eci? Wèwè's udi mukulu!”

491 Mémè kwamba ne: “Docteur Davis, ne kaneemu kwònsò ku diitabuujà dyà ba-Baptistes, ne byònsò bìdi bitangila dijidiibwa dyànyì, Ncìvwa mumanye ne cìvwa mmu dilongesha dyà èkèleeziyà wa ba-Baptistes bwà kujidila bakàjì to. Aci ke cintu cìmvwà ncìyi mumanye to.”

Ki yèyè ne: “Aci's ke dilongesha dyà èkèleeziyà ewu.”

492 Mémè ne: “Mukalenge, ndiku mufwànyine kufwidiibwa luse dilòlò edi anyì, anyì udi mufwànyine kungandamunakù ku ndambù wa nkonko?” Nwamònu anyì?

493 Yèyè ne: “Mémè nêngandamunè nkonko yèbè.” Yèyè ne: “Mmudimu wèbè bwà wèwè kwikalakù.”

494 Mémè ne: “Mmwómò's, mukalenge. Ncyà bushùwà. Ndi ne cyà kudìbwinka mu cintu kanà cyònsò cidi èkèleeziyà ewu wenza aci. Ndi mu njila wa mudimu, bu umwe wa ku bakùlù bàà èkèleeziyà wa pa kaaba.” Ki yèyè ne. . . Mémè ne: “Udiku mwà kungumvwija bwà cinyi mu Kolintò wa Kumpàla 14 anyì ku 15 aku, mwaba ùdi Pòlò mwambe ne: ‘Bakàjì bèènù bàpuwè mu èkèleeziyà, ki mbabanyishile bwà bwòbò kwakulamù nànsha.’”

495 Ki yèyè ne: “Mòna's, ncyà bushùwà menemene!” Yèyè ne: “Bu. . . Mémè ndi mwà kwandamuna ku alu.” Yèyè ne: “Udi umòna's, cìvwàku,” yèyè ne, “Pòlò wàkamba. . . Bònsò—bakàjì bònsò bàvwa basòmbe mu matumba, bènza mutooyi cyokòcyokò ànu mùtubu bènza dîbà dikwàbù. Kwambaye ne: ‘Kanùbàlekèdi bènza nànkù to.’ Nwamònu anyì?”

496 Ki mémè kwamba ne: “Pashìshe ngumvwijaaku Timòtè Mwibìdi, mùdi Pòlò mwambe, kàbìdi, mufùndi umwèumwè awu, mupostòlo umwèumwè awu, wàkamba ne: ‘Ncyèna ngiitaba bwà mukàjì kulongeshaye anyì bwà kwangataye bukòkeshi nànsha bwà bishi to, nwamònu's, kàdi bwà—bwà kwikalayè mu ditùmikila. Bwalu Adàmà ngwàkenjiibwa dyàmbedi ne pashìshe Evà, ne Adàmà kî ngwàkaseeswishiiibwa to kàdi mukàjì pàakaseeswishiiibwàye.’ Mmuseeswishiiibwe. Mpindyewu, ncyèna ngàmba ne mmuswè kwenza cintu cìbi to, kàdi mu bushùwà bwà bwalu mmuseeswishiiibwemu. Kabìvwa bikèngela kwikalaye mulongeshi to.”

Yèyè ne: “Awu mmwènenu webè wa nkààyeebè anyì?”

497 Mémè ne: “Aci’s ki mmwènenu wa Mufundu ku wanyi mùshindù wà dicimòna. Aci ncidì Bible mwambe.”

498 Yèyè ne: “Wèwè nsongàalume, udi mufwànyine wa bàkunyenga mukàndà wèbè wà muyiishi bwà cyòci aci.”

499 Mémè ne: “Mémè nèmbeepùle ànu ku lutàtu alu. Nèngufilè ànu cyanààna, Docteur Davis.” Mémè ne: “Ki mbwà kukudyombola nànsha...” Kàdi yèyè kààkafwànyine kucyenzaku to, nànsha nàнку. Yèyè kubùlekela’s, kulekela bupita nàнку awu.

500 Ki yèyè kungambila ne ùvwa ne cyà kwenza naanyi muyuuki wà dikokangana pa cyòci aci. Ki mémè ne: “Èyo, ànu dībà kanà dyònsò.” Kàdi yèyè—yèyè kààkenza nàнку to.

501 Nèнку dībà adi pashìishe nda—ndambù, pashìishe, pààkaakula naanyi Mukalenge, nèнку katanci ke—ke Mwanjèlò wa Mukalenge kulwaye, dībà adi—dībà adi yèyè kuseka ànu Cyòci aci, nudi numòna’s. Ki dībà adi mémè—mémè kumwambila ànu cyanààna, mémè kwamba ne: “Èè, Docteur Davis, mbimpè be bwà mémè kuumuka mu cintu eci ànu mpindyewu mene, nwamònu’s,” Mémè ne: “bwalu necìikale bujitu. Ndi mfumina ku dijidiibwa ànu matùku makeke aa, nànsha bishi, pa nàнку necìikale bujitu kùndì, pa nàнку ndi ne cyà kutàpuluka naaci ànu mpindyewu ewu mene.”

502 Nàнку ki bwà cinyi bu mémè mwà kubenga kushààla mu èkèlezìyà wa ba-Baptistes ne kulongesha dilongesha dyà ba-Baptistes ne kutwà muçitabuuja dyà ba-Baptistes mpàndà. Piikalabi ne mwà mucyènzè—piikalabi ne mwà mucyènzè ànu bwalu civwa ng’èkèlezìyà, dībà adi’s ndi mutùpakane, nwamònu’s, ndi munkaci mwà kusokoka cintu kampànda paanyimà. Nèнку piikalabi ne ndi—piikalabi ne ndi—piikalabi ne ndi ne meeji matòoke kùdì mémè mwine, nènye kùdì ba-Baptistes (mpaasàtà wanyi anyi ní nganyi yònsò udi mwà kucìngumvwija awu) ne kubalomba bwà dí—dìyi dyà Mwoyi; bu yèyè mwà kundeeja ànu menemene mwaba ùdici mene mu Mifundu, ne kusankisha njiyà yànyì, dībà adi ndi mwà kucyàmba ànu mùshindù ùdibo bacyàmba, nwamònu’s, nèнку’s nengiikalè Baptiste.

503 Ki bwà cinyi mémè ndi mudìkàdìle. Ki bwà cinyi mémè ncìtu wa mu malongolodi to, bwalu ncìtu ngiitabuuja malongolodi to. Ne mémè ndi ngiitabuuja ne kì ncyà mu Mifundu to, bwalu, mbulongolodi kampànda.

504 Ki bwà cinyi, mémè ncyèna mufwànyine kwikala wa mu bulongolodi kampànda kàdi kudyumvwa mubingìshìibwe ku dicyenza to. Nwamònu anyi? Ki bwà cinyi, mémè ncìtu mbwejamu bantu ne mbàvwija bidimba, ne bikwàbò byà mùshindù awu to, bwalu ndi ngiitabuuja ne tudi *baledìibwe* bwà kwikala bidimba, tudi *baledìibwe* mu Èkèlezìyà wa Nzambì udi ne mwoyi. Nwamònu anyi?

505 Twètù katwèna tukùpula ménà à bantu mu mukàndà ne tubiipata mu bwobùmwè, ne bintu byònsò byà mùshindù awu to, bwalu ndi ngeela meeji ne aci kî mmudimu wètù—wètù bwà kwenza cyôci aci to. Mémè ndi ngiitabuuja ne Nzambì ngudi ne cyà kwipatangana. Nwamònu anyi? Kàdi ndi ngiitabuuja ne èkèleeziyà, kwòkò kufwànyine kwikala mwanèètù wa balùme uvwa wenza cintu kampànda cyà cibì. . .

506 Cileejilu, bôbò—bôbò bakwàte Mwanèètù Neville, anyi Mwanèètù Junior, anyi Mwanèètù. . . mwanèètù wa balùme kampànda mwab'ewu, umwe wa ku balami anyi balubuludi, anyi cintu kampànda cikwàbò, wenza cintu kampànda cyà cibì, Ndi ngeela meeji ne cintu cyà dyesa ncyà èkèleeziyà kudisangisha ne kusambidila mwanèètù ewu. Piikalaye kàyi ànu mudilongolole to, díbà adi bantu bàbìdì bàye kudiye, bàye bwà kupungisha mwanèètù awu. Kàdi piikalayi kàyi mubaakidile to, díbà adi cyambilaayi èkèleeziyà. Díbà adi bôbò kabàyi bacyakidile to, díbà adi ki cikondo ncyôci aci bwà èkèleeziyà mujimà díbà adi, nwamònu's, aci mbwà mpaasàtà, bakulu, ne bikwàbò byònsò bwà kucyenza. Ncyèna ngiitabuuja ne kasumbù kàà balami kampànda nkàdi ne bukenji bwà kwela muntu kampànda pambelu pàà èkèleeziyà to anyi kasumbù kàà balubuludi anyi mpaasàtàà kanà yònsò ewu kèna ne bukenji bwà kucyenza to.

507 Ndi ngeela meeji ne kwòkò muntu uvwa ne cyà kuumushiibwa mu bwobùmwè, bivwa ne cyà kwikala bwà nsombèlu wà masandi, ànyi cintu kampànda cyà mùshindù awu, bwà ne yéyè kàvwa muntu mukumbane to, bu muntu wa wubwela mwab'ewu ùkooyisha bàna bèètù balela bàà bakàji anyi—anyi ùpenda bakàji bèètù, ne bintu byà mùshindù awu, kàdi mwikale ànu ùlaka mukana wàmba mudiye umwe wa kutùdì mwab'ewu. Nwamònu anyi? Mpindyewu, yéyè wa mwaba mukwàbò kampànda mubwele, mòna's, bikèngela twènzè cintu kampànda pa bwalu abu, kàdi, pàkaadibi bikafika ku muntu wa mùshindù awu, muntu wa nsombèlu wa masandi uteeta kwenza mananga ne bakàji bèètù anyi—anyi ùpenda bàna bèètù balela bàà bakàji anyi, nudi bamanye's, cintu kampànda cikwàbò cyà mùshindù awu, anyi kwenza naabo cintu kampànda cyà cibasalula masandi, anyi wàngata bàna bèètù bàà balùme batekète ùpàtuka naabò ùkabàkònyangaja, anyi cintu kampànda.

508 Abi bintu bìdi ne cyà kujoomonyiibwa, ne pashiishe mulùmjànà awu ùdi ne cyà kwipaciibwa mu bwobùmwè ne kàyi mwà kwanyishiibwa bwà kudyàye neetù mèèsà à Mukalenga to, bwalu katwèna ne cyà kwenza nànkù to. Katwèna mwà kudyà nendè mèèsà à Mukalenge to. “Muntu yéyè mudye kàyi mukumbànyine to, mmupile kùdi Mashì ne mubidi wa Mukalenge,” pa mwine muntu awu.

509 Kàdi mémè ndi ngiitabuuja ànu mùdì muntu wàmba ne:

“Èè, mpindyewu, yêyè—yêyè’s ùdi *cikampànda, cikansanga.*” Numusambidilè. Cyà bushùwà’s.

⁵¹⁰ Ncyàdyakupwàku mwoyi to, mu Stockholm, mu Suède mwàmwa, Mwanèètù Lewi Pethrus, muntu munène wa Nzambì. Tuvwa basòmbe ku mèèsà, ànu mu mèbà makesè cyanààna bangabanga ne kwalukila ku Àmèrikè. Tuvwa benze masangisha manène kuntwaku. Ki yêyè ne: Gordon Lindsay kwambaye ne: “Mutàngidi wa ku mutù wa musùmbà munène ewu nganyi?” Balùmyànà wa yaàya, mmutàmbe beena Assemblées de Dieu ntàntà wa kilòmèètà nkàmà ne nkàmà, nwamònu’s. Yêyè ne: “Udi mutàngidi wa ku mutù nganyi?”

Ke Lewi Pethrus muntu wa nsongo, e kwambaye ne: “Yesù.”

Yêyè ne: “Mukulu mutàngidi wenù nganyi?”

Yêyè ne: “Yesù.”

⁵¹¹ Yêyè ne: “Ndi mumanye ne aci ncyà bushùwà,” mwàkambayè, “tudi twitabuuja cintu cìmwècìmwè aci bwà Assemblées de Dieu yètù.” Yêyè ne: “Aci’s ncyà bushùwà.” “Kàdi,” mwàkambayè, “ambàbi túng, cileejilu, mwanèètù ka—kampànda kupàtukaye mu njila,” yêyè ne: “nganyi udi ne díyì dyà kumupàtula pambèlu?”

Yêyè ne: “Katwèna tumupàtula pambèlu to.”

“Èè,” yêyè ne: “nudi nwenza cinyi?”

⁵¹² Yêyè ne: “Tudi tumusambidila.” Mèmè kwela meeji ne bìvwa ànu bishèeme be! Aci’s cìvwa cyùmvwika bu cyà bwena Kilistò bwanyi mèmè ne: “Tudi tumusambidila.” Kakwena muntu nànsha umwe udi umwipata to, bàdi bàmusambidila.

⁵¹³ Yêyè ne: “Èè, díbà adi, kàdi bu bàmwè bàà ku bânà bèètù mwà kupetangana,” yêyè ne: “ne bàmwè bàà kùdìbo kabàyi baswè kàbìdì kubwela nendè mu bwobùmwe’s? Kumubiikidisha, bu yêyè mpaasàtá, nudi numòna’s, ùbanga kwikala mulùme wa bainábànzá munkaci mwà. . . Nudi bamanye cìndì muswè kwamba, ne bintu byà mùshindù awu, ne bàmwè bàà ku bampaasàtá kabàyi baswè kumwakidila mu èkèleeziyá yàbò to. Nwènù bwònsò nudi nwenza cinyi, numwipata pambèlu pàà bulongolodi bwènù anyi?”

⁵¹⁴ “To.” Yêyè ne: “Tudi ànu tumulekela nkààyendè kàdi tumusambidila.” Yêyè ne: “Katwèna banji kujimija nànsha umwe to. Bàtu misangu yònsò ànu bààlukila, mu mùshindù kampànda anyi kansanga.”

⁵¹⁵ Yêyè ne: “Èè,” yêyè ne: “mpindyewu, kàdi bu. . .” Yêyè ne: “Kàdi bu bàmwè bàà kùdìbo mwà kwamba ne mbamuswè ne bakwàbò kabàyi bamuswè? Mpindyewu, kàdi bwà aci nudi nwenza cinyi?”

⁵¹⁶ Yêyè ne: “Èè, bàdi bamuswè abu, bàdi bàmwangata; bàdi kabàyi bamuswè to, kí mbenzejìbwe to.”

517 Pa nànkù—pa nànkù ndi ngeela meeji ne ki mùshindù mwimpè wa kucyenza's, kî mmwòmò anyi, bânà bèètù? Nènku mu mùshindù awu ki utùdì “bânà bàà muntu.”

518 Mpindyewu, bânà bèètù, ndi ntèkemena ne bintu ebi mbifile ndambù wa mandamuna kampànda àà mùshindù kampànda anyi cintu kampànda, cyà ne masangisha ètù à dilòlò edi mma—mmatwambulwisheku ne cintu kampànda. Ndi ndilongolola bwà kuumuka mpindyewu bwà cipòlù cikesè, nya mu masangisha à ku Wesètè kwaka. Ne didìpwekesha dyònsò ndi njinga masambila ènù.

519 Àmwè àà ku mandamuna ànyì mwab'ewu, pàmwàpa àbùngì à ku wòwò, pàmwàpa nànsha òmwè dyà ku wòwò, kadìvwa dyà bushùwà to. Ncyèna mumanye to. Kàdi mmawànyine kwikala à matàmbe bwimpè àndiku mémè mwà kukungwija mu wànyì pàànyì mùshindù wà kwela meeji, nudi numòna's, bwà kuteeta kuCyùmvwija. Pàmwàpa yà ndekeelu eyi, nangananga, mmilwe ku ndekeelu eku, ncivwaku ne díbà dyà kuyòshaku dísu to. Ncivwa ànu muyooshe dísu to, yìvwa . . . Cìndì muswè kwamba ncyà ne, yìvwa m'Mifùndu yitùtù tubalabala musangu wònsò mwab'ewu, ku ditùkù ne ku ditùkù mu èkèleeziyà emu. Mwawa ngeela meeji ne cìvwa cìfwànyine kwikala cintu kampànda cyà cìkàyàbàle cyà cìfwànyine kutufikisha ku díbwela mu bulelèlè mu cintu kampànda cyà cinène, kàdi bìdi ànu bu nkonko yà mu màkèleeziyà.

520 Ndi ne disànka dyà kunùmòna bakwàte mùshindù awu, kakùyì cimvundù nànsha cimwè to, kakùyì dibungama nànsha dikesè, kakùyì cibwejakaji nànsha cikesè to. Kakùyì lukonko lukokanganaPu lwamba ne “Ncyà mafi, Eci ncyà mafi, katwena baciswèku to.” Cìvwa ànu bânà bèètù bàvwà baswè kumanya cintu kampànda bwà kukoleshabo diimana dyàbò, kwajiki. Aci . . . cìdi cìkolesha, cìswika—cìswika byà mvità bikolè ndambù, cìkolesha dinungu dikwàbòmu. Ndi ntèkemena ne tudì ne cyà kutuutakena misangu yàbùngì mùshindù ewu, bwà kukolesha byà mvità.

521 Nènku nudi nuvùluka, bânà bèètù ne, byànyì byà mvità bìdi dijinga ne kukoleshiibwa, pààbì's. Nànkù ndòmbelaayi Nzambì bwà Nzambì ànkwa'cìsheku ne atàmbe kukolesha ndambù byànyì byà mvità, bwà ngaamòna mwà . . . bwà nciikadi ngenza maalu ne malekelela. Ne nsòmbelu ùndì nendè ne bintu bìndì ngenza ntambeku kubyènza ne nyumà wa didìpwekesha, mwikale ne dilwijakaja dyàbùngì dyà kucyènza. Nènku Nzambì ampèèsheku mwoyi wà kucyènza kutàmbe mùmvwà naawu kwònsò aku. Ndi ndomba cintu cimwècimwè aci bwènù nwènù bònsò. Nzambì ànùbènèshè.

522 Ndi munùlamè mwaba ewu kukaadi ntàntà mule, ne mpindyewu mene nkushààle tusunsa tutaanu kumpàla kwà díbà dikumi ne òmwè.

523 Nènku mpindyewu, Mwanèètù Neville, ndi—ndi mwà... Mpindyewu, ndi mujandule ne, cidi ànu mu ntanta wa kilòmèètà mitwe ku cinunu nkàmà yìnaayi ne makumi anaayi ne byà mu njila kuntwaku, Ncyàkuumuka to kumpàla kwà mu òmwè mu dindà. Kàdi ndi muswè kwikala apa mu dyàlumingu bwà kàlaasà kàà Dyàlumingu, ndi ndwa bu mwenyi webè bwà kukutèèleja wèwè uyiisha, nwamònu's, mu dyàlumingu. Nwamònu anyi? Kàdi... Èè, mwanèètù, èyowà's, mwanèètù. Mwanèètù Neville, ki kabingila nkòkò aku's, mwanèètù. Ndi... ndi mukunange ne wèwè usòmbèlè wântwa mushinga mu kumpèèsha kwà cyambilu byenze ànu bu... byenze ànu bu ne ndi mukulwèbè wa kule ne kule, anyi cintu kampànda. Kàdi kacya ncitukù mwanji kudyumvwa mùshindù awu to, Mwanèètù Neville. Ntu nguumvwa ne tudi bânà bàà muntu.

524 Mwanèètù Ruddell ne Mwanèètù Junie, ne, kaa, nwènù bânà bèètù bwònsò ne nwènù bònsò, tudi—tudi ànu bânà bàà muntu bònsò pàmwè, nudi numòna's.

525 Kàdi cidi... Kabingila kàà cyòci aci, ndi ne dîyi dimpàte ndambù mpindyewu, nudi numòna's, ne ndi mupicishe mbingu yisambòmbò milondàngàne yà mvità yà kashèndèndè, nwamònu's. Nènku ndi—ndi muswè ànu pàmwàpa kubanga mèmè ne mùshindù, mumvwa ngeela meeji, paanyimà pàà disangisha dyà dilòòlò edi, aci necimpeeshe diitànù ne diisambòmbò ne dyàlumingu bwà kwikishaku, kumpàla kwà mèmè kubanga masangisha kuntwaku.

526 Nènku Mwanèètù Junie, pàndi ànu ngààlukila, musangu kampànda ungààbwela, nebikèngele bwà mèmè kupweka bwà kukumòna cyàkàbidi, ndi muswè kupàtuka. Ndi mupicile pa èkèleeziyà webè mukesè awu mwaba awu, makèèlèlè awu, ngeela meeji. Mukàjàanyi kwambaye ne: "Ndi ngeela meeji ne:..." Ndwa pabwìpi ne njila wa njanja ànu lwà ku Glenellen Park aku anyi? Mvwa njinga kulwa kuntwaku ne kuyiikilaku ne bantu bà ku Sellersburg abu. Bimpè.

527 Mwanèètù Ruddell, mwoyi wèbè ùbèneshiibwè. Ndi njinga kupàtuka, udi ne musumbà wa bantu balenga be. Uvwa musòmbè mwaba awu dilòòlò munkaci mwà kutèèleja ànu bu ne uvwa mukulu mununu, usùkuminangana ànu naabi.

528 Mwanèètù Beeler udi pààpa wàwa, ng'umwe wa ku bânà bèètù batangadiki. Ndi ntèkemena ne musangu mukwàbò ndi mwà kudisangana mu òmwè dyà ku masangisha èbè mwaba kampànda, mwanèètù, mûndi mwà kutwàlakù bwenzeji kampànda, kwikalakù ne cintu kampànda cyà kwamba mwaba kampànda cyà kukukànkamika naaci. Mèmè ntu misangu yònsò ànu ne dîyi dimpè bwèbè wèwè bwà muntu kanà yònsò, bwèbè wèwè ne bwà Mwanèètù Stricker ewu, ne batangadiki.

529 Mwanèètù Collins ewu, ûndi ngeela meeji ne dîngà ditukù neikalè mwambi mupàte patapata mu mudimu.

⁵³⁰ Balùme biikale balùme bàà bukitù, balùme bàà bukitù, balùme balelèlà bàà diitabuuja, Nzambi ikale neenù bwônso, ne nwênù balami, nwênù balubuludi, nwênù bânà bèètù.

⁵³¹ Ndi ngiitabuuja ne nudi...Mwanèètù wa balùme ewu, ncyèna mwà kuvùluka dîna dyèndè to. Udi...[Mwanèètù Caldwell ùdi wàmba ne: “Mwanèètù Caldwell.”—Muf.] Caldwell. Udi ànu...Udi umwe wa ku bakùlù anyi cintu kampànda, kí mmwômò anyi, anyi ànu...[“Mwambi.”] Mwambi. [“Mémè ndi mwambi. Mwawa wa mu Eglise de Dieu, ncívwa mwà kuyiisha Èvànjeeliyò mu kaabujimà kàdi kushààla naabò to. Ncívwa mwà kuyiisha dibatiiza mu Dîna dyà Mukalenge Yesù kàdi kushààla naabo to. Mwawa mupete mukàndà wà dyanyisha mutàmbe kutumbuka wà bumpaasàtà ùvwabo bàfila, kàdi ngàakabààlujilawu. Kacya ànu ngàakuumvwa uyiisha Mayiisha manène awu, mémè kubààlujila mikàndà ayi, kupatuka mu bulongolodi. Mpindyewu ndi muswè kwikala umwe wenu.”]

⁵³² Twasàkidila, mwanèètù. Tudi tukwàkidila mu bwobùmwe bwètù. Ne mikàndà yètù—yètù ya dijaadikiibwa naayi nyà ku dyulu. Nsòmbelu wetù ngudi wenza mikàndà yètù yà dijaadikiibwa naayi, nudi numòna’s. Kì yètù mikàndà yà dijaadikiibwa naayi nyòyi ayi. “Mémè nciyi ngenza byenzi byà Taatù Wanyi to, dîbà adi kanùNgiitabùùji to.” Nwamònu anyi? Ncyà bushùwà. Kì yètù mikàndà yà dijaadikiibwa naayi nyòyi ayi. Nènku bu muntu mununu...Bu mùvwa Howard Cadle ne ciibidilu cyà kwamba ne: “Twètù katwèna ne mukenji mukwàbò to ànu Dinanga, katwèna ne mukàndà mukwàbò to ànu Bible, ne—ne katwèna—ne kawkwèna ne twitabàayi nànsha umwe to ànu Kilistò.” Ncyà bushùwà. “Katwèna ne mukenji nànsha umwe to ànu Dinanga, twitabaayi mukwàbò to ànu Kilistò, mukàndà nànsha ùmwè ànu Bible.”

⁵³³ Nènku tudi—tudi, Mwanèètù Caldwell, tudi ne disànka dyà kwikalaku neebè. Udi mupàtùkile mu bulongolodi bunène. Eglise de Dieu wa Anderson, ngeela meeji. [Mwanèètù Caldwell ùdi wàmba ne: “Wa ku Cleveland.”—Muf.] Anyi èkèleeziyà wa ku Cleveland, Èkèleeziyà wa beena Mpenta wa Nzambi. [“Nènku mvwa ne ciibidilu cyà kulombola kaaba aka ku...?...”] Kaa, èyowà’s. Kaa, èyowà’s, mémè’s nkátù muyeku kuntwaku. Ngeela meeji ne mvwa muye kuntwaku ne Mwanèètù Neville...anyi ne Mwanèètù Wood, musangu kampànda, tuvwa ne mbwa anyi mbwa wa bulembi wa kùdi muntu kampànda ùvwa uya mu èkèleeziyà wenu kuntwaku’s. Nènku mvwa mwimane pa bibàndilu kuntwaku nyiikila, nènku bàvwa bàakula bwèbè wèwè. Èè, ndi mutwishiibwe...[“Ku èkèleeziyà wanyi.”] Kaa? [“Burns.”] Ncyà bushùwà’s, Mwanèètù Burns. Ncyà bushùwà [Mwanèètù Caldwell ùdi ùlonda bwalu kampànda bùvwa wenzèke.] Kaa? Èyowà. Kaa, Bertha, ncyà bushùwà. Kaa, abi’s mbilenga be.

⁵³⁴ Mwanèètù Rook kuntu kwàka, nyewu mushààle mpaasàtà

mpindyewu, anyi mutangadiki, ngeela meeji. Ncyà bushùwà anyi? Anyi udi mulombodi anyi? [Mwanèètù Rook ùdi wàmba ne: “Ànu mutangadiki cyanàànà.”—Muf.] Mutangadiki. Ndi njinga nkweleku kàalumbandi, Mwanèètù Rook. Ndi muumvwe bàmba bwà mudimu kampànda munène wùdi wenza bwà Mukalenge. Nwènù. . . Mvwa muumvwe bàmba ne uvwa muye ku Indianapolis anyi uvwa uya ku Indianapolis, mwenze masangisha ne mupetèle Kilstò misùùkà. Nzambi ikale neebè, Mwanèètù Rook. Ndi ne disànkà menemene dyà kukumòna. Mvwa mukumòne pa katumbà kàà kale kuntweku, wenda unyungùluka kuntweku, welangana ne manga à bufukè mu lupangu lwèbè kuntu kwàka. Èè, tudi tumòna’s mùdi uteeta kwenza cintu kampànda bwà Mukalenge. Ndi ne disànkà dyà mùdiYè mukubiikile ku mudimu wà bwambi, shààla ànu kacya wàMulama kumpàla kwèbè, mwanèètù wa balùme. Nzambi àkubènèshè. Kwikadi wàdya cibànga pa cintu nànsha cimwè to; kàdi ucyenze ne nyumà mutàmbe kwikala wa kalolo ùdi mwà kucyènza nendè awu’s. Dyiisha dyèbè—dyèbè diikalè misangu yònsò ànu ditwisha mukèlè wà kalolo kàà Nyumà Mwímpè.

⁵³⁵ Nènku Mwanèètù Stricker. . . [Mwanèètù wa balùme kampànda ùdi wàmba ne: “Tudi tujinga masambila ènù bwònsò. Tudi—tudi tuteeta bwà kubanga èkèleeziyà ku Nord wa Vernon.”—Muf.] Kaa, ndi ntèkemena ne nenùmupete. Netùkusambidile. [“Too ne mpindyewu, bicidi ànu bimpè be.”] Neyà bushùwà.

Billy, ndìbà kaayi diwàbangà kulombola?

⁵³⁶ Docteur Goad ne Docteur Mercier mwaba ewu, ndi—ndi—ndi ntèkemena ne. . . bu mutùtù tubiikilangana muntu ne mukwèndè nànkù. Nènku Mwanèètù Goad mmukafike too ne mu mùshindù wà ne mèmè. . . yèyè mmukumbànyine mwànzu, ùdi mwà kupaya mitèlèngè mu cingoma mpindyewu. Èyowà. Nènku, Mwanèètù Leo, ngeela meeji ne tudi mwà kumulekela ànu ùtùngunuka kwôkò aku mùshindù awu, ne kumubiikila. . . àtùngunuke ne mwànzu wèndè wà—wà bu “Docteur.”

⁵³⁷ Èè, “Docteur” Branham, lwà paanyimà pàpa, wèwè’s tùngùnuka ànu ne kumutàbalela bimpè, ne makènke àteema ànu kelèlèè. Nènku—nènku nwanabile cinyi’s wè, dìbà kanà dyònsò ditùdi ne masangisha à pabwàwù nenyiikilè ne kasumbù kàà balombodi bwà kumòna ní kabèènakù mwà kukutentekela ndambù wa pamutù bwà cyòci aci [Mwanèètù Branham ùdi ùtùdika mu tuseku—Muf.], bwà mudimu wà pabwàwù dìba dyùdi ne cyà kukòmba bikolè ne dibànda dipweka, aci’s necikusànkishè’s.


⁵³⁸ Docteur Wood. Mvwa mumubiikile ne “Docteur,” ngeela meeji ne nudi nudìkonka ne mbwà cinyi’s. ncyena mumwinyika dìnà dibì to, ùsombèle utapa micì ùyisunsula ànu tupesetupese, nudi bamanyè’s. Mukalenge ùdi ùkolesha mucì mulenga

kumòna, ne cyèndè nkuwùkòsa ne kwenza nawù nzùbu. Kacya ncutukù mwanji kumòna cyà nàнку to, pa nàнку bikèngela mmubiikile ne “Docteur.”

⁵³⁹ Mwanèètù Taylor, ucìdi ànu ne lulamatu ku ciibi, bwà kupèèsha mwineebè nkwasas. Ndi ngeela meeji bwèbè wèwè mùshindù ewu: “Mbipicibwe ne mémè mwikàle cituutwidi cyà makàsà ku nzùbu wa Mukalenge pamutù pàà kusòmbela mu nntentà pàmwè ne beena lwonji.” Ncyà bushùwà’s, mukalenge.

⁵⁴⁰ Mwanèètù Hickerson, udi ànu ucìditwilakù mu Njila, wenda ubànda, mutungùnuka ànu bilenga. Mwva njinga webè... Mémè... Wèwè e kuditwa mu Njila, ne kushidiimba, Ncyà bushùwà ne ndi nkàcila bwà meeji èbè matòòke ne byònsò byúdi wenza bwà Mukalenge Yesù abi. Nzambi àtambe kukubènesha ne kukuvwija mulami mulelèlà, mwanèètù wa balùme, cìndi ngiitabuujja ne ke cyùdi, nzùbu webè ùdi mu dikòòkela ne bintu byònsò ànu múvwà amu.

⁵⁴¹ Mwanèètù Fred, kwenà mwanji kwikala neetù ntàntà mule to, ufùmina ku Canada. Katùcyèna tumvwaku ne ucìdi kàbidì mwena Canada to, tudi tumvwa ne udi mwena lwendu ne mwenyi neetù, mwanèètù wa balùme, bu mulubuludi. Wèwè ne Mwanèètù Wood, ne nwènu bàdi bàkwàta mudimu wènu bímpè pàmwè ne Mwanèètù Roberson, ne bakwàbò bwònsò abu; Mwanèètù Egan, yèyè kèna kaaba aka dilòòlò edi to.

⁵⁴² Ne Mwanèètù Roberson, wèwè udi di—dikwàcisha dilelèlà kùndi, Mwanèètù Roberson pàmwè ne bakwàbò, mu cilumbù cyà bitàdi eci cìvwa cikèbèshe lùnkètù aci. 

61-0112 Nkonko Ne Mandamuna
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org